


高氏史略

上

内閣文庫			
番 號	漢	9269	
冊 數		2 (1)
函 號	圖	2	4

內閣文庫			
元	九	二	九
七	二		
五	六	九	
函	架	冊	號



原本の文字など不明瞭な個所があります。

史略

太史公以來載籍之作久矣然著矣至於老蝕半
瓦着力汗青何止間見層出而善序事善裁論比良
班馬者固有犖犖可稱然書多失傳世固少接被諸
籤目往往莫詳況有窺津涯涉閫奧者乎乃為網羅
散軼稽輯見聞采菁獵奇或標一二仍依劉向七錄
法各彙其書而品其指意後有才者思欲商榷千古
鈐括百家大筆修辭緝熙盛典殫極功緒與史並驅
其必有準於斯寶慶元年十月十日修十一月七日
畢似孫序

史略卷一

高

似孫

續古

太史公史記

太史公自序

諸儒史議

續史記

史記注

先公史記注

史記雜傳

史記考

史記音

史記一百三十卷

漢太史令司馬遷字子長誤按漢書藝文志云十篇
缺有錄無書衛宏舊儀云武景紀爲武帝削去遷歿
之後遂亡景紀禮書樂書律書漢興以來將相年表
三正世家日者龜策傳斬列傳元成間褚少孫補缺

太史公自叙

太史公既掌天官不治民有子曰遷遷生龍門耕牧
河山之陽年十歲則誦古文二十而南游江淮上會
稽探禹穴窺九疑浮沅湘北涉汶泗講業齊魯之都

觀夫子遺風鄉射鄒嶧阬困蕃薛彭城過梁楚以歸
於是遷仕爲郎中奉使西征巴蜀以南略邛笮昆明
還報命是歲天子始建漢家之封而太史公留滯周
南不得與從事發憤且卒而子遷適反見父於河雒
之間太史公執遷手而泣曰予先周室之史也自上
世嘗顯功名於虞夏典天官事後世中衰絕於予乎
女復爲太史則續吾祖矣今天子接千歲之統封泰
山而予不得從行是命也夫命也夫予死爾必爲太
史毋忘吾所欲論著矣且夫孝始於事親中於事君
終於立身揚名於後世以顯父母此孝之大也夫天

下稱周公言其能論歌文武之德宣周召之風達大王王季忠慮爰及公劉以尊后稷也幽厲之後王道缺禮樂衰孔子脩舊起廢論詩書作春秋則學者至今則之自獲麟以來四百有餘歲而諸侯相兼史記放絕今漢興海內一統明主賢君忠臣義士予爲太史而不論載廢天下之文予甚懼焉爾其念哉遷俯首流涕曰小子不敏請悉論先人所次舊聞不敢闕卒三歲而遷爲太史令紬史記石室金縢之書

二

余聞之先人口處戲至純厚作易八卦堯舜之盛尚

書載之禮樂作焉湯武之隆詩人歌之春秋采善貶惡推三代之德褒周室非獨刺譏而已也漢興已來至明天子獲符瑞封禪改正朔易服色受命於穆清澤流罔極海外殊俗重譯款塞請來獻見者不可勝道臣下百官力誦聖德猶不能宣盡其意且士賢能矣而不用有國者耻也主上明聖德不布聞有司之過也且余掌其官廢明聖盛德不載滅功臣賢大夫之業不述墮先人所言罪莫大焉余所謂述故事整齊其世傳非所謂作也而君比之春秋謬矣於是論次其文十年而遭李陵之禍幽於圜牆之中喟然而歎

曰是余之臯夫身虧不用矣退而深惟曰夫詩書隱約者欲遂其志之思也卒述陶唐以來至于麟止自黃帝始五帝本紀第一夏本紀第二殷本紀第三周本紀第四秦本紀第五始皇本紀第六項羽本紀第七高祖本紀第八呂后本紀第九孝文本紀第十孝景本紀第十一今上本紀第十二三代世表第一十二諸侯年表第二六國年表第三秦楚之際月表第四漢侯諸年表第五高祖功臣年表第六惠景間功臣年表第七建元以來侯者年表第八王子侯者年表第九漢興以來將相名臣年表第十禮書第一樂

書第二律書第三歷書第四天官書第五封禪書第六河渠書第七平準書第八兵太伯世家第一齊太公世家第二曾周公世家第三燕召公世家第四管蔡世家第五陳杞世家第六衛康叔世家第七宋微子世家第八晉世家第九楚世家第十越世家第十一鄭世家第十二趙世家第十三魏世家第十四韓世家第十五田完世家第十六孔子世家第十七陳涉世家第十八外戚世家第十九楚元王世家第二十荆燕王世家第二十一齊悼惠王世家第二十二蕭相國世家第二十三曹相國世家第二十四留侯

世家第二十五陳丞相世家第二十六絳侯世家第二十七梁孝王世家第二十八五宗世家第二十九三王世家第三十伯夷列傳第一管晏列傳第二老子韓非列傳第三司馬穰苴列傳第四孫子吳起列傳第五伍子胥列傳第六仲弓弟子列傳第七商君列傳第八蘇秦列傳第九張儀列傳第十樗里甘茂列傳第十一穰侯列傳第十二白起王翦列傳第十三孟子荀卿第十四平原虞卿列傳第十五孟嘗君列傳第十六魏公子列傳第十七春申君列傳第十八范雎蔡澤列傳第十九樂毅列傳第二十廉頗藺

相如列傳第二十一田單列傳第二十二魯仲連列傳第二十三屈原賈生列傳第二十四呂不韋列傳第二十五刺客列傳第二十六李斯列傳第二十七蒙恬列傳第二十八張耳陳餘列傳第二十九魏豹彭越列傳第三十黥布列傳第三十一淮陰侯韓信列傳第三十二韓信盧縮列傳第三十三田儋列傳第三十四樊鄴滕灌列傳第三十五張丞相倉列傳第三十六酈生陸賈列傳第三十七傅靳蒯成侯列傳第三十八劉敬叔孫通列傳第三十九季布欒布列傳第四十爰盎朝錯列傳第四十一張釋之馮唐

列傳第四十二萬石張叔列傳第四十三田叔列傳
第四十四扁鵲倉公列傳第四十五吳王濞列傳第
四十六魏其武安列傳第四十七韓長孺列傳第四
十八李將軍列傳第四十九衛將軍驃騎列傳第五
十平津主父列傳第五十一匈奴列傳第五十二南
越列傳第五十三閩越列傳第五十四朝鮮列傳第
五十五西南夷列傳第五十六司馬相如列傳第五
十七淮南衡山列傳第五十八循吏列傳第五十九
汲鄭列傳第六十儒林列傳第六十一酷吏列傳第
六十二大宛列傳第六十三游俠列傳第六十四佞

幸列傳第六十五滑稽列傳第六十六日者列傳第
六十七龜策列傳第六十八貨殖列傳第六十九

三

古者富貴而名摩滅不可勝記唯倣儻非常之人稱
焉蓋西伯拘而演周易仲尼厄而作春秋屈原放逐
乃賦離騷左丘失明厥有國語孫子黜脚兵法脩列
不韋遷蜀世傳呂覽韓非囚秦說難孤憤詩三百篇
大氏賢聖發憤之所爲作也此人皆意有所鬱結不
得通其道故述往事思來者及如左丘明無目孫子
斷足終不可用退論書策以舒其憤思垂空文以自

見僕竊不遜近自託於無能之辭網羅天下放失舊聞考之行事稽其成敗興壞之理凡百三十篇亦欲以究天人之際通古今之變成一家之言草創未就適會此禍惜其不成是以就極刑而無愠色僕誠已著此書藏之名山傳之其人通邑大都則僕償前辱之責雖萬被戮豈有悔哉然此可爲智者道難爲俗人言也

諸儒史議

楊雄

問太史遷曰實錄又曰子長多愛愛奇也又曰淮南

說之用不如太史公之用太史公聖人有取焉

班彪

太史令司馬遷採左氏國語刪世本戰國策據楚漢列國時事上自黃帝下訖獲麟作本紀世家列傳書表凡百三十篇而十篇缺焉遷之所紀從漢元至武則絕其功也至於採經摭傳分散百家之事甚多踈略不如其本務欲以多聞廣載爲功論議淺而不篤其論術學則崇黃老而薄五經序貨殖則輕仁義而羞貧窮道游俠則賤守節而貴俗功此其大敝傷道所以遇極刑之咎也然善述序事理辯而不華質而

不但文質相稱蓋良史之才也誠令遷依五經之法
言同聖人之是非意亦庶幾矣夫百家之書猶可好
也左氏國語世本戰國策楚漢春秋太史公書今之
所以知古後之所由觀前聖人之耳目也司馬遷序
帝王則曰本紀公侯傳國則曰世家卿士特起則曰
列傳又進項羽陳涉而黜淮南衡山細意委曲條例
不經若遷之著作採獲古今貫穿經傳至廣博也一
人之精文重思煩故其書刊落不盡尚有盈辭多不
齊一若序司馬相如舉郡縣著其字至蕭曹陳平之
屬及董仲舒並時之人不記其字或縣而不郡者蓋

不暇也今此後篇慎覈其事整齊其文不為世家唯
紀傳而已傳曰殺史見極平易正直春秋之義也

班固

太史公父子相繼纂其職上記軒轅下至于茲著十
二本紀作十表八書三十世家七十列傳凡百三十
篇五十二萬六千五百字成一家言

二

贊曰自古書契之作而有史官其載籍博矣至孔氏
纂之上繼唐堯下訖秦繆唐虞以前雖有遺文其語
不經故言黃帝顓頊之事未可明也及孔子因魯史

記而作春秋而左丘明論輯其本事以爲之傳又纂異同爲國語又有世本錄黃帝以來至春秋時帝王公侯卿大夫祖世所出春秋之後七國並爭秦兼諸侯有戰國策漢興伐秦定天下有楚漢春秋故司馬遷據左氏國語采世本戰國策述楚漢春秋接其後事訖于大漢其言秦漢詳矣至於采經據傳分散數家之事甚多疏略或有抵牾亦其涉獵者廣博貫穿經傳馳騁古今上下數千載間斯已勤矣又其是非頗繆於聖人論大道則先黃老而後六經序遊俠則退處士而進姦雄述貨殖則崇執利而羞賤貧此其

所蔽也然自劉向楊雄博極群書皆稱遷有良史之材服其善序事理辯而不華質而不俚其文直其事核不虛美不隱惡故謂之實錄嗚呼以遷之博物洽聞而不能以知自全旣陷極刑幽而發憤書亦信矣迹其所以自傷悼小雅巷伯之倫夫唯大雅旣明且哲能保其身難矣哉

二

文章則司馬遷相如公孫弘傳贊又曰遷著書成一家言揚名後世至以身陷刑之故反徵文譏刺貶損當世

范曄

司馬遷著史記自太初以後闕而不錄後好事者頗或綴集時事然多鄙俗不足以踵繼其書

班彪傳

劉昭

司馬遷作史記爰建八書班固因廣是曰十志天人經緯帝政紘維區分原奧開廣著述創藏山之祕書肇刊日之遐貫誠有繁於春秋亦自敏於改作又曰遷有承考之言固深資父之力又曰昔褚先生補子長之削少馬氏接孟堅之不畢相成之義古有之矣

補後漢書志序

張輔

晉

司馬遷之著述辭約而事舉叙三千年事唯五十萬言班固叙二百年事乃八十萬言煩省不同不如遷一也良史述事善足以獎勸惡足以鑒戒人道之常中流小事亦無取焉而班皆書之不如遷二也毀貶朝錯傷忠臣之道不如遷三也遷既造創固又因循難易益不同矣又遷爲蘇秦張儀范雎蔡澤作傳逞辭流離亦足以明其大才故述辯士則藻辭華靡叙實錄則隱核名檢此所以遷稱良史也

葛洪

遷發憤作史記其以伯夷居列傳之首以其善而無
報也爲項羽本紀以據高位者非關有德也及其叙
屈原賈誼辭旨抑揚惡事不避亦一代之偉才作景
帝本紀極言其短及武帝之過帝怒而削去坐舉李
陵降匈奴下遷蠶室有怒言下獄死宣帝以其官爲
太史令行太史公而已魏志載明帝問王肅司馬遷
以受刑之故內懷隱切著史記非貶孝武令人切齒
故永平十七年詔曰司馬遷著書成一家言揚名後
世至以身陷刑之故微文諷刺貶損當代蓋爲此也

裴駟

班固有言曰司馬遷據左氏國語采世本戰國策述
楚漢春秋接其後事訖于大漢其言秦漢詳矣至於
采經撫傳分散數家之事甚多疏略或有抵牾亦其
所涉獵者廣博貫穿經傳馳騁古今上下數千載間
斯已勤矣又其是非頗謬於聖人論大道則先黃老
而後六經序游俠則退處士而進姦雄述貨殖則崇
執利而羞貧賤此其所蔽也然自劉向楊雄博極羣
書皆稱遷有良史之才服其善序事理辯而不華質
而不俚其文直其事核不虛美不隱惡故謂之實錄
駟以爲固之所言世稱其當雖時有紕繆實勒成一

家總其大較信命世之宏才也考校此書文句不同
有多有少莫辯其實而世之惑者定彼從此是非相
貿真偽舛雜故中散大夫東莞徐廣研核衆本爲作
音義且列異同兼述訓解粗有所發明而殊恨省略
聊以愚管增演徐氏采經傳并百家先儒之說豫是
有益悉皆抄內刪其游辭取其要實或義在可疑則
數家兼列漢書音義稱臣瓚者莫知氏姓今直云瓚
曰又都無姓名者但云漢書音義時見微意有所裨
補譬嗜星之繼朝陽飛塵之集華嶽以徐爲本號曰
集解未詳則闕弗敢臆設人心不同聞見異辭班氏
庶賢無所用心而已

王通

使陳壽不美於史遷固之罪也裴晞曰何謂也子曰
史之失自遷固始也記繁而志寡又曰遷固而下述
作何其紛紛也王氏中說謂陳壽有志於史依大議而削異端使壽不美於史遷固之罪
史小蘇公作古史謂其淺近而不學疎略而輕信恐皆非知太史公者後學未以爲然也

司馬貞

史記者漢太史司馬遷父子之所述也遷自以承五

百之運繼春秋而纂是史其褒貶覈實頗亞於丘明
之書於是上始軒轅下訖大漢作十二本紀十表八
書二十系家七十列傳凡一百三十篇始變左氏之
體而年載悠邈簡冊闕遺勒成一家其勤至矣又其
屬藁先據左氏國語系本戰國策楚漢春秋及諸子
百家之書而後貫穿經傳馳騁古今錯綜隱括各成
使一國一家之事故其意難究詳矣比於班書微爲
古質故漢晉名賢未知見重所以魏文侯聽古樂則
唯恐卧良有以也逮至晉末有中散大夫東莞徐廣
始考異同作音義十三卷宋外兵參軍裴駟又取經

傳訓釋作集解合爲八十卷雖粗見微意而未窮計
論南齊輕車錄事鄒誕生亦作音義三卷音則微殊
義乃更略爾後其學中廢貞觀中諫議大夫宗賢館
學士劉伯莊達學宏才鈎深探賾又作音義二十卷
比於徐鄒音則具矣殘文錯節異旨微義雖知獨善
不見傍通欲使後人從何准的貞觀間陋識頗事蹟
研而家傳是書不敢失墜初欲改更舛錯裨補疎遺
義有未通兼重注述然以此書殘缺雖多實爲古史
忽加穿鑿難允物情今止探求異聞採撫典故解其
所未解申其所未申者釋文演注又重爲述贊凡三

十卷號曰史記索隱

劉伯莊

班固云司馬遷據左氏國語采系本戰國策述楚漢春秋接其後事訖于天漢左氏者謂左丘明爲春秋經作傳三十篇其中記三皇五帝三王五伯卿大夫士等居處族系之事也國語者亦左丘明所撰起周穆王訖敬王之末又記諸侯等事起魯莊公訖春秋末系本者劉向云古史官明於古事者之所記錄黃帝顓頊帝皓堯舜夏殷周至時王依及諸國系卿大夫名號即太史公所取爲本紀系家戰國策者記春

秋之後七國戰爭之事以東西周爲首而及中山之國其間戰鬪征伐謀臣說士從橫之策也楚漢春秋者陸賈所記起項氏漢高訖漢文帝中間諸呂用事故名楚漢春秋訖于天漢者自漢家太史所記高惠呂后文景及武帝天漢諸年之事也

韓愈

司馬遷相如董生楊雄劉向之徒尤所謂傑然者也

柳宗元

參之太史以著其潔

答韋中立書

又曰峻如馬遷

劉知幾

古者刊定一史纂成一家體統各殊指歸咸別史記則退處士而進姦雄漢書則飭忠臣而言主闕斯並曩賢得失之例良史是非之準作者言之詳矣

白居易

談之書遷能修之彪之書固能終之

皇甫湜

古史編年至漢史司馬遷始更其制而為紀傳相承至今無以移出太古之軌鑿無窮之門作為紀傳世家表志首尾具叙錄表裏相發明庶為得中以是無愧太初已來千有餘歲史臣接躅文人比踵卒不能有所改張奉而遵行傳以相授斯亦奇矣

鄭覃

唐太宗言司馬遷與任安書辭多怨懟故武帝本紀多失實鄭覃曰武帝中年大發兵事邊生人耗瘁府庫殫竭遷所述非過言鄭覃傳

殷侑

三史為書勸善懲惡亞於六經

高佑

元魏人

司馬遷班固皆博識大才論叙古今曲有條章

崔鴻

北史

談遷感漢德之盛痛諸史放絕乃鈐括舊書著成太史

續古記

按漢藝文志有馮商所續太史公七篇韋昭曰馮商受詔續太史公十餘篇在班彪別錄商字子高師古曰七略云商陽陵人治易事五鹿充宗後事劉向能屬文與孟柳俱待詔頗序列傳未卒病死

史記注

裴駰史記注

八十卷宋南中郎外兵參軍字龍駒河東人先是徐廣作

音義辨諸家異同駰乃集之

許子儒史記注

一百三十卷字文舉叔牙子也諡聖天官侍郎

王元感史記注

一百三十卷鄆城人爲時儒宗徐堅劉知幾薦之爲

宗賢館學士

陳伯宣史記注

一百三十卷今存八十七卷貞元中上

徐堅史記注

一百三十卷字元固唐集賢院學士齊肅之子議者以堅

父子如漢班氏

李鎮史記注

一百三十卷開元十七年上授門下曲儀

右史記注六家今學者所見者裴氏注而已茲用著見於此

先公史記注

一百三十卷

似孫叙曰經始乎仲尼終乎仲尼傳疏始乎王弼孔

安國鄭玄終乎顏師古孔穎達史始乎太史公終乎
太史公史注始乎崔駰司馬貞張守節終乎先公太
史然則孰爲始孰爲終哉言其始則前乎此孰可作
也言其終則後乎此孰可繼也嗚呼此其所以爲事
之極功之至者乎太史公述陶唐以來至于麟止自
黃帝始作本紀十二表書世家三十列傳七十爲篇
百三十爲字五十二萬六千五百爲太史公書先公
太史推本經傳旁羅百氏錯綜羣言凡五百萬言爲
太史公書注嗚呼繇典謨而知堯舜禹因誓誥而推
夏商周無非辛甲典商史也無非史佚典周史也史

無完史孰考孰稽太史公鑿天之初完古之闕成仲
屋之所俟涉獵貫穿馳騁古今數千載間前乎所未
有後乎所不得及此其所以成始成終乎先公太史
深憫夫自劉向楊雄僅稱遷有太史才班固之論昧
乎求備是豈知太史公萬分一者又悼夫司馬貞張
守節之傳此書者徃徃背本而從末疏古而略今亦
未足以表章太史公之志極意覃思盡力此書積功
二十年史注始成足以荅太史公之所望似孫不肖
獲承先人緒業唯念太史公執遷手泣曰予死毋忘
吾所論著爾其念哉遷俯首流涕曰小子不敏請悉

論先人所次舊聞不敢闕先公既絕筆乃悉整以論
正與太史公書並傳藏之名山副在京師以俟後聖
君子

史記雜傳

司馬貞史記索隱

三十卷貞以徐廣裴駰
鄒誕生劉伯莊音釋疎

外別加攷撫作
此書系以述贊

張守節正義

三十卷唐開元中諸王侍
讀采諸家訓釋為此書

劉伯莊史地名

二十卷

竇羣史記名臣疏

三十四卷

裴安時史記纂訓

二十卷字適之
大中江陵少府

李鎮史記義林

二十卷曾
注史記

右史記雜傳六家又有葛洪史記鈔十四卷擷其精
語者衛颯史要十卷約其要言以類相從者張瑩史
記正傳九卷蓋瑩所自作惟唐韓琬續史記一百三
十卷乃接史記以來事止於唐功亦偉矣

史記考

譙周古史考

二十五卷

史考蜀譙周所作周以司馬遷史記書周秦以上或
採俗語百家之言不專據正經於是作古史考十五
篇皆憑舊典以糾遷之謬誤晉司馬彪復以周爲未

盡善也條古史考中凡百二十二事為不當多據汲冢紀年之義亦行於世見司馬彪傳古書有周考七十六篇顏師古曰考周事也譙之書蓋取此周又著法訓八卷五教志五卷後為晉義陽亭侯考考中載呂不韋為秦子楚行千金貨於華陽夫人請立子楚為嗣及子楚立封不韋洛陽十萬戶號文信侯以詐獲爵故曰竊也其所紀往往如此

江南古本史記傳考

江南史記為唐舊本但存列傳而已其間有字誤者有字多者有字少者有脫百餘字者有一字之間義

致大不同者是為天下奇書初上蔡謝氏有錄本今略掇數字于以見古本之精妙也

伯夷傳

今本得孔子而益章

江南本曰得孔子而益章

管晏傳

管仲得用任於齊

江南本曰管仲得用任政於齊

老韓傳

君子得其人則駕不得其人則蓬

江南本人字並作時

莊子傳

申不害京人也

江南本曰荆人也

司馬穰苴傳

軍法期而後者云何

江南本曰期而後至

右江南本同異凡四千三百五十條
今略舉四五端一字之間意味固自
不同最如刺客傳云劍_目故不可拔
而江南本作劍_目豎尤為有旨劍豎安
得不可拔耶

史記音

徐廣音義

十二卷宋中散大夫字野氏東莞人劉伯莊曰徐中散音訓亦有訛說餘本異同故稱一本自是別記異文了非解釋史義而裴氏並引為注

稍似繁雜

許子儒音

三卷曾注史記

鄒誕生音

三卷梁人

劉伯莊音

二十卷

史略卷一

史略卷二

漢書

高

似孫

續古修

顏師古漢注史例

顏師古漢注所引書

漢書注

漢書考

漢書雜傳

漢書音義

漢書諸家本

後漢書

後漢書注

後漢書考

後漢書音

三國志

魏氏別史

魏志音

蜀別史

吳別史

晉書

唐御撰晉書

晉書注

晉書音

宋書

齊書

齊別史

梁書

陳書

後魏書

北齊書

後周書

隋書

唐修隋書

唐書

皇宋修唐書

唐書考

唐書音

薛居正五代史

歐陽脩五代史

五代史考

漢書

漢尚書郎班固譔固字孟堅扶風人初固作帝紀十
二表八志十傳七十固卒書頗散亡章帝詔其妹昭
與諸儒校輯於東觀八表天文志是其補成者也

班彪傳論

論曰班彪以通儒上才傾側危亂之間行不踰方言
不失正仕不急進貞不違人敷文華以緯國典守賤
薄而無悶容彼將以世運未弘非所謂賤焉耻乎何
其守道恬淡之篤也

班固爲蘭臺令史與前睢陽令陳宗長陵令尹敏司
隸從事孟異共成世祖本紀遷爲郎典校祕書固又
撰功臣平林新市公孫述事作列傳載記二十八篇
奏之帝乃復使終成前所著書固以爲漢紹堯運以
建帝業至於六世史臣乃追述功德私作本紀編於
百王之末廁於秦項之列太初以後闕而不錄故探
撰前紀綴集所聞以爲漢書起于高祖終於孝平王
莽之誅十有二世二百三十年綜其行事旁貫五經
上下洽通爲春秋考紀表志傳凡百篇固自永平中
始受詔潛精積思二十餘年至建初中乃成當世甚
重其書

東觀漢記

時人有上言班固私改作史記詔下京兆收繫固第
超詣闕上書具陳固不敢妄作但續人所記述漢事
司馬彪後漢書

班固字孟堅右扶風人幼有雋才學無常師善屬文
經傳無不究覽彪譔後漢書世不復見今錄其傳孟
堅者于此

張輔

司馬遷之著述辭約而事舉叙三千年事唯五十萬

言班固叙二百年事乃八十萬言煩省不同不如遷
一也良史述事善足以獎勸惡足以鑒誡人道之常
中流小事亦無取焉而班皆書之不如遷二也毀貶
朝錯傷忠臣之道不如遷三也遷既造創固又因循
難易益不同矣又遷爲蘇秦張儀范雎蔡澤作傳逞
辭流離亦足以明其大才故述辯士則藻辭華靡叙
實錄則隱核名檢此所以遷稱良史也

范曄

贊曰司馬遷班固父子其言史官載籍之作大義粲
然者矣議者咸稱二子有良史之才遷文直而事覈

固文贍而事詳若固之叙事不激詭不抑抗贍而不
穢詳而有體使讀之者豐豐而不厭信哉其能成名
也彪固譏遷以爲是非頗謬於聖人然其議論常排
死節否正直而不叙殺身成仁之爲美則輕仁義賤
守節愈矣固傷博物洽聞不能以智免極刑然亦身
陷大戮智及之而不能守之嗚呼人所以致論於目
睫也

顏師古漢書注例

漢書舊無注解唯服虔應劭等各爲音義自別施行
至典午中朝爰有晉灼集爲一部凡十四卷又顏以

意增益時辯前人當否號曰漢書集注屬永嘉喪亂
金行播遷此書雖存不至江左是以爰自東晉迄于
梁陳南方學者皆弗之見有臣瓚者莫知氏族考其
時代亦在晉初又摭集諸家音義稍以己之所見續
廁其末舉駁前說喜引竹書自謂甄明非無差爽凡
二十四卷分爲兩秩今之集解音義則是其書而後
人見者不知臣瓚所作乃謂之應劭等集解王氏七
志阮氏七錄並題云然斯不審耳學者又斟酌瓚姓
附著安施或云傳族既無明文未足取信蔡謨全取
臣瓚一部散入漢書自此以來始有注本但意浮功

淺不加隱括屬輯乖舛錯亂實多或乃離析本文隔
其辭句穿鑿妄起職此之由與未注之前大不同矣
謨亦有兩三處錯意然於學者竟無弘益

漢書舊文多有古字解說之後屢經遷易後人習讀
以意刊改傳寫既多彌更淺俗今則曲覈古本歸其
真正一往難識者皆從而釋之

古今異言方俗殊語末學膚受或未能通意有所疑
輒就增損流遯忘返穢濫實多今皆刪削克復其舊
諸列表位雖有科條文字繁多遂致舛雜前後失次
上下乖方昭穆參差名實虧廢今則尋文究例普更

刊正澄蕩愆違審定阡陌就其區域更爲局界非止
尋讀易曉庶令轉寫無疑

禮樂歌詩各依當時律呂脩短有節不可格以恒例
讀者茫昧無復識其斷章解者支離又乃錯其句韻
遂使一代文采空韞精奇累葉鑽求罕能通習今並
隨其曲折剖判義理歷然易曉更無疑滯可得諷誦
開心順耳允舊注是者則無間然具而存之以示不
隱其有指趣略舉結約未伸衍而通之使皆備悉至
於詭文僻見越理亂真匡而矯之以祛惑蔽若況說
非當蕪辭競逐苟出異端徒爲煩冗穢抵篇籍蓋無

初漢服虔等為音義又有晉灼臣瓚等說應劭亦為
集解而蔡謨復拊註之正觀中太子承乾命師古裒
集衆說師古叔游嘗譌漢書決疑乃因其舊而作今
注時號師古為班固忠臣師古名籍京兆人

荀悅

字仲預潁川之
人後漢秘書監

服虔

字子慎滎陽人後漢尚書侍郎高平令
九江太守初名重改名祗後定名虔

應劭

字仲淹一字仲遠汝南南
頓人後漢泰山太守

伏儼

字景宏
琅瑯人

劉德

北海人

鄭氏

晉灼音義序曰不知其名而臣瓚集
解輒云鄭德既無所據今依晉灼但

鄭氏景祐余靖校本云鄭氏舊傳晉

為鄭德令書

李斐

不詳所出郡縣

李奇

南陽人

鄧展

南陽人魏建安中為奮威將軍封高樂鄉侯

文穎

字叔良南陽人後漢末荊州從事魏建安中為甘陵府丞

張揖

字稚讓清河人一云河間人魏太和

中為博士止解司馬相如一傳最難注予嘗注此傳

所以止

蘇林

字孝友陳留外黃人魏給事中領秘書監

張晏

字子博中山人

如淳

馮翊人魏陳郡丞

孟康

字公休安平廣宗人魏散騎侍郎弘農太守散騎常侍中書令封廣陵亭侯

項昭

不詳何郡縣人

韋昭

字弘嗣吳郡雲陽人吳尚書郎太史令中書僕射封高陵亭侯

晉灼

河南人晉尚書郎

劉寶

字道真高平人晉中書郎御史中丞安北將軍侍皇太子講漢書別有駁義

臣瓚

師古曰不詳景祐余靖校本云臣瓚

姓韋稜續訓亦言未詳劉孝標類苑以為子瓚鄭元注水經以為薛瓚姚察訓

纂云案庾翼集干瓚為翼主簿兵曹參軍後為建威將軍晉中興書云翼病卒

而大將于瓚等作亂翼長史江劇誅之
于瓚乃是翼將不載有注解漢書然瓚
所采衆家音義自服虔孟康以外並因
晉亂湮滅不傳江左而高紀中瓚案茂
陵書文紀中案漢祿秩令此二書亦復
亡失不得過江明此瓚是晉中朝人未
喪亂之前故得具其先輩音義及茂陵
書漢令等耳蔡謨之江左以瓚二十四
卷散入漢書今之注也若謂爲于瓚乃
是東晉人年代前後了不相會此瓚非
于足可知矣又案穆天子傳曰錄云祕
書校書郎中傳瓚校今漢書音義臣瓚
所案多引漢書以駁衆家訓義此瓚疑
是傳瓚瓚時職典校書故稱臣也師古
又曰後人斟酌瓚姓附之傳
族耳既無明文未足取信

郭璞

字景純河東人晉弘農太守
止注相如傳序及遊獵詩序

蔡謨

字道明陳留考城人東晉侍中
五兵尚書贈司空謚文穆公

崔浩

字伯深清河人後魏侍中撫軍大將
軍封東郡公撰漢紀音義景祐校本

淵作伯

顏氏所注重複

顏氏所注評覈諸家最爲詳的然有無俟音詁失之
冗贅者字之初見既已加釋自此而下不必再舉矣
試掇其重複太甚者如鄉讀曰嚮解讀曰懈與讀曰
豫雍讀曰壅道讀曰導繇讀曰徭畜讀曰蓄視讀曰
示艾讀曰乂說讀曰悅竟讀曰境飭與勑同繇與由
同毆與驅同晦與暗同婁古婁字墜古地字饒古餉
字犇古奔字之類何啻百數皆過於複且重者又如

休者美也蕃者多也烈者業也稱者副也靡者無也
滋者益也圖者謀也耗者減也貸者假也卒者終也
悉者盡也給者足也寢者漸也以上字義初非深隱
何必重出往往再見於一板之內如此繁雜不可勝
載又如豁仇恢坐邾陝治脫攘藝亘綰顓擅酣倖重
禹俞選等字亦用切脚可以省矣又如項羽一傳伯
讀曰霸凡四言之若相國何相國參太尉勃太尉亞
夫丞相平丞相吉亦注為蕭何曹參三代必曰夏商
周威文顏閔必曰齊威晉文顏淵閔子騫讀是書者
要非童蒙豈不曉是哉顏氏叙例云至如常用可知

不涉疑昧者衆所共曉無煩翰墨殆反是矣志中尤
為叢脞以此知漢書注亦用修整一番乃佳

御詮定漢書 八十七卷

唐高宗與郝處俊等譔

漢書注

晉灼漢書集注 十三卷

敬播漢書注 四十卷

陸澄漢書注 一卷齊光錄大夫

右漢書注凡三家師古所引者晉灼而已

漢書考

劉寶漢書駁義 二卷晉安北將軍

姚察漢書定疑 二卷陳吏部尚書

顏游秦漢書決疑 十二卷

李喜漢書辨惑 三十卷

前漢考異一卷 失姓氏

漢書雜傳

姚察漢書訓纂 三十卷

姚察漢書集解 一卷

元懷景漢書議苑 開元右庶子謚曰文

姚珽漢書紹訓 四十卷

諸葛亮論前漢事 一卷

陸澄漢書新注 一卷

韋稜漢書續訓 一卷梁北平諮議參軍

順岱漢書叙傳 五卷

務靜漢書正義 三十卷唐僧

顏胤漢書集義 二十卷

沈遵漢書問答 五卷

漢疏四卷 梁有漢書晉九卷梁孝標注漢書一百四十卷陸澄注漢

書一百二卷梁元帝注漢書一百十五卷今云

右漢考五家雜傳十一家深稽而詳訂互有可攷古

之史出於一人之手尚有差謬以俟刊辨況後之爲史者耶

漢書音義

應劭音義 二十四卷

服虔音訓 一卷

韋昭音義 七卷

劉顯音 二卷宋潯陽太守

夏侯詠音 二卷

蕭該音義 十二卷國子博士

包愷音 十二卷廢太子
勇命包愷等

孟康音義 九卷

諸葛亮音 一卷

晉灼音 七卷

崔浩音 一卷

劉嗣音義 二十六卷

敬播音義 十二卷

孔文祥音義鈔 一卷

陰景倫律歷志音 一卷

劉伯莊音義 二十卷

右音義十六家師古所援引者五家如蕭該音義最

為精詳而師古遺之先儒頗謂師古於該議論矛盾故所不錄以是知書之遺落者蓋不止此而已其後於師古者固不論也

漢書諸家本

宋景文公祁參校凡用諸本

古本

顏師古未注以前本

唐本

張唐公家所得唐本

金坡遺字云

太祖平江南賜本院書二千卷

皆紙本和間妙東原榮氏私記云江南外氏先君丁在御府故流傳人間初江南本愛賞之無緣錯出參校遂以

薄紙分手抄錄及歸各寫於家幾年而後畢

舍人院本

江南本在舍人院亦曰舍人院本

淳化本

國朝會要曰淳化五年七月詔選官分校史記前後漢命陳充

阮思道尹少連趙况趙安仁孫何校前後漢校畢遣內侍裴愈賁本就杭

州鏤板

景德監本

國朝命刀所尾迺丁遜覆校

兩漢書板本迺知制誥以陳彭年同其事景德二年七月衍等上言漢

歷代名賢注釋至有章句不聞名氏交錯除無考據外博訪羣書徧觀諸

本校定凡三百四十卷以進

景祐刊誤本

景祐元年秘書丞余靖言國子監所印兩漢書文字

舛偽恐誤後學臣參稽衆本旁稽他書列而辨之望行刊正詔送翰林學士張觀等詳定聞奏又命國子監直講王洙與靖偕赴崇文館校書二年九月校書畢凡增七百四十一字損二百一十二字改正一千三百三十九字

又有我公本

今不詳何人

燕國本曹大家本

陽夏公本晏本郭本姚本浙本閩本其

外又有熙寧本

熙寧二年參知政事趙鼎進新校漢書五十冊

及陳繹所著是正文字七卷

宣和本

宣和六年國子監本

張集

賢本

張瓌得唐世本校

後漢書

宋太子詹事范曄曄字蔚宗順陽人元嘉中左遷宣城太守不得志乃剛衆家後漢書爲一家史紀十志十傳八十凡百篇

二

范曄既造後漢轉得統緒詳觀古今著述及評論殆少可意者班氏最有高名旣任情無例不可甲乙辨後贊於理近無所得唯志可推耳博瞻可不及之整理未必愧也吾雜傳論皆有精意深旨旣有裁味故約其辭句至於循吏以下及六夷諸序論筆勢縱放實天下之奇作其中合者往往不減過秦篇當異比

方班氏所作非但不愧之而已欲遍作諸志前漢所有者悉令備雖事不必多且使見文得盡又欲因事就卷內發論以正一代得失意復未果贊自是吾文之傑思殆無一字空設奇變不窮同合異體乃自不知所以稱之此書行故應有賞音者紀傳例爲舉其大略耳諸意甚多自古體大而思精未有此也

宋書傳

三

曄元嘉元年左遷宣城太守不得志乃刪衆家後漢書一家之作至於屈伸榮辱之際未嘗不刻意焉自序略曰吾少嬾學問年三十許始有向尔旣造後漢

轉得統緒詳觀古今著述及評論殆少可意者班氏最有高名旣任情無例唯志可推尔博瞻可不及之整理未必愧也吾雜傳論皆有精意深旨至於循吏以下及六夷諸序筆勢縱放實天下之奇作其中合者往往不減過秦篇嘗共比方班氏所作但不愧之而已贊自是吾文傑思殆無一字空設奇變不窮同合異體乃自不知所以稱之此書行故應有賞音者紀傳例爲舉其大略示諸細意甚多自古體大而思精未有此也恐世人不能盡知貴古見今所以稱情狂言爾范曄之傳其失尤多若薛宣之忠毅而槩之

以酷吏鄭眾之嚴明直諒而槩之以宦者蔡瑗忍耻妻胡槩之烈女王忭深仁厚義槩之蜀行若此之類眾矣南史

四

范曄在獄中與諸甥姪書曰吾既造後漢詳觀古今著述及評論殆少可意者班氏最有高名既任情無例不可甲乙唯志可推耳博瞻可不及之整理未必愧也吾雜傳論皆有精意深旨至於循吏以下及六夷諸序論筆勢縱放實天下之奇作其中合者往往不減過秦篇嘗共比方班氏所作非但不愧之而已

贊自是吾文之傑思殆無一字空設奇變不窮同合異體乃自不知所以稱之此書行故應有賞音者自古體大而思精未有此也曄之言張詡如此自謂可過班固觀其所著序論如鄧禹竇融馬援班超郭泰諸篇略其氣象然亦何能企固萬一耶

後漢書

謝承後漢書

一百三十卷又錄一卷無帝紀吳武陵太守

司馬彪續漢書

八十三卷晉祕書監字紹統高陽王睦之長子專精

學習傳覽羣籍以漢氏中身言二類安忠臣義士亦以昭著而時無良史記述煩雜譌周雖已刪除然猶未盡安順以下亡缺者多彪乃討論衆書綴其所聞

起於世祖終于孝獻編年二百錄世十
二通綜上下旁貫庶事九八十篇號曰
續漢書

劉義慶後漢書 五十八卷

華嶠後漢書 九十七篇唐得三十一卷晉
少卿字叔駿才學深博博聞

多識屬書典實
有良史之志

謝沉後漢書 一百二十二卷又外傳十卷
字行思晉祠部郎晉史曰沉

著後漢書才學在虞預之
右何充庾冰稱其有史才

薛瑩後漢書 一百卷晉
散騎常侍

袁山松後漢書 一百一卷又錄一卷晉祕
書監袁喬之子博學有文

章著後漢
書百篇

蕭子顯後漢書 一百卷梁本隋亡梁吏部
尚書為吳興太守字景陽

按後漢明帝詔班固陳宗尹敏孟冀撰世祖本紀及
建武功臣傳又詔劉珍李尤等撰建武以來至永初
紀傳又詔伏無忌黃景作諸王恩澤侯及單于西羌
地里志邊韶崔寔朱穆曹壽作皇后外戚傳百官表
順帝功臣傳凡百十四篇曰漢記嘉平中馬日磾蔡
邕楊劇盧植又續漢記至吳謝承作漢書司馬彪作
續漢書華嶠謝沉袁崧又作後漢書往往皆因漢記
之舊為之是固為有所據依而曄史又出於諸史之
後尤為有據依者乎

本朝劉放嘉祐八年奉詔與錢藻楊褒姜潜麻延年
李寔劉仲章刊正定漢書後二年皆遷他官唯放卒
業乃悉增損刊改及正定字畫集爲一書

二

謝承司馬彪薛瑩謝沉後漢書先儒最稱其精今是
書不復可見乃略采其精語一二謝承史云徐孺子
清妙高峙超世越俗司馬彪史云蔡伯喈通達有雋
才博學善屬文伎藝術數無不精練郭林宗麴約味
道不改其樂李元禮曰吾見士多矣無如林宗者也
及卒蔡伯喈爲作碑曰吾爲人作銘未嘗不有慙容

唯郭有道碑頌無愧耳薛瑩史云李元禮抗志清妙
有文武雋才又曰李膺王暢荀緄朱寓魏朗劉祐杜
楷趙典爲八俊謝沉史曰俊者卓出之名也諸人史
句如此可曰精矣

後漢書注

劉昭補注後漢書 三十卷

初范曄令謝儼譔後漢書志搜次垂畢會曄伏誅儼
悉蠟以覆車一代爲恨梁世劉昭得舊志乃補注爲
三十卷昭字宣卿平原人爲臨川王記室

唐章懷太子注

唐章懷太子賢招集一時學士右庶子張太安洗馬
劉訥言洛州司戶革希玄學士許叔牙或玄一史藏
諸周贊寧輩同爲注儀鳳中奏上

後漢書雜傳

王韶後漢林

二百卷

謝沉後漢書外傳

十卷

後漢考

劉放東漢刊誤

嘉祐七年

上讀後漢書見墾田字皆作懇字敕侍臣傳詔中書

使正之時劉放爲國子監直講奉詔與錢藻楊褒姜
潜麻延年李寔劉仲章分校後二年皆遷他官放獨
卒業放云此書自三館及民家無他好本率以己意
定之學者且疑其不然雖放亦未敢必

後漢書音

韋闡音

劉芳音

一卷後編本常

韋機音

二十七卷

臧兢音

三卷陳宗道先生

蕭該音

三卷

三國志

魏國志 三十卷

蜀國志 十五卷

吳國志 二十卷

晉太子庶子陳壽撰壽字承祚巴西人凡魏紀四傳四十吳傳二十蜀傳十五時人稱其善叙事宋文帝嫌其略命國子博士裴松之補注鳩集傳記增廣異聞輯為一書既成奏之上覽之曰裴世期為不朽矣松之字世期河東人陳壽撰魏吳蜀三國志凡六十五篇時人稱其善叙事有良史之才夏侯湛時著魏

書見壽所作便壞已書而罷張華深善之謂壽曰當以晉書相付耳或云丁儀丁廙有盛名於魏壽謂其子曰可覓千斛米見與當為尊公作佳傳丁不與之竟不為立傳壽父為馬謖參軍謖為諸葛亮所誅壽父亦坐被髡諸葛瞻又輕壽為亮立傳謂亮將略非長無應敵之才言瞻惟工書名過其實議者以此少之

二

尚書郎范頤表曰治書侍御史陳壽作三國志辭多勸誠明乎得失有益風化雖文豔不及相如而質過

之願垂採錄詔河南尹洛陽令就家寫其書壽又撰古國志五十篇益都耆舊傳十篇餘文章傳於世

三

崔浩之毛循之中國舊人雖學不博洽而猶涉獵書傳每與論說遂及陳壽三國志有古良史之風其所著述文義典正皆揚于王庭之言微而顯婉而成章班史以來無及壽者循之曰昔在蜀中聞長老言壽曾為諸葛門下書佐得捷百下故其論武侯云應變將略非其所長浩乃與論曰夫亮之相劉備當九州鼎沸之會英雄奮發之時君臣相得魚水為喻而不

能與曹氏爭天下委弃荊州退入巴蜀誘奪劉璋偽連孫氏守窮崎嶇之地僭號邊夷之間此策之下者可與趙它為偶而以為蕭曹亞匹不亦過乎謂壽貶亮非為失實

後魏書

四

自司馬氏史至五代史數千百年正統偏霸與夫僭竊亂賊甚哀至微之國雖如夷狄而史未有不書其國號者陳壽志三國乃獨不然劉備父子在蜀四十餘年始終號漢是豈可以蜀名哉其曰蜀者一時流俗之言耳壽乃黜正號而從流俗史之公法國之正

統輒皆失之則其所書尚可信乎且是時世稱備為蜀者猶五代稱李璟為吳稱劉崇為晉者耳今五代史作南唐東漢世家未嘗以吳晉稱史荊公曰五代之事不足書何足煩公三國可喜事甚多率壞於陳壽公其成之公雖深然未暇作也予遂作蜀漢書系蜀以漢尚庶幾乎

三國志

漢魏吳蜀舊事 八卷

魏氏別史

魏武本紀年歷 五卷

王沈魏書

四十八卷晉司空字彥伯高平人有俊才沈仕魏正元中遷散

騎常侍與荀顗阮籍共譏魏書多為時諱末若陳壽之實

魏氏

十二卷左將軍陰澹撰

魚豢魏略

五十卷

梁祚魏國統

二十卷

何氏論三國志

九卷常侍

魏末傳

二卷梁有魏大事隋亡

右魏氏別史五家蓋可與陳壽志參攷而互見者亦一時記載之雋也而魚豢典略特為有筆力

魏志音

盧宗道音 一卷

蜀別史

元魏李彪嘗言孔明在蜀不以史官留意今蜀史比魏吳獨略其在此乎

王隱刪補蜀記 七卷

吳別史

韋昭吳書 五十五卷殘缺

吳書實錄 三卷

環濟吳紀 十卷晉太學博士

胡冲吳曆 六卷

張勃吳錄 三十卷

魏吳雜史大段環綴掇其數辭足以知諸公辭藻之

競秀者魚豢魏略云李安國豐識別人物海內注意明帝得吾降人問江東聞中國名士為誰以安國對之云許士宗允少與清河崔贊俱發名於冀州又云阮德如係有俊才而飾以名理風儀雅潤與嵇康為友又云荀文若或為人英偉折節待士坐不累席其在臺閣間不以私欲撓意韋昭吳書云諸葛瑾避亂渡江大皇帝取為長史遣使蜀但與弟亮公會相見退無私面而又有容貌思度時人服其弘量環濟吳記云金子黃琮有德行義槩又曰張子布昭忠正有才義張勃吳錄云陸凱忠鯁有大節篤志好學又

曰孫策少有雄姿風氣然方是時士葵乎用史隳乎
守幾於國異政家殊俗矣若秦而下各書一時之事
豈無俟於後人者嗟夫

晉書

王隱晉書

九十三卷隱及郭璞俱為著作郎撰晉史時著作郎虞預私撰晉書而生長東南不知中朝事數訪於隱并借隱所著書竊寫之所聞漸廣家貧無資用乃依征西將軍庾亮於武昌供其紙筆書乃得成詣闕上之隱雖好著述而文辭鄙拙蕪舛不倫其書次第可觀者皆其父所撰也

謝沉晉書

三十卷

虞預晉書

五十八卷晉散騎常侍字叔寧史云著晉書四十餘卷行于世

朱鳳晉書

十四卷未成訖元帝晉中書郎

謝承晉書

三十六卷又錄一卷宋臨川內史

臧榮緒晉書

一百一十卷齊信州主簿

蕭子雲晉書

一百二卷殘缺

于寶晉書

十二卷殘缺

沈約晉書

一百一十卷梁尚書僕射字休文吳興人

鄭忠晉書

七卷

右晉人及宋齊人所撰晉書共十家晉之事詳且精

矣又有何法盛

宋河東太守

撰晉中興書七十八卷

起東

事有可稽辭有可述則知唐太宗詔羣臣所撰如之

何其不該且覈而妙於辭製哉徐堅亦曾撰晉書一百十卷

王隱晉書語

元凱智謀淵博明於治亂常稱立德者非所企及立功立言所庶幾也每有大事輒在將帥之限王戎少清明曉悟

祖士言最治行操能清言

祖納

嵇延祖有奇才雋辯

嵇紹

謝沉晉書語

竇武劉淑陳蕃少有高操海內尊而稱之

虞預晉書語

荀公曾十餘歲能屬文外祖鍾繇曰此兒當及其曾祖

嵇山季倫平雅有父風

和嶠厚自封植嶷然不羣

刁協多所博涉中興制度皆稟於協

溫嶠少標俊清徹英穎

沈約晉書語

周顗王敦素憚之見輒面執雖復臘月亦扇面不休其憚如此

朱鳳晉書語

元帝數字景文少而明惠因亂過江起義遂即位謚
法曰始建國都曰元叙事甚簡淨

臧榮緒晉書語

謝叔源善屬文

張孟陽有才華

王正長博學有雋才

石季倫早有智慧

左太冲博覽文史

阮嗣宗容貌瓌傑志氣閑放

晉安帝紀語

江仲凱以義正器素知名當世

江散

戴安道少有清操惟甚快暢泰於娛生多與風流者
游翼辭徵命遂著高尚之稱

羲之風骨清舉

右王隱謝沈虞預沈約朱鳳晉書世不可見各錄其
瓌精一二于前斯足以表諸公才之雋筆之英矣晉
安帝紀中句亦甚美併錄之

唐御撰晉書一百三十卷

初晉史十八家太宗以爲未善詔令再撰房玄齡與
褚遂良許敬宗奉詔增損以臧榮緒舊書爲本文又撫

採諸家傳記而益附之爰及晉代文集罔不畢舉命
來濟陸元仕劉子翼李淳風李義府薛元超上官儀
崔行功辛丘馭劉引之陽仁卿李延壽張文恭分撰
令狐德棻敬播李安期李懷儼趙汝智考正類例作
紀十志二十列傳七十載記三十合百三十卷史之
凡例多出於令狐德棻敬播天文律曆則李淳風專
之太宗所著宣武二帝陸機王羲之四論皆稱制焉

晉書注

高希喬注

一百三十卷開元二
十年上清池主簿

晉書音

何超音

三卷唐勳士

宋書

徐爰宋書

六十五卷宋
中散大夫

孫巖宋書

六十五卷齊冠
軍錄事參軍

沈約宋書

一百卷

右宋代史所傳者沈約為最姚察

陳吏部尚書

稱其高才

博洽名亞遷董蓋一代之英偉焉按齊永明中沈約
奉詔撰為記十志九傳六十合百卷本何承天舊書
採山謙之徐爰蘇寶生諸說號為博洽而志乃兼述
魏晉論者以為失於限斷崇文總目闕趙倫之傳一

卷八本有之而到彦之傳卷末殘缺又有王智深梁人著宋書六十一卷亦殘缺

齊書

蕭子顯齊書

六十卷梁人詳見後漢書

劉陟齊書

十三卷

齊別史

沈約齊紀

二十卷

劉陟齊紀

十三卷

江淹齊史

十三卷

王劭齊志

後齊事

吳兢齊史

十卷

初江淹已筆齊史爲十志沈約又著齊紀而子顯自表武帝別爲此書沈約嘗稱其得明道之高致蓋幽通之流也子顯更採後漢考正同異爲一家書又吳均欲撰齊書求借齊起居注及羣臣行狀武帝不許遂私撰奏之稱帝爲齊明帝佐命帝惡其書不實使中書舍人劉之遴詰問數十條竟支離無對勅付省焚之坐免職

本朝曾鞏趙若孫覺尹洙蘇洵諸公校正館書嘗論齊史謂子顯之於斯文喜自馳騁其更改破析刻瑣

藻續之變不多而其文益下豈夫材固不可強而有
耶然其表曰素不知戶口故州郡志輒不載天文復
秘故不私載而此志但紀災祥而已按本傳為齊書
六十卷今但五十九卷

梁書

謝吳梁書

四十九卷梁中書郎

姚思廉梁書

五十六卷唐弘文館學士
思廉名簡以字行萬年入

梁別史

陰僧仁梁撮要

二十卷陳
征南諮議

許亨梁史

五十三卷陳領
軍大著作郎

梁太清錄

八卷

梁末代紀

一卷

梁二典

附史典彙

梁後略

附史典彙

梁紀

附紀彙

吳兢梁史

十卷

初太宗詔秘書監竇璡歐陽詢姚思廉共撰梁史思
廉父察仕陳太建中嘗修梁陳史未就思廉因父書
又採謝吳舊史裁成之其總論出於魏徵

陳書

陸瓊陳書

四十二卷陳吏部尚書

傅綽陳書

三卷

顧野王陳書

三卷

吳兢陳史

五卷

思廉采謝炅顧野王等諸家言推究總括為梁陳二

家史同上

後魏書

魏收後魏書

一百三十卷後齊僕射字伯起鉅鹿人三國典略曰齊主

以魏收之卒命中書監陽休之裁正其所撰魏書休之以收叙其家事稍美且寡才學淹延歲時竟不措手唯削去嫡庶一百餘字

魏澹後魏書

一百七卷隋著作郎

張太素後魏書

一百卷今惟有天文志二卷

裴安時元魏書

三十卷

初令狐德棻建言近代無正史梁陳齊文籍猶可據至周隋事多脫損今耳目尚相及史有所憑一易世事皆汨暗無所綴緝陛下受禪于隋隋承周二祖功業多在周今不論次各為一王史則先烈世庸不光明後無傳焉帝謂然詔中書令蕭瑀給事中王敬業著作郎殷聞禮主魏議者以魏有魏收魏澹二家為已訖乃輟按天保中收奉詔采拾遺缺綴續舊事作

紀十志十傳九十二表上悉焚崔浩李彪等舊書收
黨齊毀魏褒貶肆情時以為穢史獨楊愔等助之故
其書漸行隋文帝以其不實詔魏澹更作收史闕紀
二卷傳二十二卷太宗紀則補以魏澹所作靜帝紀
則補以高峻小史

北齊書

李德林北齊書

二十四卷修未成百藥之父也

張太素北齊書

三十卷

李百藥北齊書

五十卷唐中書舍人字重規定州人

太宗詔李百藥次齊史唐史臣稱百藥翰藻沉鬱所

撰齊史行於時按百藥父德林先在齊已作紀傳百
藥乃因其舊又避唐諱易其文議者非之

後周書

牛弘周史

十八卷未成陳吏部尚書

令狐德棻後周書

五十卷唐秘書丞宜州人

吳兢周史

十卷

德棻言周隋事多脫漏乃命德棻與秘書郎岑文本
殿中侍御史崔仁師次周史是時預秉者十有八人
德棻為先進故類例多所評定初周柳虬隋牛弘各
嘗論次率多抵牾德棻奉詔與陳叔達庾儉同加修

纂歷年至是復詔與文本仁師撰成玄齡等既上五代史太宗勞之曰朕觀前代史書彰善癉惡足為將來之誡秦始皇奢淫無度焚書坑儒用絨談者之口隋煬帝雖好文儒尤疾學者前世史籍竟無所成數代之事殆將泯絕朕意則不然將欲覽前王之得失為在身之龜鏡公輩以數年之間勒成五代之史副朕深懷極可嘉尚

隋書

張太素隋書 三十卷

王劭隋書

六十卷未成祕書監劭所著隋書多採迂怪不經之語辭義繁

雜述使隋惡之
迹埋滅無聞

隋志 二十卷

吳兢隋史 二十卷

唐修隋書 一百十五卷

唐正觀中詔諸臣分修五代史顏師古孔穎達撰次隋事起文帝作三紀五十列傳惟十志未奏又詔于志寧李淳風韋安化李延壽令狐德棻共加裒綴高宗時上之志乃上包梁陳齊周參以隋事析為三十篇號五代志與書合八十五篇按隋志極有倫類而本末兼明進晉志可以無憾遷固以來皆不及也正

以班馬只尚虛言多遺故實所以三代紀綱至八書
十志幾於絕緒隋志獨該五代南北兩朝紛然殽亂
未易貫穿之事讀其書則了然如在目良由當時區
處各當其才顏孔通古今而不明天文地里之學故
但修紀傳而以十志專之志寧淳風頌不當哉

唐書

吳兢唐書

一百卷浚儀人兢私撰唐書唐
春秋未就丐官筆札詔兢赴館
撰錄坐書自貶荆州司馬以史草自隨
蕭高領國史遣使就取書得六十餘篇
敘事簡核號良史肅宗詔柳芳與韋述
綴輯吳兢所次國史會述死芳緒成之
與高祖訖乾元九百三十篇
叙史實事不倫史官病之

韋述唐書

一百三十卷初令狐德棻奏
述因一家參以後事遂分紀傳又爲例
一篇述掌國史餘四十年任史官二十
年韋述機之孫也史稱其史才博識蕭
穎士稱其文約事詳譙周陳壽之流

李翱答皇甫湜書曰近寫得唐書史官才薄言詞鄙
淺不足以發揚高祖太宗列聖明德使後之觀者文
彩不及周漢之書僕以爲西漢十一帝高祖布衣定
天下豁達大度東漢所不及其餘唯文宣二帝爲優
自惠景以下亦不皆明於東漢明章兩帝而前漢事
跡灼然傳在人口者以司馬遷班固叙述高簡之工
故學者悅而習焉其讀之詳也足下讀范曄漢書陳

壽三國志王隱晉書生熟何如左丘明司馬遷班固
書之溫習哉故溫習者事跡彰而罕讀者事跡晦讀
之疎數在詞之高下理必然也唐有天下聖明繼於
周漢而史官叙事曾不如范曄陳壽所爲况足擬望
左丘明司馬遷班固之文哉

韓愈答劉秀才書曰唐有天下二百年矣聖君賢相
相踵其餘文武之士立功名跨越前後者不可勝數
豈一人卒能紀而傳之哉僕年志已衰退不可自爲
嗚呼以愈而有是言况他人乎

劉昫唐書

二百卷昫
涿郡人

按後唐起居郎賈緯言唐高宗至代宗已有紀傳德
宗至濟陰廢帝凡六代唯有武宗實錄餘皆闕略今
採訪遺文及耆舊傳說編成六十五卷目曰唐朝補
遺錄以備將來史官修述至開運二年史館上新修
前朝李氏紀志列傳共五百二十卷賜監修宰臣劉
昫史官張昭遠直館王仲等繒綵銀器有差又按歐
陽脩五代史劉昫傳只載明宗時爲監修國史殊不
及唐史之績蓋昭遠輩所成也

歐陽脩等唐書

二百二
十五卷

慶曆五年詔王堯臣張方平等

翰林
學士

刊修唐書皇祐

元年以宋祁

翰林侍讀

為刊修至和元年又命歐陽脩

宋祁刊修

龍圖閣學士

乃撰紀十志五十表十五傳百五

十嘉祐五年提舉宰臣曾公亮上之公亮曰唐有天

下幾三百年其君臣行事之始終所以治亂興衰之

跡與其典章制度之美宜其粲然著在方冊而紀次

無法乃詔脩等討論刪定事則增於前文則省於舊

其屬則范鎮

知制誥

王疇

知制誥

宋敏求

集賢校理

呂夏卿

祕書丞

劉義叟此蓋預進書者又有楊察趙鼎余靖亦與

焉脩嘗言唐自武宗以下並無實錄西京內中省寺

諸司御史臺及鑾和諸庫有唐至五代以來奏續案

簿尚存欲差呂夏卿就彼檢尋從之足以見討論之
至矣祁雖作百五十傳亦曾自作紀志今宋氏後居
華亭者有其書

唐書考

音附

呂夏卿直筆新例

一卷夏卿預修新書摘其繁冗闕誤仍叙新例

溫陵人

吳縝糾繆

二十卷摘舉新書舛繆元祐間知萬州

唐書注

李繪唐書補注

二百二十五卷繪宣和中進士以舊書參新書為之注

唐書音

董氏唐書音 二十五卷

五代史

薛居正等五代史 一百五十卷

開寶四年詔薛居正盧多遜等修五代史七年閏月甲子書成凡一百五十卷而扈蒙張澹李昉劉兼李穆李九齡皆與修其書以建康實錄爲準景祐三年七月集賢院學士知同州胡冲上所撰五代史七十卷又一書也

歐陽脩五代史 七十四卷

五代新史紀十二傳四十五考三世家年譜十有一

四英附錄三卷七十四卷

歐公曰本紀因舊以爲名即位以前其事詳原其所自來故曲而避之見其起之有漸有暴也即位以後其事略居尊任重所責者大故所書簡惟簡乃可立法陳師錫序曰五代距今百有餘年故老遺俗往往世絕其說者秉筆之士文采不足以耀無窮歐陽公以此自任其事迹實詳於舊記而褒貶義例仰師春秋至於論朋黨官女忠孝兩全義士降服豈小補哉歐公旣沒始詔其家上之

神宗常問歐陽脩所爲五代史如何王安石曰臣方

讀數冊其文辭多不合義理

上曰責以義理則脩止於此每卷後論說皆稱

二

徐無黨注歐公五代史其言曰凡諸國名號梁本紀自封梁王以後始稱梁唐本紀自封晉王以後始稱晉唐自建國號唐以後始稱唐各從其實也自傳而下於未封王建國之前或稱梁稱晉稱唐者史官從後而追書也唐嘗稱晉而石敬瑭又稱晉李昇又稱唐劉龔已稱漢而劉旻又稱漢劉涉據廣州亦稱漢劉崇據太原又稱後漢王建已稱蜀而孟知祥又稱

蜀石晉自為一代不待別而可知唐漢蜀則如東南前後以別其世家梁初嘗封沛東平南唐初嘗稱齊三號當時已不顯著故皆略而不道五代亂世名號交雜而不常史家撰述隨事為文要於理通事見而已覽者得以詳焉

五代史別史

五代史樞要

十卷歐陽顥撰

五代史補

五卷陶岳撰

五代史闕文

一卷王禹偁撰

梁列傳十五卷

後唐列傳三十卷並張昭遠撰

五代史考


五代史纂誤

吳縝錄歐陽公新史抵牾語凡二百餘字

史略卷二





文仁堂子





内閣文庫			
番 號	漢	9269	
冊 數		2 (2)
函 號	圖	2	4

内閣文庫			
元	九	二六九	
函	女	=	九
架	冊	號	類



原本の文字など不明瞭な個所があります。





史略卷三



高

似孫

續古修



東觀漢記

歷代春秋

歷代紀

實錄

起居注

唐左右螭坳書事

延英殿時政

時政記



唐曆

會要

玉牒

東觀漢記

東觀漢記百四十三卷起光武記注至靈帝長水校尉劉珍等撰按後漢書文苑傳劉珍字秋卿永初中鄧太后詔使典校書劉騶駼馬融及五經博士校定東觀五經諸子傳記百家藝術整齊脫誤是正文字永寧元年太后又詔珍與劉騶駼作建武以來名臣傳李尤字伯仁安帝時受詔與謁者僕射劉珍等俱

撰漢記又按顯宗起居注明德皇后自譔漢之后宮好文通史有如此者其後有後漢記一百卷晉散騎常侍薛瑩所撰當本諸此永元十三年正月丁丑和帝幸東觀覽書林閱篇籍博選藝術之士充其官洛陽宮殿名曰南宮有東觀永初中學者稱東觀爲老氏藏室道家蓬萊山太僕鄧康薦竇章入東觀靈帝詔圖高武象於東觀

入東觀人

劉珍

劉騶駼

馬融

蔡邕

張衡

曹褒

黃香

李尤

楊彪

馬日磾

盧植

劉知幾曰後漢東觀大集羣儒而著述無主條章靡立伯度譏其不實公理以爲可焚張蔡二子糾之於當代傳范二家強之於後葉

漢記中鄧禹傳

序曰賢駿思聖主風雲從龍武自然之應也鄧禹以弱冠睹廢興之地羸粮筴馬以追世祖遂信竹帛之願建社稷之謀襲蕭何之爵位可謂材難矣受命之初躬率六師中興治定勒號泰山聖上繼體立師傅位三公功德之極而禹兼之易稱利見大人詩有自求多福其禹之謂與

漢記中吳漢傳

序曰自古異代之忠其詳不可得聞也已近觀大漢高祖世祖受命之會建功垂名之忠察其屈伸固非鄉舉里選所能拔也吳漢起鄉亭由逆旅假階韓鴻發策彭寵然後遇乎聖王把旄杖鉞佐平諸夏東征海隅北臨塞漠西踰隴山南平巴蜀遂斬公孫述延岑劉永董憲之首斯其跨制州域竊號帝王章草可數者燦起糜沸之徒其所洒掃衆矣天下既定將帥論功吳公爲不覽其戰剋行事無知名無勇功令合

於孫吳何者建武之行師計出於主心勝決廟堂將帥咸承璽書倚威靈以治剋亂以智取愚其勢然也及漢持盈守位勞謙小心懼以終始勒功帝佐同名上古盛矣哉

右劉知幾大譏漢記述前人之言以爲可焚可唾其對蕭至忠有曰古之國史皆出一家未嘗藉功于衆惟漢東觀集羣儒纂述人人自爲政駿其言盡之矣今姑錄二序于前夫張衡蔡邕豈不以辭筆自騁而所序者如此是可與班馬抗歟

歷代春秋

戰國春秋 二十卷

趙曄吳越春秋

十二卷又有楊方吳越春秋前纂五卷皇甫遵吳越

春秋傳十卷

陸賈楚漢春秋

九卷

司馬彪九州春秋

十卷記漢末事又有九州春秋抄一卷劉孝標注

袁曄漢獻帝春秋

十卷

孔衍漢春秋

十卷

孔衍後漢春秋

六卷

孔舒元漢魏春秋

九卷

孫盛魏氏春秋

二十卷又有魏陽秋異同八卷陳壽撰

負半千三國春秋三十卷

崔良輔三國春秋

卷亡深州安平人日用從子居白鹿山門人謚

文曰貞

習鑿齒漢晉陽秋

晉滎陽太守字彥威襄陽人博學洽聞以文筆著

孫盛晉陽秋

三十二卷訖哀帝盛著魏氏春秋晉陽秋詞直而理正咸稱良

史焉字安國太原人

檀道鸞續晉陽秋

二十卷宋永嘉太守

王韶之晉陽秋

韶之琅耶臨沂人也私撰晉陽秋成時人謂之宜居

史職即除著作郎使續後事訖義熙九年善叙事辭論可觀為後世佳史

杜延篤晉春秋略

二十卷唐人

王琰宋春秋

二十卷梁吳興令

鮑衡卿宋春秋

二十卷

吳均齊春秋

三十卷

臧嚴栖鳳春秋

五卷

具兢唐春秋

二十卷

韋述唐春秋

二十卷

陸長源唐春秋

六十卷

尹洙五代春秋

二卷

崔鴻三十國春秋

百二十卷魏人

十六國春秋略

二卷

蕭方三十國春秋

三十卷漢中元建安訖
晉元熙九一百五十六

年以晉為主包具孫劉元海等三十國事又有三十國春秋鈔二卷

包胥河洛春秋

安祿山史
思明事

武敏之三十國春秋一百卷

太史公作史記最采楚漢春秋意其論著瓌傑弘演
必有以合乎軌轍者今得楚漢春秋讀之不見其奇
試以一二言之其一曰沛公閉函谷關無內項王項
王大將亞父至關不得入怒曰沛公欲反即令家發
薪策欲燒關關門乃開其一曰項王在鴻門亞父諫
曰吾使人望沛公其氣衝天五色相糾或似雲或似

龍或似人此非人臣之象也不若殺之其一曰上南
攻宛匿旌旗人銜枚馬束舌雞未明已圍宛城三匝
其一曰上過陳留酈生求見使者入通方洗足問如
何人曰狀類大儒上曰吾方以天下爲事未暇見大
儒也使使者出告酈生瞋目按劍入言高陽酒徒非大
儒也楚漢春秋所載僅如此太史公所采亦以漢初
之事未有記載故有取於此乎至習鑿齒孫盛檀道
鸞作魏晉春秋意義闕達辭采清雋斯亦一代之奇
者桓溫見盛春秋怒謂盛子曰枋頭誠爲失利何至
乃如尊君所說其子遽拜請刪定諸子號泣請爲百

口計盛怒不許諸子自改定之盛乃書兩本寄於慕容雋泰元中孝武帝博求異聞殆於遼東得之以相參校多有不同時溫既覲覲非望鑿齒著漢晉春秋以裁正之起光武終於晉愍帝三國之時蜀以宗室為正魏武雖受漢禪尚為篡逆文帝平蜀乃漢言而晉始興焉二子之作嚴且正矣善乎唐史臣之言曰丘明既歿班馬迭興自斯以降分明競爽此之謂乎陽秋者避晉太后家諱故曰陽秋

歷代紀

荀悅漢紀

三十卷後漢獻帝好典籍常以班固漢書文繁難省乃令悅依

左氏傳體為漢紀三十篇辭約事詳論辨多美其序云立典有五志焉一曰達道義二曰法章式三曰通古今四曰著功勳五曰表賢能於是天人之際事物之宜粲然顯著罔不備矣漢四百有六載撥亂反正統武興文永惟祖宗之洪業思光啓乎萬嗣聖上穆然惟文之恤瞻前顧後是紹是繼闡崇大猷命立國典於是綴叙舊書以述漢紀中興以前明主賢臣得失之執亦足以觀矣荀悅應劭注荀悅漢紀三十卷唐李太亮為涼州都督表諫求鷹太宗報書賜荀悅漢紀曰悅論議深博極為政之體公其繹味之

袁宏後漢紀

三十卷字彥伯自吏部郎為東陽太守有逸才文章絕美

張璠後漢紀

三十卷

劉歆漢靈獻二帝紀

六卷

琅濟吳紀

十卷晉太學博士

陸機晉紀

四卷字士衡晉平原內史天才秀逆辭藻宏麗葛洪稱其文宏

麗妍贈英銳漂逸亦一代之絕乎

鄧粲晉紀

十一卷訖明帝晉荆州別駕其傳云著元明紀十篇晉史曰鄧

粲謝沉祖述前史司辭異義罕見稱焉

于寶晉紀

二十卷自宣帝訖愍帝五十三

史于寶著晉論二千七百一十有七言載於晉史者一千八百八十有五言載

於通鑑者七百二十有四言可以為史夷煩亂翦截浮辭之法

曹嘉之晉紀

十卷晉前軍諮議

劉璨晉紀

世說注

劉謙之晉紀

二十五卷宋中散大夫

王韶之晉紀

十卷宋吳興太守字休泰琅瑯人善敘事辭論可觀為後

代佳史

徐廣晉紀

四十五卷宋中散大夫侍中選

數術無不研究尚書奏有造中興記者煥乎史策宜勅著作郎徐廣撰成國史

於是廣勒成晉紀凡四十六卷表上之

郭彥產續晉紀

五卷宋新興太守

王智深宋紀

三十卷

沈約齊紀

十卷

蕭韶梁太清紀

十卷梁長沙王

梁末代紀一卷

梁帝紀七卷

梁皇帝紀七卷

盧彥卿後魏紀三十卷

崔彥發北齊紀三十卷

陳彭年唐紀四十卷
本朝人

皇甫湜謂荀氏漢紀強欲復古以爲編年然其善語嘉話細事詳政多所遺矣予以爲不然此書專爲正史繁博而作辭約則事必省事省則史必精編年之體難乎其詳且細矣王通氏曰荀悅史乎是蓋知悅

者矣而杜預尤爲善言史者有謂史之舊章從而修之故曰約史記而修春秋殆此意歟自悅而後紀凡二十有一家往往取則於荀氏如陸機鄧粲徐廣沈約數家殊爲精覈而家家有史人人載筆難乎其考矣隋史氏以爲史官廢絕久矣魏晉以來其道愈替南董之位以祿貴遜正駿之司罕因才授故梁世諺曰上車不落則著作體中何如則祕書尸素之儔盱衡延閣之上立言之士揮翰蓬茨之下一代之記至數十家傳說不同聞見舛駁此之謂歟

張璠漢紀曰范孟博

滂

為功曹辟公府掾升車攬轡

有澄清天下之志百城聞滂高名皆解印綬去又曰

不畏強禦陳仲舉天下模楷李元禮鄧粲晉紀曰劉

子驥

驥之少

尚質素虛退寡欲好遊山澤志尚遁逸

又曰王平子

澄

放曠不拘時謂之達又曰王處仲性

簡脫口不言財其操尚如此又曰王導協贊中興敦

有方面之功又曰裴遐以辯論為業善叙名理辭氣

清暢冷然若琴瑟

按晉諸公贊遐字叔道河東人少

有理稱辟散騎郎又按永嘉流人

名王夷甫以第四女適之

曹嘉之晉紀曰荀勗為中書監令尚同

車至和嶠為令而勗為監嶠意強抗專車而坐乃使

監令異車自此始劉謙之晉紀曰王獻之性其整峻

不交非類又曰桓玄欲復武貴中郎將疑應直與不

訪之僚佐咸莫能定參軍劉簡之對曰潘岳秋興賦

序云余兼武貴中郎將寓直于散騎之省以此言之

是應直也玄歡然從之徐廣晉紀曰劉遵祖

爰之少

有才學能言理又曰殷浩清言妙辯玄致當時名流

皆為其美譽又曰凡稱風流者皆舉王劉為宗焉

劉真

長王仲祖

庾道季

蘇

太尉亮子也風情率悟以文談致稱

於時又曰王導阿衡之世經綸夷儉政務寬恕事從
簡易故垂遺愛之譽以上諸史學者所未見故為槩

舉一二庶知其筆墨焉

實錄

六朝實錄

梁實錄

梁皇帝實錄

周興嗣撰

梁皇帝實錄

謝昊撰

梁太清實錄

唐實錄

唐六典曰史官掌修國史凡天地日月之祥山川封域之分昭穆繼代之

序禮樂師旅之事誅賞興廢之政皆本於起居注以爲實錄

高祖實錄

許敬宗敬播撰謨緒遂良讀之於前太宗感動流涕

太宗實錄

元曰今上實錄敬播顏胤撰

貞觀實錄

長孫無忌撰

高宗實錄

許敬宗撰

高宗後實錄

初令狐德棻撰乾封中劉知幾吳兢續成此再修者也又

有韋述所撰三十卷武后所撰一百卷

則天實錄

魏元忠武三思祝欽明徐彦伯柳冲章承慶崔融岑羲徐堅劉

知幾吳兢刪正又有宗秦客聖母神皇實錄

中宗實錄

吳兢撰

太上皇實錄

劉知幾撰

睿宗實錄

吳兢撰

今上實錄

張說唐穎撰次開元初事

開元實錄

失撰人名

玄宗實錄

今狐垣撰

肅宗實錄

元載監修

代宗實錄

令狐垣撰

建中實錄

沈既濟撰

德宗實錄

蔣又樊綽林寶撰厚獨孤郁撰

順宗實錄

韓愈沈傳師撰字文籍撰

憲宗實錄

沈傳師鄭澣撰李漢陳夷行蘇景胤撰

穆宗實錄

蘇景胤撰漢公蘇滌裴休撰

敬宗實錄

陳商鄭亞撰

文宗實錄

盧耽蔣偕王風盧告牛叢撰三世修史世稱良筆其父又有史才

武宗實錄

辛保衡撰

五代實錄

梁太祖實錄三十卷

梁郁象等撰

後唐獻祖紀年錄二卷

後唐懿祖紀年錄一卷

後唐太祖紀年錄十七卷

後唐莊宗實錄三十卷

後唐趙鳳張昭遠等撰獻祖懿祖太

祖為紀年莊宗為實錄

後唐明宗實錄三十卷

姚顗等撰

後唐廢帝實錄十七卷

皇朝張昭劉溫撰

後唐愍帝實錄三卷

張昭等撰

晉高祖實錄三十卷

漢賈縡等撰

晉少帝實錄二十卷

賈正固等撰

漢高祖實錄二十卷

漢蘇逢吉等撰

賈縡乾祐中受詔與王仲寶嚴脩晉高祖少帝漢高祖三朝實錄縡以筆削爲已任然而褒貶任情記注不實晉宰相桑維翰執政嘗薄縡之爲人不甚見禮縡深嗾之及叙維翰傳稱維翰身沒之後有白金八

千錠他物稱是翰林學士徐台符縡邑人也與縡相善謂縡曰聞吾友書桑魏公白金之數不亦多乎乃改爲白金數千錠書法如此他可知矣

漢隱帝實錄十五卷

張昭等撰

周太祖實錄三十卷

張昭劉溫史撰

周世宗實錄四十卷

皇朝王溥等撰

實錄之作史之基也史之所錄非藉此無所措其筆削矣今孤垣修宋實錄號爲著述其精喪亂之餘實錄散失纂開元天寶間事唯得諸家文集編其詔冊名臣傳記十無三四後人以漏略稱之初至德二

年史官于休烈等奏自經賊火國史實錄並無其本
合詔府縣搜訪重加購賞數月唯得書一二百卷前
史官韋述家藏國史一百十三卷乃以送官又僅若
此歐陽公宋景文公受詔分撰唐史一時有請以為
唐自武宗後並無實錄何所攷訂則實錄有補於史
可知矣又如柳玘以下十五人分修宣宗懿宗僖宗
實錄踰年不能編錄一字是非難乎歐公作五代新
史往往多據建康實錄耳

先公預修

神宗

哲宗

徽宗

欽宗四朝史

高宗實錄其史冊散逸記載踈略尤有甚於令狐峘
之時分修志四傳五十實錄十年而訪搜訂載略不
少恨其有分秦檜傳者筆不得下今檜傳僅數葉而
已似孫乃為纂修檜傳極為精覈史館移牒取索不
欲錄報也

二

顯慶中高宗以許敬宗譔太宗實錄所紀多非實謂

劉仁軌曰朕觀國史所書多不周悉卿等必須窮微
索隱原始要終盛業鴻勳咸使詳備憲宗徧讀列聖
實錄見貞觀開元故事竦慕不能釋卷謂宰臣曰太
宗之創業如此玄宗之致理如此我讀國史始知萬
倍不如焉文宗嘗曰順宗實錄似未詳實史官韓愈
不是當時屈人否李石曰韓愈貞元末爲四門博士
上曰司馬遷與任安書全是怨望所以漢武本紀事
多不實鄭覃曰漢武中年後大發戎馬拓土開邊生
人耗竭本記所述亦非過言初愈撰順宗實錄說禁
中事頗切直內官惡之往往於上前言其不實累朝

有詔改修及修憲宗實錄文宗復令改正永貞間事
跡隨奏乞條示舊記最錯誤者委史官條定乃詔刊
去實錄中所書德宗順宗朝禁中事其他不要更修

按愈進順宗實錄表曰監修李吉甫授臣以前史官
韋厚所撰先帝實錄三卷云未周悉令臣重修臣與
修撰左拾遺沈傳師直館咸陽尉宇文籍等共如採
訪修成削去常事著其繫於政者比之舊錄十益六
七忠良姦佞莫不備書觀此則內官所惡者在是矣
又云沈傳師等採事得於傳聞致有差誤聖明無遺
恕臣不逮重令刊正今並添改訖其奉天功烈更加
尋訪已據所聞載於首卷愈秉史筆而所言云爾嗚
呼難哉

唐史筆所修往往視其人之才否至於高宗文
宗尚能知所刊整其視委成史氏無所攷擇者固有
間矣

起居注

漢一 獻帝起居注

晉十六

泰始起居注 咸寧起居注

建武大興永昌起居注 咸和起居注

泰康起居注 元康起居注

咸康起居注 建元起居注

永和起居注 升平起居注

太元起居注 崇寧起居注

晉起起居注 流別起居注

晉宗起居注 泰始起居注

永初起居注 景平起居注

元嘉起居注 孝建起居注

大明起居注 泰豫起居注

永明起居注

齊一

梁一 大同起居注

陳四

後魏一 起起居注

隋一 開皇起居注

唐二 大唐創業起居注

漢武帝有禁中起居注明德馬后自撰顯宗起居注

后削去兄防參醫藥事章帝請曰黃門舅日夕供養
且一年既無褒異又不錄勤勞無乃過乎太后曰吾
不欲後代聞先帝數親
後宮之家故不錄也
漢有起居注久矣不止獻帝

也

漢時起居注在宮中為女史之職蓋周內史所記王命之副也

梁吳均欲撰齊

書求借齊起居注及羣臣行狀武帝弗許遂私撰奏之是知記注之作有補於史太宗謂褚遂良曰卿知起居注可得見否遂良以為不聞帝王躬自觀史正元中上問趙憬起居注所記何事憬言國朝自永徽以後起居唯得對仗承旨仗下後謀議皆不得聞其曰注記但出於已行制敕內採錄更無他事長壽中姚璿知政事以為親承謨訓若不宣自宰相史官無由得知遂請仗下後所言軍國政要宰相專知撰錄號時政記李弘憲曰時政記者姚璿修之於長壽璿罷而寢賈耽齊抗修之於貞元耽抗罷而

廢李德裕曰璿所撰時政記厥後因循多闕乞依故事知印宰相撰錄歲末送史館杜牧曰舊例宰臣於閣內及延英奏事知印宰相盡書送史館名時政記但記出己之辭或忘同列之對獻替之說史冊不詳欲乞人自為記共成一編必無遺漏觀唐諸公之言如此則記亦非詳且續矣月送史館無

何此事又廢上曰君舉必書義存勸戒宜依故事為之李德裕言延英奏事後向外傳說三事猶兩事虛謬豈有起居注皆三二年後採於傳聞耳目已隔固非實事宜如故事每季送史館如軍國大政傳聞疑誤許於政事堂見宰相臨時酌量如事已施行非關機密者並一一言說所異書事信實免有傳疑按興慶宮有起居注并餘書三千六百卷則起居注不為

不詳矣

唐左右史螭坳書事

唐制朝日左右史分立赤墀之下

丹淹泥以塗殿墀

郎左舍

人右李肇國史補曰兩省謔起居爲螭頭以其立近石螭也鄭覃傳日記注操筆在赤墀下張次宗傳文宗始詔左右史立螭頭下韋絢初除右史中謝置筆札於玉階欄楯之石趨而書辭拜舞約嘉話唐志曰宣政殿朝日殿上設黼宸躡席薰爐香案而宰相兩省對班于香案前則是香案自在殿上向之兩省對班而直案前者乃從殿下準望而言非夾立香案左右

也又按王仁裕入洛過長安見含元殿前玉階三級第一級可高丈許每間引出一石螭頭東西鱗次第二第三級各高五尺蓮花石頂階兩面龍尾道各六七十步方達第一級而宣政殿紫宸螭頭雖不明載然據唐志御正殿則起居郎舍人分左右立有命則俯陛以聽退而書之正殿者宣政也志又曰若伏在內閣則夾香案分立殿下第二螭首和墨濡筆皆即螭處內閣者紫宸也三殿皆有螭於此可見姚璹所謂延英奏事者小殿也

延英殿時政

六典言宣政殿西上閣門之左即延英殿上元二年
殿中當御座生玉芝延英召對宰臣始於代宗時以
苗晉卿年老特御是殿優禮也陽城欲救陸贄約拾
遺王仲舒守延英殿閣上疏其言守閣者開延英以
受其對也錢希白南部新書記唐制內有公事即開
延英長安志以延英在紫宸殿東呂大臨圖引李庚
賦曰東則延英眈眈又按會要元和十五年詔於西
上閣門西廊內開便門以通宰臣自閣中至延英則
延英不在紫宸之東矣會要之說蓋與六典合僖宗
時易延英為靈芝表芝瑞也還自蜀仍曰延英正元

七年詔諸司官長許對延英德宗又詔今後有陳宜
於延英請對憲宗時元稹為拾遺亦乞於延英訪問
自後諸州刺史又於延英陛辭韓臯為中丞奏事紫
宸殿上曰我與卿言不盡可來延英與卿從容又天
祐後一旬三開延英元和中義武節度張茂昭舉族
歸朝故事雙日不坐是日特開延英亦禮之特璿修
時政記請延英奏事宰臣書送史館其謂是歟

時政記

永徽後左右史唯對仗承旨伏下謀議不得聞武后
以姚璿表尚符瑞擢平章事璿奏帝王謨訓不可闕

記請仗下不言軍國政要責宰相自撰號時政記以授史官從之時政有記自璿始大中六年平章事裴休言宰相論政上前知印者爲時政記他議事有所闕史氏莫得詳請宰相人自爲記付史官詔可元和八年上以時政記問於宰相監修國史李吉甫對曰是宰相記天子事以授史官之實錄也上曰其間或修或不修何也吉甫曰凡面奉德音未及施行樞機周密固不可書以送史官其間謀議有發自臣下者又不可自書以付史官及事已行者制旨昭然天下皆得聞知即史官記之不待書以授也姚璿修於長

壽璿罷而事廢賈耽修於正元耽罷而事廢

唐曆

肅宗詔柳芳與韋述綴輯吳兢所撰國史會述死芳續成之叙天寶後事棄取不倫史官病之後坐事貶黔中從高力士質開元天寶及禁中事倣編年法爲唐曆四十篇頗有異聞然不立褒貶義例爲諸儒譏訕按唐曆起隋義寧元年訖建中三年又續唐曆二十二卷又有唐曆目錄一卷唐崔令欽撰其後又有唐曆目錄一卷唐年曆一卷唐劉軻撰唐曆帝紀一卷又按前史有吳曆六卷胡冲撰晉曆二卷陳曆二

卷唐曆蓋因乎此芳字仲敷河東人

唐會要

五代會要 西漢會要 不知誰作甚簡約

唐蘇冕撰唐會要四十卷起高祖迄代宗崔鉉撰唐會要四十卷次德宗以來至大中間事 本朝王溥撰唐會要一百卷起宣宗至唐末合蘇崔二書合爲百卷溥又撰五代會要三十卷起梁開平迄周末

玉牒

玉牒見於唐所以奠世繫分宗譜也開成中李衢上皇唐玉牒一百一十卷李又有玉牒行樓二卷其在本朝志世繫之外更爲一史以紀大事大事者降誕

符瑞即位大臣除拜大政事大詔令也是所謂大事必書者其書一年一進按建武三十二年梁從等奏求元封封禪故事當用方石再累置壇中用玉牒書藏方石牒厚五寸長尺三寸廣五寸有玉檢又用石檢十枚列於石傍以告曰刻玉牒書函藏金櫃璽印封之又按唐麟德元年有事岱宗造三玉冊皆以金繩編玉牒爲之刻玉填黃金爲字又爲玉匱以藏蓋太史公所曰紬金匱石室之書者也韓昌黎有曰功德鏤乎白玉之牒抑謂是歟今玉牒殿制度玉牒以銷金鑲爲紙書之夾以銀梵葉

先太史在牒寺最久乃得專修
神宗一朝玉牒事既專則筆削不亂唯
神宗國史有所謂朱墨本者史之所載殊多私意
先公是正特為精覈可以言史矣

史

史略卷四

史典

高

似孫

續古修

史表

史略

史鈔

史評

史贊

史草

史例

史目

通史

通鑑

通鑑參據書

史典

王逸齊典

五卷

劉璠梁典

三十卷

何元之梁典

三十卷陳始興王諮議

謝昊梁典

三十卷

元行冲魏典

三十卷記後魏事唐人

唐穎稽典

一百三十卷開元中穎罷臨穎尉上之張說奏留史館修撰

李延壽太宗政典

三十卷

王彥威唐典

七十卷

按何元之梁典高帝革命論曰官自有梁備觀成敗昔因出軸流寓齊都窮愁著書竊慕虞子簡牘多闕略不盡舉觀此則典之爲書亦幾於紀事省而辭約者也

史表

古今年表

一卷

表希之漢表

十卷

韓祐續古今人物表十一卷 上校太常寺太祝 開元十七年

柳芳唐宰相表三卷

陳繹輔相表十卷 皇宋

宰輔年表載熙豐間事

國朝年表八卷

太史公曰五帝三代之記尚矣自殷以前諸侯不可得而譜周以來乃頗可著讀春秋曆譜謀至周厲王廢書而嘆則知載筆之嚴莫嚴於譜謀世本十五篇古史官記黃帝以來訖春秋帝王公侯卿大夫祖世之所出表之作其有據於此乎善乎班固之言曰綴

續前記究其本末表舉大分別而叙之表之爲義如此

史略

張溫三史略三十卷

張緬後漢略二十五卷

魚豢魏略五十卷

杜延篤晉春秋略二十卷

荀綽晉後略十一卷

吉文甫十五代略十卷 起庖犧至晉

裴子野宋略二十卷

姚最梁後略十卷

梁承聖中興略十卷

丘悅三國典略二十卷以關中鄴都江南為三國記南北朝事

環濟帝王要略十二卷紀帝王及天官地理喪服

張太素隋後略十卷

郭修唐年統略十二卷

李吉甫六代略三十卷

杜信史略三十卷

杜毅大業記略三卷唐人

裴子野撰史略其序事評論多善沈約嘆其評論可

與過秦王命分路揚鑣是為翦繁撮要之法然諸子
所錄玄出意度自成機杼是難以槩論然有至略之
法存焉人特不着眼耳堯典載曆象治水禪舜之事
大矣凡四十字舜典載受禪命官之事亦大矣
凡八百三十字禹貢載山川貢賦名物水功之事
尤大矣凡一千二百八字非略之至乎

史鈔

葛洪史記鈔十五卷

葛洪漢書鈔三十卷

葛洪後漢書鈔三十卷

吳志鈔一卷

張緬晉書鈔三十卷

三十國春秋鈔二卷

九州春秋鈔一卷劉孝標注

右唐仲彥有子鈔虞南南有北堂書鈔皮日休有鹿門書鈔唐人有碎金鈔張九齡有珠玉鈔蘇易簡有文選鈔凡言鈔者皆擷其英獵其奇也可爲觀書之法也

史評

王濤三國志序評三卷晉人

徐爰三國志評

二評蓋專爲三國所書設是固有可評者司馬公作通鑑遺書劉道原曰魏吳蜀宋齊梁陳後魏秦夏涼燕北齊後周五代諸國地醜德齊不能相一名號鈞敵本非君臣者皆用列國之法彼此抗衡無所抑揚沒皆稱殂王公稱卒庶幾不誣事實稍近至公至於劉備雖承漢族屬疏遠不能紀其世數名字亦猶宋高祖自稱楚元王後李昇自稱吳王恪後是非難明今並同之列國不得與漢光武晉元帝爲例以溫公之殊見絕識而於此難決是果難乎習鑿齒作漢晉

春秋其言有曰桓溫覬覦非望乃著漢春秋以裁正之起光武終於晉愍帝於三國之時蜀以宗室為正魏武雖受漢禪尚為篡逆至文帝平蜀乃為漢亡而晉始興焉其說如此豈不快哉

史贊

范曄後漢書贊 十八卷

范曄後漢書論贊 五卷

傅暢晉諸公贊 二十二卷

雜贊十六附

上古以來聖賢高士贊 三卷周續之

徐州先賢傳贊 九卷徐義慶

會稽先賢傳 二卷鍾離岫

陳留先賢傳贊 一卷陳英宗

長沙舊傳贊 三卷晉臨川王郎中劉或

吳先賢贊 三卷

會稽太守像贊 二卷賀氏

東陽朝堂像贊 一卷晉太山太守留叔先

桂陽先賢畫贊 五卷吳左中郎張勝

聖賢高上傳贊 三卷嵇康

至人高上傳贊 二卷孫綽

列仙傳贊

三卷孫綽

六賢圖贊

二卷唐李渤撰前代夫婦俱隱者六人

孝子傳贊

三卷王韶之

忠孝圖贊

二十卷李襲譽

凌煙功臣贊

并傳四十卷蔣乂

唐十八學士贊

一卷呂溫

烈女傳贊

一卷繆襲以上諸贊辭多壞缺故錄焉

先太史嘗言歐陽公撰新唐史紀志皆脫藁獨太宗紀贊難乎其為工既成一夕夢神人金甲持兵琅乎問罪以紀贊過乎措辭蓋太宗也公乃為改作又治

又治平中妙柬一時名人修

仁宗史以帝紀屬之李邦直其所作贊又不能成一日出示諸公曰竭平生之力是倣馬班漢文亦贊由今觀之固有間矣只如兩漢書中大贊寧有幾非不欲追抗太史公筆力然其辭可琢其氣格不可敵況其下者乎

史草

蕭子顯晉史草

三十卷

予嘗觀楊文公史草用竹紙細字字清美塗攢甚少蓋造思之素者也又觀歐陽公史草闊行真字殊有

更易處又一二紙更易幾盡又觀宋景文公史草則
佳紙闊行筆史所書其草乃兩傳凡劉史之舊所易
幾盡今以新傳比舊傳則一時群臣奏疏往往攛改
所存不一二又觀司馬公通鑑草紙闊狹不侔有剪
爲數寸闊者兩面密書時有塗改處字尤端楷觀此
則想象蕭公史草令人精神飛越恨不一披元筆

二

古人制作不只遺辭合理而一字之施有不可易者
景文公修唐書韓文公傳全載進學解諫佛骨表潮
州謝上表祝鯉魚文殊不甚竄改於進學解頗易數

字以招諸生爲召字障百川而東之爲停字跋前疐
後爲躓字韓公本用狼跋詩語非躓也其他以爬羅
剔抉爲把羅焚膏油爲燒以取敗幾時爲其敗吳元
濟傳書平淮西碑文千六百六十字固有他本不同
然才減節輒不穩當明年平夏一句悉焚之平蜀西
川減西川字非郊廟祠祀其無用樂減祠其兩字皇
帝以命臣愈臣愈再拜稽首減下臣字汝其以節都
統計軍以討爲諸討者如左傳討軍實之義若云諸
軍恐非奇柳子厚傳載與蕭俛許孟容書正符懲咎
賦四篇孟容書氣義步武全與漢揚輝荅孫會宗書

相似正符倣班孟堅典引而其四者次序或失之至云宗元不得召內閣倬作賦自倣然其語曰逾再歲之寒暑則責居日月未爲久難以言不得召也資治通鑑但載梓人及郭橐駝傳以爲其文之有理者其識見取舍固有在云

史例

顏師古注漢書例 一卷

劉餗史例 三卷

沂公史例 一卷田宏正客

金馬統例 一卷

呂夏卿唐書新例 一卷

司馬公通鑑前例 一卷

善言史例無若杜征南然古之爲例簡而後之爲例詳不止是也事有出於常事之表則創例亦新用志亦艱矣神而明之者史乎

史目

唐楊松珍撰史目唐宗諫撰十三代史目唐孫王汝撰唐列聖實錄目其後作史目者準此隋志所謂古史官旣司典籍蓋有目以爲綱紀是亦史之綱紀也

通史

梁武帝通史 六百二卷

按通史上自三皇迄梁全用編年法

李延壽南史 八十卷

李延壽北史 一百卷

唐李延壽父太師多識前世舊事常以宋齊周隋天下參隔南方謂北爲索虜北方指南爲島夷其史於本國詳他國略往往訾美失傳思所以改正擬春秋編年刊究南北事未成而歿延壽旣歿與論撰所見益廣乃追終先志本魏登國元年盡隋義寧二年作本紀十二列傳八十八謂之北史本宋永初年盡陳

禎明三年作本紀十列傳七十謂之南史凡八代合二書百八十篇其書頗有條理刪落釀辭過本書遠甚唐鄭暉作史雋十卷亦記南北朝事何及李氏史之精覈張伯玉又續史雋十卷伯玉唐人

高峻小史 一百卷

峻元和中人著小史初爲六十卷餘卷乃其子廻釐益之一以太史公書爲準作漢諸臣諸王世家嚴整有律是深於史者

姚康復統史 三百卷

統史自開闢至隋末用編年法纂帝王政事凡詔令

所下皆書至於鹽鐵榷糴兵糧邊事無不該載以及
釋道燒煉妄求無驗者亦書之康大中中爲太子詹
事

蕭肅合史 二十卷

蘇轍古史 二十卷 皇朝

太史公易編年之法爲本紀世家列傳記五帝三王
以來後世莫能易之漢景武之間尚書古文詩毛氏
春秋左氏皆不列於學官世能讀之者少故其記堯
舜三代之事皆不得聖人之意戰國之際諸子辯士
各自著書或損增古事以自信一時之說遷一切信

之甚者或采世俗相傳之語以易古文舊說及秦焚
書戰國之史不傳於民間幸而野史一二存者遷亦
未暇詳也故其記戰國有數年不書一事者因遷之
舊上觀詩書下考春秋及秦漢雜錄記伏犧神農訖
秦始皇帝爲七本紀十六世家三十七列傳謂之古
史追錄聖賢之遺意以明示來世至於得失成敗之
際亦備論其故嗚呼由數千歲之後言數千歲之前
其詳不可得矣幸其猶有存也而或又失之此古史
之所爲作

資治通鑑

皇朝端明殿學士司馬光治平中受詔編集歷代君臣事迹許自選辟官屬於崇文院置局熙寧初神宗皇帝御製序賜名資治通鑑命經筵進讀及光補外聽以書局自隨元豐七年書成上起戰國下終五代凡一千三百六十二年分二百九十四卷又略舉事目爲目錄三十卷參考羣書訂其同異爲考異三十卷

資治通鑑舉要曆 八十卷

司馬公既著通鑑患其書浩大難於易見而目錄第撮取精要之語無復首尾晚乃著是書

資治通鑑外紀 十卷

皇朝劉恕撰初司馬公受詔修歷代君臣事跡辟恕于史局公退居洛陽恕歸江東仍隸局中嘗謂司馬遷史記始於黃帝其包犧神農闕而不錄公爲歷代書而不及周威烈王之前以包犧至末命三晉爲諸侯可爲前紀

本朝

一祖

四宗一百八年可爲後紀將俟書成有請於公及恕病廢又在遠方不可得國書絕意於後紀乃更前紀

曰外紀如國語稱春秋外傳之義也又有目錄三卷起包犧氏訖周威烈王二十二年恕字道原京兆人

通鑑參據書

史記

前漢書

後漢書

三國志

晉書

宋南史

北史

齊書

周書

沈約宋書

梁書

陳書

隋書

新舊唐書

宋略

新舊五代史

魏氏春秋

唐錄政要

天寶故事

後史補

袁宏漢紀

荀悅漢紀

太清紀

十道志

祿山事迹

李昊蜀書

高峻小史

世語

漢武故事

文貞公傳錄

天寶西幸記

毛文錫紀事

華陽國志

國典

魏文貞公故事

段秀實別傳

續漢書

三十國春秋

平陳記

玄宗幸蜀記

續漢志

晉春秋

大業略記

梁功臣列傳

薊門紀亂

東觀記

十六國春秋

通曆

朝野僉載

河洛春秋

收復邛州壁記

張璠漢記

職官志

大業雜記

潘遂紀聞

汾陽王家傳

五代通錄

漢晉春秋

後魏書

隋季革命記

宜都內人傳

顏氏行狀

閩中實錄

九州春秋

玉泉子聞見錄

河洛行年記

陳氏別傳

李太尉南行錄

王氏啓運圖

紀年通譜

通典

創業起居注

張彭蒼舊傳

會稽錄

嘉號錄

燕書

貞觀政要

狄梁公傳

句延慶耆舊傳

勤王錄

山陽公載記

修文殿御覽

壺關錄

松窓雜錄

徐鉉吳錄

九國志

胡冲吳曆

獻帝起居注

唐曆

景龍文館記

十國紀年

馬氏行年記

英雄記

前涼錄鈔

太宗勲史

開天傳信記

咸通解圍錄

王舉大定錄

江表傳

後魏序紀

革命記

升平源

唐年補錄

湖湘馬氏故事

獻帝春秋

十六國春秋錄

唐朝年代記

次柳氏舊聞

續寶運錄

華嶠譜叙

唐統紀

明皇雜錄

北夢瑣言

金鑾密記

御史臺記

閩錄

唐餘錄

歷代年號

集賢注記

見聞錄

劉氏興亡錄

韋曜吳書

劉餗小說

虞喜志林

編遺錄

孫盛雜語

伽藍記

唐要會

五代會要

妖亂志

寰宇記

吳錄

三國典略

唐聖運圖

鮮于仲通碑

吳越備史

虜庭雜記

徐鉉江南錄

陷蕃記

貞陵遺事

谷況燕南記

續牛羊日曆

五代史闕文

洛中紀異

王貴妃傳

劇談

錢易家語

啓國寶錄

正閏位曆

五代史補

西南備邊錄

備史遺事

晉陽見聞錄

玉堂閑話

興元聖功錄

開成紀事

忠懿王勲業志

兩朝獻替記

戊申英政錄

三楚新錄

雲南別錄

何氏姓苑

續貞陵遺事

唐年小錄

金華子雜編

甘露記

錢氏慶系圖譜

韋奉天錄

常侍言旨

林恩補國史

皮光業見聞錄

家王故事

奉天記

劉展紀亂

李絳論事

唐闕文

貢奉錄

上清傳

蒲山公傳

後唐懿祖紀年錄

唐末汎聞錄

因話錄

建中實錄

會昌一品集

北蕃君長錄

南唐近事

唐諫諍集

鄴侯家傳

唐末見聞錄

東觀奏記

江表志

牛羊日曆

雲溪友議

唐列聖實錄

自高祖至昭
哀凡二十世

叙訓

邠志

皇華四達記

彭門紀亂

河南記

平剡錄

長曆

驚聽錄

南詔錄

韓愈集

李白集

白居易集

杜牧集

張九齡集

陳子昂集

獨孤及集

劉琨集

高郢集

鄭畋集

顧況集

賈至集

柳宗元集

大中制集

先賢行狀

馮涓大廳壁記

蜀德政碑

吳融生祠堂碑

陳子昂德政碑

何進滔德政碑

鄭畋行狀

征天賦

武威王廟碑

真宗初命編修君臣事迹謂輔臣曰宴享一門所錄

唐中宗宴飲韋庶人等預會和詩與臣寮馬上口摘

含桃事皆非禮也已令削之又曰所編事迹蓋欲垂

為典法異端小說咸所不取編修官上言近代群臣

自其歷如李德裕文武兩朝獻替記李石開成承
詔錄韓偓金鑾密記之類又有子孫述先德叙家世
如李繁鄴侯傳柳氏序訓魏公家傳之類隱己之惡
攘人之善並多溢美故匪信書又僭偽諸國各有著
撰如偽吳錄孟知祥實錄之類自矜本國事或近誣
其上並所不取其餘三十國春秋河洛記壺關錄之
類多是正史已有秦記燕書之類出自偽邦商芸小
說談數之類俱是談諧小事河南志邠志平剡錄之
類多是故吏實從述本府戎師征伐之功傷於煩碎
西京雜記明皇雜錄事多語恠奉天祿尤是虛詞盡

議采收恐成蕪穢從之書成賜名冊府元龜所遺既
多亦失明白如司馬公通鑑則不然今人但以爲取
諸正史予嘗窮極通鑑用工處固有用史用志傳或
用他書萃成一段者則其爲功切矣其所采取亦博
矣乃以其所用之書隨事歸之于下凡七年而後成
通鑑中所引援二百二十餘家試以唐一代言之叙
王世充李密事用河洛記魏鄭公諫爭用諫錄李絳
議奏用李司空論事睢陽事用張中丞傳淮西事用
涼公平蔡錄李泌事用鄴侯家傳李德裕太原澤潞
回鶻事用兩朝獻替記大中吐蕃尚婢婢等事用林

恩後史補韓偓鳳翔謀畫用金鑾密記平龐勛用彭
門紀亂討裘甫用平剡錄紀畢師鐸呂用之事用廣
陵妖亂志皆本末粲然則雜史鎖說家傳豈可盡廢
今錄于前使觀者知其功力如此不敢率於展卷也

史略卷四

史略卷五

高氏

似孫

續古修

霸史

雜史

七略中書古書

東漢以來書考

歷代史官目

劉勰論史

霸史一

十六國春秋略三十國春秋及春秋鈔
戰國春秋附春秋彙其外鎖晒者二十

餘家
不錄

華陽國志

十二卷 晉常璩撰 志巴漢風俗公孫以後据蜀事

漢之書

十卷 常璩撰

蜀李書

十卷

漢趙書

十卷 和苞撰

趙書

二十卷 偽燕長史田融載石勒事

燕書

二十卷 偽燕尚書范亨記慕容儁事

南燕錄

五卷 范亨記慕容德事

南燕錄

六卷 偽燕中書郎王景暉撰

秦書

斐景仁載符助過江事 隋志唐志皆無之 見劉孝標注世說

秦書

三卷 何仲熙撰 記符健事

符朝記

一卷 田融撰

秦記

十一卷 宋裴景仁撰 將軍裴景仁撰

秦記

十卷 魏尚書姚和都記姚萇事

涼記

八卷 偽燕僕射張諮記張軌事

涼書

十卷 偽涼中郎張軌事

涼記

十卷 偽涼著作佐郎段龜龍記呂光事

涼書

十卷 高道遜撰

涼書

十卷 沮渠國史

托跋涼錄

十卷

燉煌實錄 十卷 劉昫撰

吐谷渾記 二卷 宋新寧侯段國撰

鄴洛記 十卷

霸史二

吳越史 十卷 范炯林禹朝撰

吳錄 二十卷 徐鉉記 楊行密據淮南迄楊漣

淝上英雄小錄 偽吳信都鎬記 楊行密起廬州入廣陵將吏五十人

江南錄 十卷 徐鉉記 江南李氏三主事

江南別錄 四卷 陳彭撰

江表志 三卷 鄭文寶撰

江南野史 二十卷 龍衮撰

吳唐拾遺錄 十卷 許氏撰

南唐近事 二卷 鄭文寶撰

前蜀紀事 二卷 偽蜀毛文錫記 王建采僭號前事

前蜀書 四十卷 偽蜀李昊撰 記王氏本末

後蜀實錄 八十卷 李昊撰 記孟昶事

蜀檣枕 十卷 張唐英撰

三楚新錄 三卷 皇朝周行逢荆南高季興事

荆湘近事 一卷 陶岳撰

閩中實錄 十卷 蔣文樸記 王氏據閩盡留從效李仁達事 惟不及陳洪進

十國紀年

四十二卷劉恕紀五代十國事

九國志

四十九卷曾顏記五代事

晉自永嘉之亂皇綱失統九州君長據有中原腥羶之風薰浸河洛其間或奉正朔或竊名位人自爲國螽聚其分國有其臣各思記載錄其釐疆樹長之自詳其立事用人之經亦足以待攷稽知本末後魏刻夷諸國據有嵩華乃命崔浩博采舊聞綴述國史諸國所纂盡集祕府朱之亂往往散亡今錄其可攷之者

雜史

越絕書

十五卷子胥撰或曰子胥舊有內紀八外傳十七今存二十篇又載

春申君疑後人竄定言二十篇者非是

春秋前傳

十卷何承天撰

春秋前傳雜語

十卷何承天撰

春秋後傳

三十一卷晉著作郎樂資撰

魯後春秋

二十卷魯允濟撰

吳越記

六卷

戰國策

三十四卷劉向錄

戰國策

二十一卷高誘注

戰國策論

一卷漢京兆尹延篤撰

南越志

八卷沈氏撰

十二國史

四卷

春秋時國語

十卷孔衍撰

春秋後國語

十卷孔衍撰

右古雜史

楚漢春秋

九州春秋

並見春秋景

史漢要集

漢末英雄記

十卷王粲撰

後漢雜事

十卷

右兩漢

後漢釋論

二十卷王越客撰

魏晉世論

十卷晉襄陽令郭頒撰

魏末傳

二卷

呂布本事

一卷毛萁撰

晉武平吳記

六卷周世宗將張昭撰

右魏晉

宋中興事

二卷

宋拾遺

十卷梁少卿謝綽撰

王霸記

三卷潘傑撰

宋齊語錄

十卷孔思尚撰

五代新記

二卷唐張詢古記梁陳北齊周隋事

金陵樞要

一卷汪豹記六朝事

齊梁事迹

一卷

淮海志

四卷蕭世怡叙梁侯景之亂

右南北朝

隋開業平陳記

十二卷裴矩撰

隋平陳記

一卷稱臣悅撰亡其姓

大業拾遺

一卷唐杜寶撰

大業略記

三卷唐趙毅撰

大略拾遺錄

一卷記煬帝幸江都

大業雜記

十卷杜寶撰

隋季革命記

五卷唐杜儒童記大業之亂

劉氏行年記

十卷唐劉仁軌記大業至武德河洛冠攘事

朝野僉載

二十卷唐張鷟記周隋以來事迹

右隋

唐創業起居注

三卷溫大雅記高祖起義至禪位

唐聖述

一卷裴烜之撰

今上王業記

六卷溫大雅撰

太宗勲史

一卷吳兢撰

高宗實迹

一卷裴烜之撰

唐書備闕記

十卷具統撰起太宗至明皇

明皇政錄

十卷李康撰

明皇雜錄

二卷趙元一撰

天寶西幸記

一卷溫畬撰

幸蜀記

一卷宋巨撰

開元天傳信記

一卷鄭榮撰得開元天寶事於傳聞

開元天寶遺事

六卷王仁裕撰

河洛春秋

二卷唐包諤撰起祿山叛訖史朝義叛

天寶記

十卷

祿山事迹

二卷唐華陰尉姚汝能撰

邠志

一卷凌準撰起武德訖天寶

大唐新語

十三卷唐劉肅撰起武德訖大曆

奉天記

一卷唐徐岱撰

幸奉天錄

一卷唐崔光庭撰

奉天錄

四卷唐趙元一撰

建中西狩錄

十卷張讀撰

文宗朝備問

一卷

國史補

三卷唐李肇記開元至長慶事

補國史

六卷唐林思謨撰

通史

三卷大中時人所作

闕史

三卷唐祚彥休記太曆以後至乾符事

封氏見聞記

五卷唐封演撰

唐末見聞錄

八卷紀僖昭兩朝事

燕南記

三卷唐谷况撰

平蔡錄

一卷唐鄭元濟撰

平淮西記

一卷唐路隋撰

河南記

一卷薛平撰

元和辨謗錄

三卷李德裕撰

太和記

一卷甘露事誅鄭注等作十人傳

乙卯記

李潜用記太和乙卯李訓等甘露事

甘露記

二卷

開成紀事

三卷記大和甘露事

開成承詔錄

二卷李石記文宗朝鄭覃等奏對

文武兩朝獻替記

三卷李德裕撰

柳氏舊聞

一卷李德裕撰

唐錄備闕

十五卷僖宗中初事

上黨紀叛

一卷

會昌伐叛記

一卷記李德裕相武宗破回鶻平劉植

壺關錄

三卷韓昱述安史之亂李密王世充事

正陵遺事

二卷唐令狐澄撰

續正陵遺事

二卷唐柳此撰

平剡錄

一卷唐鄭言記太和末擒越盜裘甫平劉

太和野史

十卷沙仲穆撰

東觀奏記

三卷唐裴廷裕撰宣懿僖宗事

彭門紀亂

三卷唐鄭樵撰記懿宗朝徐州龐勛叛

咸通解圍錄

一卷張雲記咸通中雲南蠻寇成都

南楚新聞

三卷唐尉遲樞記寶曆至天祐時事

廣陵志

三卷唐郭延誨記高駢鎮廣陵之亂

中朝故事

三卷僞唐尉遲氏撰宣懿昭宗事

唐補記

三卷唐程柔記宣懿僖宗事

雲南事狀

一卷記唐末羣臣奏議招輯雲南蠻事宗

金鑾密記

一卷唐韓偓記昭宗幸華州太祖以兵圍華事

會稽錄

一卷記唐末越州董昌叛

右唐

汴水滔天錄

一卷五代王偁記梁太祖事

汴州記

一卷記梁太祖鎮汴州事

梁太祖遺錄

三十卷梁恭翔撰

莊宗召禍記

一卷後漢黃彬撰

晉朝陷蕃記

四卷皇朝范質筆撰

陷蕃記四卷范質撰

陷虜記三卷周胡濙撰

征淮錄一卷劉仁贍撰

入洛私書十卷周江文秉記

後史補三卷周高若拙記

備史六卷賈緯記

王氏聞見集三卷晉王仁記

皮氏聞見錄十卷皮光業記

右五代

太史公書所以爲助者左氏國語世本戰國策陸

新語楚漢春秋而已至班固因太史公范曄依謝承司馬彪諸史豈不易哉其爲功也靈獻以來天下大亂史官失守天下之士老於筆削雋於辭翰者往往各因聞見見諸纂修代不乏才爭自騁驚作者之衆蓋如此歟司馬公資治通鑑凡雜史入于整綱裁正者凡二百二十餘家其亦有補於史氏明矣故並存之甚瑣陋者不錄

七略中古書

劉向著七略別錄二十卷蓋向爲光祿大夫成帝詔校經傳諸子詩賦所作時步兵校尉任宏校兵書太

史令甄咸校數術侍醫李柱國校方技每一書已向
輒條其篇目撮其指意錄而奏之向卒哀帝命向子
侍中奉車都尉歆卒父業歆於是總羣書而奏其七
略有六藝略有諸子略有詩賦略有兵書略有術數
略有方技略有今刪其要以備篇籍而向所撮指要歆
復遺之王儉作七志阮孝裕作七錄蓋本諸此大凡七略書五百九十
三家而古之奇書為絕少今錄三代以前書不及一
二十種春秋以來至秦諸子雜書百餘家不必錄有
以古書為名而師古諸人以為後人所作或曰以後
世語或曰其言俗薄者亦不錄是知秦火之厄酷矣

所謂不必錄者入隋經籍唐藝文則又無此書矣惜哉

太古以來年紀

黃帝歷

黃帝四經

黃帝銘

孔甲盤盂

風后

蚩尤

力牧

顓頊歷

夏殷周魯歷

伊尹

太公

辛甲

史籀宣帝時

尹佚成康時

東漢以來書考

班固作漢書依向歆七略為藝文志而范曄史後漢則無此志非闕歟自爾諸史惟隋史志經籍唐史志藝文然經籍之盛盛於隋極矣作東漢以後藝文考

東漢

東漢藏書在石室蘭臺在東觀在仁壽問班固傳毅之流掌焉董卓之亂獻帝西遷所收圖書猶七十餘載兩京亂掃地而盡

魏

魏采掇漢散亡之書藏在祕書中外三問鄭點初作

中經

晉

晉既蒐聚典籍荀勗因魏中經制新簿摠章羣書釐為四部甲部錄六藝小學乙部錄子兵術數景部錄史記舊事丁部錄詩賦圖讚凡三萬惠懷之亂京華蕩覆書問之度為之一空東晉初漸加收拾李充校以勗舊簿僅存三千卷亦以甲乙類次

宋

中朝遺書既歸江左元嘉中謝靈運造四部目錄六萬四千餘卷元徽中王儉作四部書目又作七志一

經典二子三文翰四軍書五陰陽六術藝七圖譜而
道佛附之書名之下每立一傳又有條例載于篇首

齊

永明中祕書監謝朓丞王亮造四部書目書萬有八
千卷齊末祕閣火書亡

梁

梁初任昉親加彙正聚書文德殿卷二萬三千釋書
不錄又祕書監任昉殷鈞制四部目錄數術別爲一
部是爲五部劉遵又作東宮四部目錄劉孝標作文
德殿四部目錄普通中處士阮孝緒采宋齊以來王

公家所藏校官目爲七錄一曰經典二曰記傳三曰
子兵四曰文集五曰技術六曰佛七曰道其於剖析
殊爲不經元帝克平侯景收文德殿書歸江陵凡七
萬餘卷周師入郢咸自焚之

陳

陳天嘉中鳩集攷其篇錄尚多遺闕中原戰爭日親
于戈文教之盛符姚而已然猶有壽安殿四部目德
教殿四部目又有承香殿五經史記目亦留神於此
者矣宋武入關收其圖籍僅四千卷

後魏

後魏始都燕代南略中原粗收書史未能該備孝文
都洛偕書於齊稍稍加錄爾朱之亂又復散落史中
有魏闕書目一卷

後齊

後齊都鄴頗更搜聚迄天統間武平校寫不輟

後周

後周始基關右書止八千卷後增至萬卷周武平齊
先封書府所加舊本纔五千卷

隋

隋開皇三年牛弘表請使求書一卷賞絹一疋校寫

既畢即還書本陳平經籍漸備於祕書續補殘闕為
正副二本內外閣凡三萬餘卷煬帝再錄分三品上
者軸頭紅琉璃中者紺琉璃下者漆軸聚於東都觀
文殿東西廂東藏甲乙西藏丙丁又藏魏以來古迹
名畫於殿後之二臺東曰妙楷臺以藏法書西書寶
繪臺以藏名畫有四部目二其一開皇四年其一八
年所錄又有大業正御書目

唐

隋嘉則殿書三十七萬卷武德初有書八萬卷重複
相揉王世充平得隋舊書八萬卷太府卿宋遵監運

東都浮舟汴河西致京師經砥柱覆舟書盡沉亡正
觀中魏徵虞世南顏師古繼於祕書監購天下書選
五品以上子孫工書者爲書手繕寫藏於內庫以宮
人掌之玄宗命昭文館學士馬懷素爲修圖書使與
崇文館學士褚無量整比會幸東都乃就乾元殿東
序檢校無量建議御書以宰相宋璟蘇頲同署如貞
觀故事又借民間異本傳錄及還京師遷書東京麗
正殿修書院其後光順門外東都明福門外皆創集
賢書院通籍出入旣而太府月給蜀郡麻紙五千番
季給上谷墨三百三十六丸歲給河間景城清河博

平兔千五百皮爲筆材兩都各聚書四部以甲乙丙
丁爲次列經史子集爲四庫其本有正有副帶帙籤
皆異色以別之祿山之亂尺簡不藏元載奏以千錢
購書一卷又命苗發等使江淮括訪文宗時鄭覃建
言又詔搜採於是復全黃巢之亂存者又少昭宗播
遷京城孫惟晟歛書本軍寓教坊於祕閣有詔還其
書命韋昌範等諸道求購及徙洛陽蕩然無遺矣

本朝

本朝承五季後書皆蕩焚

太宗垂意收聚祕閣崇文所儲不及唐之盛蓋古書

益少矣太平興國中詔編太平御覽引用僅一千六百九十種而雜書古詩賦不與焉大中祥符中姚鉉集唐文粹序云今代墳籍略無亡逸攷鉉所集亦自幾王文康公初相周世宗家多唐舊書李文正公所藏亦富至闕學館給廩餼以延者宋宣獻兼得畢文簡楊文莊二家書有祕府不及者元符中一夕燼于火晁以道家所藏凡五世雖不及宋氏而校讎是最爲精確邯鄲李氏所藏亦然政和甲午亦火劉壯輿家廬山之陽自其祖凝之以來圖書亦多有藏書記今亦不存濮安懿王之子榮王宗綽聚書七萬卷宣和中其子曾進書目自龍圖閣太清樓玉宸殿宣和殿以及崇文三館所儲盡歸於燕幸僅存耳

劉軻論太史公以來史筆姓氏

史記班漢已來秉史筆者盡知其人矣東漢有若陳宗尹敏伏無忌邊韶崔寔馬日磾蔡邕盧植司馬彪華嶠范曄袁宏

國志有若衛顗繆襲應璩王沈傅立茅曜薛瑩華覈陳壽

晉洛京史有若陸機束皙王詮詮子隱
晉史有若鄧粲孫盛王韶之檀道鸞何法盛臧榮緒

宋史有若何承天裴松之蘇寶圭沈約裴子野

齊史有若周興嗣鮑行即何之元劉璿

陳史有若顧野王傳綽陸瓊姚察察子思廉

十六國史有若崔鴻

魏史有若鄧淵崔浩浩弟覽高允張偉劉瓛李彪邢
巒溫子昇魏收

北齊史有若祖孝徵陸元規湯休之杜臺卿崔子發
李德林林子百藥

後周史有若柳虬牛弘令狐德棻岑文本

隋書有若王師邵王胄顏師古孔穎達于志寧李延

壽

唐有若溫大雅魏鄭公房梁公長孫趙公許敬宗劉
胤之楊仁卿顧胤牛鳳及劉子宏朱敬則徐堅吳兢

劉勰論史

昔者夫子懲王道之闕傷斯文之墜靜居以歎鳳臨
衢而泣麟於是就大師以正雅頌因魯史以修春秋
舉得失以表黜陟徵存亡以標勸戒然獻旨幽秘經
文婉約丘明同耻實得微言乃原始要終創為傳體
傳者轉也轉授經旨以授於後實聖文之羽翮記籍
之冠冕也及至縱橫之世史職猶存秦并七王而戰

國有策蓋錄而不序故即簡爲名也漢滅嬴項武功
積年陸賈稽古作楚漢春秋爰及史談世惟執簡子
長經志甄序帝績比堯稱典則位雜中賢法孔題經
則文非元聖故取式呂覽通號曰紀紀綱之號亦宏
稱也故本紀以述皇王列傳以摠侯伯八書以鋪政
體十表以譜年爵雖殊古式而得事序焉爾其實錄
無隱之旨博雅弘辯之才愛奇反經之尤條例踳落
之失叔皮論之詳矣及班固述漢因循前業觀史遷
之辭思實過半其十志該富讚序弘麗儒雅彬彬信
有遺味至於宗經規聖之典端緒豐贍之功遺親攘

善之罪徵賄鬻筆之憊公理辯之究矣至于後漢紀
傳發源東觀袁張所制偏駁不倫薛謝之作踳謬少
信若司馬彪之詳實華嶠之准當則其冠也及魏代
三雄記傳並出陽秋魏略之屬江表吳錄之類或激
抗難徵或踈闊寡要惟陳壽三志文質辯洽荀張比
之於遷固非妄譽也至於晉代之書繁乎著作陸機
肇始而未備王韶續末而不終于寶述紀以審正明
序孫盛陽秋以約舉爲能案春秋經傳舉例發目史
漢以下莫不準約至鄧粲晉紀始立條例又擺落漢
魏憲章殷周雖湘川曲學亦有心放典謨及安國立

例乃鄧氏之規焉又曰傳託爲式編年經事文非記
論按實而書歲遠則周曲難密事積則起記易踈斯
固總合之爲難也或有同歸一事數人分功兩紀則
失於複重偏舉則漏於不周此又銓配之易也故張
衡摘史班之舛濫傳玄機後漢之尤煩皆此類也若
夫追述遠代代遠多僞公羊臯去傳聞異詞荀悅稱
錄遠略近蓋文疑則闕貴信史也然俗皆愛奇莫顧
理實傳聞而欲偉其事錄遠而欲詳其迹於是棄同
即異穿鑿傍說舊史所無我書則博此訛濫之本源
而述遠之巨蠹也至於記編同時時同多詭雖定哀

徵詞而世情利害勲榮之家雖庸夫而盡飾屯貶之
士雖令德而蚩埋吹霜照露寒暑筆端此又同時之
枉論可爲歎息者也故述遠則誣矯如彼略近則回
邪如此折理居正唯懿上心乎

史略卷六

山海經

高

似孫

集

世本

三蒼

漢官

水經

竹書

山海經

山海經二十三卷郭璞所注又有山海圖贊二卷山

海圖音二卷又有山海經圖十卷舒雅等所修也本朝
人按越絕書禹治水巡行天下所歷山川命伯益記
之遂爲山海經世或以其書爲荒異然攷酈道元注
水經凡山川譎異之事必以山海經爲據郭璞之言
曰古者皇聖原化以極變象物以應恠鑒無稽曠曲
盡幽情神焉廋哉神焉廋哉此書歷載三千暫顯於
漢蓋武帝時有獻畢方鳥不知何以飼之東方朔旣
言其名又言其食帝問何以知之曰山海經所出也
又宣帝時擊磻石於上郡陷得石室其中有反縛盜
械之人劉向曰此貳負之臣也帝問何以知之以山

海經對其辭曰貳負殺竇窳帝乃梏之疏蜀之山桎
其右足反縛其兩手上大駭於是人多竒山海經其
後東方朔作神異經張華箋之華曰方朔周旋一作巡
天下所見神異山海所不載者列之有而不具其說
者列之謂山海經也陶淵明有讀山海經詩沉覽周
王傳流觀山海圖俛仰終宇裏此樂復何如

世本

世本十五篇古史官記黃帝以來訖春秋帝王公卿
諸侯大夫譜係太史公因之以作史記者是後世本
凡三其一曰世本劉向所作者二卷其一亦曰世本

宋衷所作者四卷其一曰帝譜世本者宋均所作者
七卷又有世本王侯大夫譜二卷世本譜二卷王氏
注按世本叙歷代君臣世系是書不復見猶有傳者
劉向宋衷宋均三家而已予閱諸經疏惟春秋左氏
傳疏所引世本者不一因采掇彙次爲一書題曰古
世本周益公在西府聞予有此面借再三因錄本與
之益公一見曰天下奇書學者雋功也予因曰劉孝
標注世說引摯氏世本蓋叙摯氏世家今人欲系譜
謀依摯氏法名之曰某氏世本殊爲古雅益公曰此
說尤新奇

三蒼

三蒼者蒼頡一篇上七章秦丞相李斯作爰歷六章
車府令趙高作博學七章太史令胡毋敬作文字多
取史籀篇而篆體復頗異所謂秦篆者也按史籀十
五篇周宣王太史作大篆十五篇與孔氏壁中古文
亦異體建武時亡矣然是時已見隸書宋景文公云建武時當作造
字然建字政自奇起於官獄多事苟趨省易施之於徒隸也
漢興書師合蒼頡爰歷博學三篇斷六十字以爲一
章凡五十五章并爲蒼頡篇武帝時司馬相如作凡
將篇無復字師古曰月復重也元帝時黃門令史史游作急就

篇成帝時將作大匠李長作元尚篇皆蒼頡中正字也凡將則頗有出矣元始中徵天下通小學者以百數各令記事於庭中楊雄作訓纂篇順續蒼頡又易蒼頡中重複之字凡八十九章班固楊雄作十三章凡一百二章蒼頡多古字俗師失其讀宣帝時徵齊人能正讀者張敞從受之傳立外孫之子杜林爲作訓此孟堅所謂通知古今文字者歟惟唐李善好援引間見於文選注班固注漢書條例亦曰旁究蒼雅所用尚矣

漢官

漢官不知何人作應邵所注

舊五卷今存其一

王隆有漢官

解詁三卷胡廣所注

隆字文山漢新汲令

正訓舊漢官也按後

漢書百官志云周公作周官分職著明法度相持王道雖微猶能久存所以觀周室牧民之德王隆作小學漢官篇諸文個說較略不究

胡廣云隆漢官篇略道公卿内外之職旁及四夷博物條暢多所發明足以知舊制儀品按應劭有漢官儀又有漢官鹵簿圖又有漢官儀注又有漢官名秩蔡質有漢官典儀其言儀者多涉故事往往如衛宏漢舊儀者也

舊四卷今有三卷

後漢書百官志注引漢官目

錄亦爲奇書其後丁孚有漢官儀式荀政有魏官儀
王珪之有職官令梁有職制儀注視漢官簡穰殊不
侔唯郭璞有古今百官注十卷最爲嚴整予以孟堅
百官公卿表載漢官無統緒嘗作漢官殊有條理

二

安帝時越騎校尉劉千秋校書東觀好事者樊長孫
與書曰漢家禮儀叔孫通所草創皆隨律令在理官
藏於几閣無記錄者又令二代之業闇而不彰誠宜
撰次依擬周禮定位分職各有條序劉君然其言與
邑子通人郎中張平子參議未定而遷爲宗正衛尉

至順帝時平子爲侍中典校書方作周官解况乃欲
以次述漢事莫能立于所集漢官正與長孫平子之
意合

二

後漢書百官志注引援皆古書奇書特爲精絕

水經

水經三卷漢中大夫桑欽譔後魏酈道元注爲四十
卷道元范陽人仕魏爲吏部尚書是蓋李延壽父太
師公所謂南人謂北爲索虜北人謂南爲島夷者其
史於本國詳他國略初未嘗盡歷南地而所載南事

特為精確而又續業闕闕辭義浚拔凡所援引多前
史所遺魏收稱其歷覽奇書是固有得於此乎道元
之言曰大傳曰大川相間小川相屬東歸於海脉其
枝流之吐納診其汭路之所纏訪瀆搜渠緝而綴之
經有謬誤者考以附正文所不載非徑水常流者不
在記注之限蓋水經緯綴津渚而闕傍通此尋圖訪
蹟道元之所以為功乎按唐藝文云桑欽一作郭璞
誤又鄭氏書略以為郭璞注然道元所箋略不援引
郭璞則知為桑欽書也唐李吉甫有刪水經十卷是
難乎刪矣晉僧道安有水記記四海雍仲雍有江記

漢記其援引攷訂皆不可及此

竹書

穆天子傳一卷
古文鎖語四卷

周書十卷

晉太康二年汲郡民不准盜發魏襄王冢得古竹簡
書帝命荀勗和嶠撰次為十五部八十七卷以為中
經列在祕書然雜以恠妄之說其紀年專用夏正載
三代事而不及它國但紀晉魏間事終之哀王蓋魏
之史記也按襄王即魏惠成王之子靈王也世本以
為襄王又按史記六國年表自靈王二十一年至秦
始皇三十四年燔書之歲八十六年至太康二年初
得此書凡五百七十九年杜預於左氏傳之末嘗攷

其不合於經傳者數事劉知幾史通乃言汲冢紀年載春秋事多與左氏同又郭璞注山海經以爲穆天子傳載穆王饗西王母于瑤池之上與竹書同璞又言竹書不出則山海經幾廢則知竹書所載恠妄者必有合於山海經者初在隋目八十七卷是猶皆存至唐藝文志吳兢西齋書目僅十四卷耳知幾又曰汲冢所得尋即亡逸然則摯虞東晉旣嘗據引荀勗又嘗參訂杜預之所引用于寶之所稽法則是書不爲不古矣不只是也班固稱臣瓚所注漢書喜用竹書隋志有竹書同異一卷按荀勗所考古尺其簡長

二尺四寸以墨書一簡四十字時勗爲中書監同第錄者中書令和嶠祕書主書令史祕書校書中郎張宙郎中傳瓚瓚即師古注漢書所引臣瓚者也時所書用二尺黃紙

穆天子傳

一卷竹書內書李氏邯鄲書目云六卷必是字誤

按左氏傳穆王欲肆其心周行天下將皆車轍馬迹焉此書所載即其事也穆王得盜驪綠耳之乘造父爲御以觀四荒西絕流沙西登崑崙與太史公記合竹書所傳穆天子傳六卷所歷恠奇亦幾於山海經者雖多殘闕皆是古書

周書 十一卷 竹書內書

晉孔晁注此書以為孔子刪采之餘凡七十篇今如馬揔意林例篇摘一二語可見其刪書之餘者也

度訓解立中以補損以知足命順解始以知終當順解天性有

人有文酌解民生有欲有惡耀莊解國有道故武稱解

大國不失其威允文解思靜鎮勝大母解武有六制

戰博大明武解思嚴大武小明武解必得地勢大匡解

維周王宅程三年遭天之程典解維三月既生魄文

大荒注曰程在岐州左右程典解王合六國之諸侯

程寤泰陰九閏劉法文開

保開八繫以上篇逸

鄴保維維二十三祀庚子朔大開維王三月既小開維

十有五祀王念文倣維文王告薨後嗣之無保召

曰余聞在昔曰文倣維文王告薨後嗣之無保召

守哉柔武呼維維王元祀一月既生魄周禁五戎不

禁厥民大武開訪維王元祀一月既生魄周禁五戎不

不顯誰和若歲之有秋今余不獲其落若何小武開

維王二祀一月既生魄維王元祀一月既生魄周禁五戎不

商不知道極敬聽以勤天下周公旦曰嗚呼余夙夜思

用五行戒視七順道九紀寶典解維王二祀一月

何擇非人又曰嗚呼敬哉朕聞曰何修非躬豐講解王維

商其成事維日望見功諫言多信今其如何寤微

解維四月朔王告微召周公旦曰嗚呼武順解尚天道

日月西移地道尚左水道武穆解曰若稽古曰昭天

東流人道尚中耳目役心武穆解之道熙帝之載揆

任之和寤解高王曰嗚呼敬之哉無競維人公奭畢公

忠惟事惟敬武寤解八方赫奮列克殷解十乘陣于牧

野武王使師尚伯夫致師王文匡解惟十有三祀

既戎車武貴馳商師商師大崩文匡解惟十有三祀

叔泉商之監東隅文政解維十有三祀大聚解惟武

之侯咸受賜于王乃觀圖綏政世浮解維四月有乙未武王成箕子

考德二篇逸商誓王若曰若度邑維王克商邑君諸

邑我做維十有一五權維王不豫于五成開解成王

大開告用作維解子祿父俾守商紀皇門解正月庚

用周公也維維一月時訓紀時謚法解紀謚明堂明堂嘗麥周廟

既南至本典維四月既望既生魄官人王曰嗚呼王會

太祖解朝祭公解王若曰祖祭史記解維正月王在成周

戎職方氏解掌天下芮良夫解芮伯若曰予小臣太

子晉解見晉平公使叔譽于周玉佩解王若所殷說解

湯將放桀周祝解讓哉民心哉民朕則刑汝武經解車甲之

居中野銓法解近三不遠三不器服解道大備

食令色銓法解近三不遠三不器服解道大備

事不捷銓法解近三不遠三不器服解道大備

史略卷六



文仁甲子



蘭天子御覽
序目

内閣文庫		
番號	漢	5208
冊數	1 (1)	
函號	2	5

内閣文庫			
五	二	八	漢書
九	一	〇	架冊號類



子略序

慈惠院

梅

卷

六經後士以才藝自聲於戰國秦漢間往往騁辭立
言成一家法觀其跌宕古今之變發揮事物之機智
力足以盡其神思致足以殫其用其措心運志固不
能盡宗於經而經緯表裏亦有不能盡忘乎經者使
之純乎道昌乎世豈不可馳騁規畫錡錘事功而與
典謨風雅並傳乎所逢如此所施又如此終亦六六
與羣言如一百氏同流可不嗟且惜哉嗚呼仲尼皇
皇孟子切切猶不克如臯夔如伊呂周召况他乎至
若荀子雄氏王通韓愈氏是學孔孟者

與諸子同日語或知此意則一言可以明道
謨可以立身養性致廣大盡高明可以著書立言丹
青金石垂訓乎後世願所擇如何耳審哉審哉乃系
以諸子之學必有因其學而決其傳存其流而辨其
術者斯可以通名家究指歸矣作子略

子略目卷一

漢書藝文志

高

似孫

續古

史稱劉氏七略剖判藝文摠百家之緒每
一書已輒條其篇目撮其指意錄而奏之
自書災於秦文字掃蕩斷章脫簡不絕如
綫上天祿石渠麒麟閣者曾不一二又雜
以漢儒記臆綴續之言書益蕪駁枚數諸
子略所鈔則所謂建藏書之策者不過是
耳天不祿喪猶有可傳者而後世乃復與

之踈闊鮮克是訂而書益窮矣采劉氏略

作子略

晏子

八篇名嬰謚平仲相齊景公孔子稱善與人交有列傳師古曰有列傳者謂太史公書

子思

二十三篇名伋子孫為魯繆公師

曾子

十八篇名參孔子弟子

漆雕子

十三篇孔子弟子漆雕啓後

宓子

十六篇名不齊字子賤孔子弟子師古曰

宓讀與伏同

景子

三篇說宓子語似其弟子

世子

二十一篇名碩陳人也七十一子之弟子

魏文侯

六篇

李克

七篇子夏弟子為魏文侯相

公孫臯子

二十八篇七子之弟子

孟子

十一篇名軻鄒人子思弟子有列傳師古曰聖證論云軻字子車而此志無字未詳其所得

孫卿子

三十三篇名況趙人為齊稷下祭酒有列傳師古曰本曰荀卿避宣帝諱故曰孫

芋子

十八篇名嬰齊人也七十子之後師古曰芋音弭

內業

十五篇不知作書者

周史六弢

六篇惠襄之間或曰顯王時或

言取天下及軍旅之事毀字與切同也蓋曰孔子問焉師古曰即今之六韜也

周法

九篇法天地立百官

譙言

十篇不知作者陳人君法度如淳曰譙音

家語

一所述也篇似河間說者引孔子所造非也

功議

四篇不知作

甯越

一篇中牟人為周威王師

王孫子

一篇巧心

公孫固

一篇十八章齊閔王失國問之固因為陳古今成敗也

李氏春秋

二篇

羊子

四篇百章故秦博士

董子

一篇名無心難墨子

侯子

一篇李奇曰或作淳子

徐子

四十二篇
宋外黃人

魯仲連子

十四篇
有列傳

平原老

七篇
朱建也 一作君 宋

虞氏春秋

十五篇
虞卿也

高祖傳

十三篇
高祖與大臣述古語及詔策也

孝文傳

十一篇
文帝所稱及詔策

陸賈

二十三篇

劉敬

三篇

賈山

八篇

太常蓼侯孔臧

十篇
父聚高祖時以

功臣封

臧嗣爵

賈誼

五十八篇

河間獻王

三篇

董仲舒

百二十篇

兒寬

九篇

公孫弘

十篇

終軍

八篇

吾丘壽王

六篇

虞丘說

一篇
難孫卿也

莊助

四篇

臣欽

四篇

鉤盾穴從李步昌

八篇
宣帝時數

言事

宋祁

儒家言

十八篇
不知作者

栢寬鹽鐵論

六十篇
師古曰寬字次公汝南人也孝昭帝時丞相御史與諸賢良文學論鹽

鐵事寬

撰次之

劉向所序

六十七篇
新序說苑世說列女

傳頌

圖也

楊雄所序

三十八篇
太玄言十三

樂四

歲二

伊尹

五十一篇
湯相

太公

二百三十七篇
呂望為周師尚父本有道者或近世又以為太公術者所增加也師古曰父

讀曰甫也

言

謀

八十一篇

言

七十一篇

兵

八十五篇

辛甲

二十九篇
紂臣七十諫而去周封之

鬻子

二十二篇
名熊為周師自文王以下問焉

周封為楚祖師古

莞子八十六篇名夷吾相

以兵車也有列傳師

老子鄰氏經傳四篇姓李

傳其

老子傳氏經說述三十七篇

老子徐氏經說六篇字少季臨

劉向說老子四篇

問似依託者也

也音一

而從

列子八篇名固寇先

老成子十八篇

長盧子九篇楚人

王狄子一篇

公子牟四篇魏之公子也

田子二十五篇名駢齊人

古曰駢音

老萊子十六篇楚人

黔婁子四篇齊隱士守道不訕威王下之

宮孫子二篇師古曰黔音其炎反下音胡稼反

以鵠鳥

羽為冠

黃帝銘六篇

黃帝君臣十篇起六國時

雜黃帝五十八篇六國

力牧二十二篇六國時所

帝相

孫子十六篇

捷子二篇齊人

楚子三篇

鄒子

四十九篇名衍齊人為燕昭王師居稷下號談天衍

容成子

十四篇

李子

三十二篇名埋相魏文侯富國強兵

列傳

申子

六篇名不害京人相韓昭侯終其身諸侯

不敢侵韓師古曰京河南京縣

處子

九篇師古曰史記云趙有處子

慎子

四十二篇名到先申韓申韓稱之

韓子

五十五篇名非韓諸公子使秦李斯害而

殺之

游棣子

一篇師古曰棣音徒計反

鼂錯

三十一篇

鄧析

二篇鄭人與子產並時師古曰列子及孫

卿並云子產殺鄧析據左傳昭公二十年子產卒定公九年駟猷殺鄧析而用其竹刑則非子產所殺也

尹文子

一篇說齊宣王先公孫龍師古曰劉向云與宋鉏俱游稷下鉏音形

公孫龍子

十四篇趙人師古曰即為堅白之辯者

惠子

一篇名施與莊子並時

田俅子

三篇先韓子蘇林曰俅音仇

我子

一篇師古曰劉向別錄云為墨子之學

隨巢子

六篇墨翟弟子

胡非子

三篇墨翟弟子

墨子

七十一篇名翟為宋大夫在孔子後

蘇子

三十一篇名秦有列傳

張子

十篇名儀有列傳

闕子

一篇

國筮子

十七篇

鄒陽

七篇

主父偃

二十八篇

徐樂

一篇

孔甲盤盂

二十六篇黃帝之史或曰夏帝

孔甲似皆非

大命

三十七篇傳言禹所作其文似後世語師

古曰命古禹字宋祁曰一作帛

五子胥

八篇名負春秋時為吳將忠直遇讒死

子晚子

三十五篇齊人好議兵與司馬法相似

蒯子

五篇名通

由余

三篇戎人秦穆公聘以為大夫

尉繚

二十九篇六國時師古曰尉姓繚名也音

了又音聊劉向別錄云繚為苗君學

尸子

二十篇名佼魯人秦相商君師之鞅死佼

逃入蜀師古曰佼音絞

呂氏春秋

二十六篇秦相呂不韋輯智略

士作

淮南內

二十一

淮南外

三十三篇雜說

師古曰內篇論道外宋祁曰雜邵本作新

東方朔

二十篇

荊軻論

五篇軻為燕刺秦王不成而死司馬

相如等論之

吳子

一篇

公孫屋

一篇

伊尹說

二十七篇其語淺薄似依託也

鬻子說

十九篇後世所加

周考

七十六篇考周事也

青史子

五十七篇古史官記事也

師曠

六篇見春秋其言淺薄本與此同似因託也

務成子

十一篇稱堯問非古語

宋子

十八篇孫卿道宋子其言黃老意

隋書經籍志

隋代羣書始開皇三年牛弘表請搜訪於是異書間出平陳後經籍稍該召工書者於祕書補續殘闕爲正副本一藏宮中一入祕府煬帝立別錄副本分三品上軸紅琉璃中紺琉璃下用漆東都及觀文殿藏焉又聚魏以來古迹名繪於二閣此爲奇矣而唐舟沉於砥柱存不一二爲之嗟惜隋志之作盡出瀛洲學士之手可謂極一時史筆之妙而志甚淆雜乏詮彙之工因

為輯之難哉

晏子春秋

七卷齊大夫晏嬰撰

曾子

二卷目一卷魯國曾參撰

子思子

七卷魯穆公師孔伋撰

公孫屋子

一卷屋似孔子弟子

孟子

十四卷齊卿孟軻撰趙岐注

劉熙注七卷其母邃注亡

孫卿子

十二卷楚蘭陵令荀况撰梁有王孫子一卷亡

董子

一卷戰國時董無心撰

曾連子

五卷錄一卷魯連齊人不仕稱

為先

楊子法言

十五卷楊雄撰李軌注六卷宋衷注十三卷侯苞注亡

賈子

一卷漢梁太傅賈誼撰十卷錄

楊子太玄經

十卷楊雄自作章句亡宋衷注九卷王肅注亡

陸績宋衷注十卷蔡文邵注十四卷

虞翻注十三卷陸凱注七卷

桓子新論

十七卷後漢六安丞桓譚撰

魏子

三卷後漢會稽人魏朗撰

牟子

二卷後漢太尉牟融撰

典論

五卷魏文帝撰

新語

二卷陸賈撰

新序

三十卷劉向撰

潛夫論

十卷王符撰

中鑒

五卷荀悅撰

徐氏中論

六卷魏太子文學徐幹撰

王子正論

十卷王肅撰

杜恕體論

四卷魏幽州刺史杜恕撰

顧子新語

十二卷吳太常顧譚撰

譙子法訓

八卷譙周撰

袁子正論

十九卷袁準撰

新論

十卷晉散騎常侍夏侯湛撰

志林新書

三十卷虞喜撰梁有廣林二卷又後林十卷虞喜撰

要覽

十卷晉郡儒林祭酒呂竦撰

鬻子

周文王師撰一卷

老子

河上丈人注二卷

羊祐

注二卷

巨生

注二卷

盧景裕

注二卷

嚴遵

拍歸十一卷

顧歡

義綱一卷

韋處

玄義疏四卷

戴詵

義疏九卷

葛仙翁

雜論一卷

梁簡文帝

玄機三卷

劉遺民

玄機三卷

山琮

志一卷

李軌

音一卷

鵲冠子

三卷

之隱人

楚人

莊子

李叔之義疏亡

郭象

注三十卷

梁簡文

講疏十卷

戴詵

義疏八卷

李軌

音一卷

又徐邈

集音三卷

向秀

音一卷

梁曠

音三卷

卷魏安成令

桓威撰亡

抱朴子

葛洪撰外內篇共五十一卷

符子

二十卷東晉符朗撰

廣成子

太衡注三卷商洛公撰疑近人作

任子

十卷魏河東太守任

唐子

十卷吳

孫子

孫綽撰十二卷

管子

十九卷齊相

商君書

五卷秦相

衛鞅撰

張嗣注二卷

鍾會注二卷

王尚述注二卷

劉仲融注二卷

袁真注二卷

釋惠琳注二卷

梁曠注二卷

母丘望之拍趣三卷

孟智周義疏五卷

梁武帝講疏六卷

何晏序訣一卷

何王等私記十卷

韓壯玄譜一卷

宗塞幽易五卷

孫登音一卷

戴逵音一卷

列子

鄭之隱人列圍寇撰八

卷東晉光祿勳張湛注

莊子

周弘正講疏八卷

李頤注十八卷

嚴機講疏二卷

梁曠南華論二十五卷

徐邈音三卷

郭象音一卷

慎子十卷慎到撰

墨子十五卷墨翟撰

昌言十二卷仲長統撰

胡非子一卷墨翟撰

呂氏春秋二十卷呂不韋撰

論衡三十卷王充撰

傅子一百二十卷傅玄撰

樂一注一卷

子抄三十卷庾仲容撰

世說八卷宋劉義慶撰

韓子韓非撰

隨巢子一卷墨翟撰

蔣子萬機論八卷蔣濟撰

尸子二十卷尸佼撰

淮南子二十卷王劉安撰

風俗通義三十卷應劭撰

鬼谷子三卷皇甫謐注

金樓子十卷元帝撰

燕丹子一卷

亢桑子二卷天寶元年詔莊子為南華真經列子為

不獲襄陽處士王士元謂莊子作庾桑子太史公列

宰子一卷車融撰

太公金匱二卷

孫子二卷

太公六韜五卷

司馬兵法齊將田穰苴三卷

尉繚子五卷梁惠王游

唐書藝文志

唐因漢略類經史子集爲四至開元尤盛
凡五萬四千卷唐學者自爲書二萬八千
五百卷初隋嘉則殿書卷三十七萬太府
卿宋遵貴運入京覆于砥柱正觀中魏徵
虞世南顏師古繼爲祕書監請構書選五
品以上子孫工書者書藏于內以宮人掌
之宮人任籤帙之責繆矣元宗詔馬懷素
褚無量整比於乾元殿東序請相宋璟蘇
頲同署如貞觀故事後大明宮東都各創

集賢書院學士通籍支月給蜀郡麻紙季
給上谷墨歲給河間景城清河博平四郡
兔千五百皮為筆材各聚四部本有正副
軸帶帙籤亦異色安祿山反尺簡不藏元
載相奏以錢一千購一卷文宗時侍講鄭
覃言經籍未備詔祕閣搜訪乃復完黃巢
亂又益少昭宗播遷在京制置使孫惟晟
歛書寓教坊於祕閣詔以書還既徙洛蕩
無遺矣今稽藝志殊虧詮叙書之涉於瑣
瑣有不可以入子類者合分別錄若不可

淆錯如此也裁之

晏子春秋

七卷
晏嬰

子思子

七卷
孔伋

孟子

十四卷
鄭玄注七卷

張鑑音義三卷

荀卿子

十二卷

董子

一卷
董仲舒

陸賈新語

一卷

桓寬鹽鐵論

十卷

劉向說苑

三十卷

曾子

二卷
曾參

公孫尼子

一卷

趙岐注十四卷
劉熙注七卷

陸善經注七卷
楊倞注二十卷

魯連子

一卷
魯仲連

賈誼新書

一卷

劉向新序

三十卷

楊子法言

六卷
楊雄

宋衷注十卷

柳宗元注十三卷

楊子太玄經十二卷

范望注十二卷

蔡文邵注十二卷

劉緝注十四卷

李軌注十卷

陸績注十二卷

宋仲孚注十二卷

王涯注六卷

賁傲幽贊十卷

桓子新論十七卷

王符潜夫論十卷

仲長子昌言十卷

荀悅申鑒五卷

魏文帝典論五卷

徐氏中論六卷

王肅政論十卷

杜氏體論四卷

顧子新論五卷

譙子法訓八卷

王嬰通論三卷

夏侯湛新論十卷

楊泉物理論十六卷

王通中說五卷

華譚新論十卷

虞喜志林三十卷

顧子義訓十卷

干寶正言十卷

王劭讀書記三十卷

盧辯墳典三十卷

魏子三卷

譙子五卷

周生烈子五卷

袁子正書三十五卷

崔子至言六卷

杜信元和子二卷

鬻子一卷

老子河上公注二卷

王弼注二卷

鍾會注二卷

羊祐注二卷

孫登注二卷

王尚注二卷

袁真注二卷

張憑注二卷

劉仲熊注二卷

陶弘景注四卷

樹鍾山注二卷

李允愿注二卷

陳嗣古注二卷

僧惠琳注二卷

惠嚴注二卷

鳩摩羅什注二卷

義盈注二卷

傳奕注二卷

楊上善注二卷

辟閭仁誦注二卷

玄宗注二卷

盧藏用注二卷

刑南和注二卷

馮朝隱注

白履忠注

李播注

尹知章注並亡

吳善經注二卷

成玄英注二卷

孫思邈注二卷

任真子集解四卷

張道集注四卷

盧景裕等注二卷

立望之章句二卷

王肅玄言二卷

梁曠經品四卷

嚴遵指歸十四卷

何晏講疏四卷

梁武帝講疏十卷

顧歡義疏五卷

孟智周義疏五卷

戴詵義疏六卷

葛洪序訣二卷

韓莊玄音二卷

劉遺民玄譜一卷

馮廓指歸十三卷

賈大隱違義十卷

陳庭玉疏十五卷

陸希聲經傳四卷

成玄英疏七卷

李軌音一卷

郭象注十卷

莊子十卷

列子八卷

劉向注二十卷

冠張湛注

司馬彪注二十一卷

崔譔注十卷

楊上善注十卷

陸德明文句義十卷

李頤集解二十卷

王玄古集解二十卷

李充釋論二卷

梁簡文講疏三十卷

王穆疏十七卷

音一卷

成玄英注疏十四卷

張隱居指要三十三卷

元載通微十卷

孫思邈注柳縱注尹知章

注甘暉注魏包注李含光

注陳庭玉疏並亡

廣成子十二卷

商洛公撰

文子十二卷

唐子十卷

靈府注

唐滂

蘇子七卷
蘇彥

陸子十卷
陸雲

孫子十二卷
孫綽

賀子十卷
賀道養

經列子為冲虛真經文子為通玄真經亢倉子為南華真
靈真經然亢桑子太史公列子作亢倉子其實一也
取諸子文義
類者補甚云

牟子一卷
牟融

呂氏春秋二十六卷

王充論衡三十卷

王肅政論十卷

宣子二卷
宣騁

抱朴子四十卷
葛洪

符子三十卷
符朗

亢倉子二卷
號莊子為南華真
二卷天寶元年詔

尉繚子六卷

淮南子二十一卷
許慎注

應劭風俗通義三十卷

鍾會芻蕘論五卷

傅子百二十卷
卷傳玄

金樓子梁元帝

崔豹古今注三卷

薛克構子林三卷

庾仲容子鈔十卷

王方慶世說十卷

馬摠意林三卷

周書陰符九卷

司馬法三卷
田穰苴

抱朴子二十卷

陸士衡要覽三卷

孟儀子林二十卷

沈約子鈔三十卷

范子計然十五卷

盧藏用子書要略一卷

燕丹子一卷

周呂書一卷

孫子三卷
文帝注

唐志有陸景典訓譙子法訓周捨正覽劉徽欽器圖
之類非合登子錄又帝範臣軌政範諫苑之書尤非
其類如此者數十家裁之

子鈔

梁諮議參軍庾仲容潁川人

子鈔百十有七家仲容所取或數句或一
二百言是有以契其意入其用而他人不
可共享者也馬摠意林一遵庾目多者十
餘句少者一二言比子鈔更爲取之嚴錄
之精且約也戴叔倫序其書曰上以防守
教之失中以補比事之闕下以佐屬文之
緒有疏通廣博縹淨符信之要無辭放拘
刻譏蔽邪蕩之患亦足以發其機寫其志

矣孔子曰雖小道亦有可觀是於諸子未
嘗廢也聖人既遠承學易殊義嚮之少純
言議之多詭則百氏之爲家不能盡叶乎
一亦理之所必然也當篇藉散闕人所未
見之時而乃先識其名又得其語斯足以
廣聞見助發揮何止甞鼎嚮啖雞蹠也陸
機氏曰傾羣言之瀝液漱六藝之芳潤唐韋

展日月如合璧賦云獵英華於百氏漱芳潤於六籍語自此來是庶幾焉

揔唐貞元中任評事字會元扶風人

藝文志

曰名熊著子十
二篇今一卷有六篇

太公金匱

二卷

太公六韜

六卷

曾子

合十八卷

晏子

十四卷

子思子

七卷

孟子

十四卷

管子

十八卷

魯連子

五卷

文子

十二卷同平王
時人師老子

鄧析子

二卷

范子

十二卷

墨子

十六卷

繆子

一卷

隨巢子

一卷

胡非子

一卷

尸子

二十卷

韓子

二十卷

列子

八卷

莊子

十卷

鵬冠子

三卷

王孫子一卷

慎子一卷

申子三卷

燕丹子三卷

鬼谷子五卷

尹文子二卷

公孫左子一卷

陸賈新語二卷

晁錯新書二卷

賈誼新書九卷

呂氏春秋三十卷

淮南子二十卷

巨寬鹽鐵論十卷

劉向新序三十卷

劉向說苑二十卷

楊子法言十五卷

楊雄太元經十五卷

桓譚新論十七卷

王充論衡三十卷

崔元始正論五卷

王符潜夫論十卷

應劭風俗通

商子五卷

阮子四卷

姚信士緯十卷

殷興通論八卷

抱朴子五十卷

王叔師正部六卷

牟子論一卷

周生烈子

荀悅申鑒

仲長昌言十二卷

魏文帝典論五卷

魏子十卷

劉邵人物志三卷

任子十卷

杜恕篤論四卷

杜恕體論四卷

傅子一百二十卷

唐子十卷

秦子二卷

楊泉物理論十六卷

蔡氏化清經一卷

孫敏成敗志三卷

徐幹四論八卷

譙周法論八卷

顧譚新言二卷

陸景典論十卷

裴玄新言五卷

袁準正論

梅子新書一卷

楊泉太元經

鄒子一卷

王嬰通論三卷

蔣濟萬機論八卷

譙周五教五卷

鍾會勳業論五卷

張儼默記三卷

袁準正書

蘇子八卷

桓範世要十卷

夏侯湛新論十卷

虞喜志林二十四卷

諸葛子一卷

符子二十卷

本草經一卷

相馬經二卷

周髀三卷

孫子兵法三卷

汜勝之書二卷

陸子十卷

張顯辨言十卷

顧子十卷

陳子要言十四卷

神農本草經六卷

相牛經一卷

相鶴經一卷

司馬兵法三卷

黃石公記三卷

夢書十五卷

貝書 十卷

淮南萬畢術 一卷

九章算術 三卷

張華博物志 十卷

戴凱之竹譜 一卷

筆墨法

通志藝文略

樞密院編修官莆田鄭樵漁仲譔

本朝藏書家最稱參政蘇公宣獻宋公文忠歐陽公又稱丞相蘇公丞相宋公兄弟而尤盛於邯鄲李氏李氏其目足以與祕府敵

中興以來垂意收拾篤且富無如鄭氏雖曰包括諸氏囊括百家厥功甚茂然稊繁歸彙亦欠理擇是又失於患多者也似孫嘗閱天祿石渠書書一也無異書

二也雜以今人所作外太甚三也而只
攷訂欠精彙類欠確一也所合下
詔更
加求訪一也其書無祕副每出外輒易毀
失一也當必有能任其事者既采鄭氏目
入予子略為之太息

晏子春秋

七卷齊大
夫晏嬰

曾子

二卷曾
國曾參

子思子

七卷魯穆
公師孔伋

漆雕子

十三篇漆
雕開後

宓子

十六篇孔
子弟宓不齊

世子

名碩陳人七十
子之弟子二十一篇

公孫屋子

一卷七十
子弟子

孟子

十四篇齊卿
孟軻趙岐注

鄭玄注七卷
蔡母邃注七卷

劉熙注七卷
陸喜經注七卷

張鑑音三卷

孫奭音二卷

續孟子

二卷唐林
慎思撰

刪孟子

一卷馮
休撰

荀卿子

十二卷楚蘭陵令
荀况楊倞注二卷

芋子

十八篇齊人芋
嬰七十子之後

王孫子

一卷

芋子

四篇秦博士
羊百章撰

徐子

四十二篇
宋外黃人

魯仲連子

五卷齊人魯連
不仕稱先生

賈子

十卷漢梁太
傅賈誼撰

秦子

三卷

何子

五卷

劉子

三卷梁
劉勰撰

楊子法言

解一卷楊雄撰
侯苞注六卷

元子新論

十七卷後漢六
安丞元譚撰

柳宗元注十三卷
司馬光集注十卷

魏子

二卷後漢會
稽人魏明撰

牟子

一卷後漢太
尉撰

王子政論十卷 王肅撰

顧子新二卷 吳太常撰

譙子法訓八卷 譙周撰

譙子五教志五卷

周生烈子五卷

袁子正論二十卷 袁準撰

袁子正語二十五卷

顧子義訓十卷 晉揚州主簿顧夷撰

崔子至言六卷

賈子一卷

元子十卷 元結撰

元和子二卷 杜信撰

伸蒙子三卷 唐林慎思撰

冀子五卷

傅子五卷 晉司隸校尉傅元撰

鰕子一卷 趙麟撰

素履子一卷 張弧撰

東莞子十卷

高子新書三卷 商孝逸撰

孫綽子十卷

樊子三十卷 樊宗師撰

老子古本二卷 河上丈人注二卷

河上公注二卷

又章句二卷

嚴遵注二卷

指趣二卷

又指歸十一卷

鍾會注二卷

又解釋四卷

羊祐注二卷

蜀才注二卷

孫登注二卷

汪尚注二卷

又音一卷

劉仲融注二卷

袁真注二卷

曹道冲注二卷

張憑注二卷

盧景裕注二卷

陶景注二卷

鍾植山注二卷

陳臯注二卷

李允愿注二卷

陳嗣古注二卷

僧惠嚴注二卷

僧惠琳注二卷

鳩摩羅什注二卷

梁義盈注二卷

偃松子注二卷

梁曠等注四卷

李納注四卷

道士李紫注三卷

唐明皂注二卷

辟閭仁諝注二卷

傅奕注二卷

具善經注一卷

楊上善注二卷

成元英注一卷

盧藏用注二卷

李軌疏一卷

李若愚注一卷

戴逵疏一卷

孟智周疏一卷

趙至堅疏一卷

韋處元疏一卷

王顧等疏二卷

江徵疏二卷

梁武帝疏八卷

賈青夷疏四卷

又講疏四卷

何晏疏四卷

任真子集注四卷

政和御解二卷

張道相集注四卷

程韶集注二卷

又義綱一卷

顧歡義疏一卷

王弼節解二卷

又章門一卷

韓莊拍略二卷

拍例略二卷

又元指八卷

賈大隱述義十卷

賈善埤傳三卷

元景先生簡要義五卷

呂氏昌言二卷

崔少元心鑑一卷

李旼音解二卷

王守注心鑑一卷

莊子郭象注十卷

向秀注二十卷

崔譔注十卷

司馬彪注十六卷

音一卷

晉李頤注三十卷

又疏三卷

孟氏注十八卷

楊上善注十卷

道士文如晦注十卷

盧藏用注十二卷

道士成元英注三十卷

又疏十二卷

四家注十五卷

張昭補注十卷

徐邈疏三卷

王穆疏三卷

戴詵八卷

又疏十卷

周宏正講疏八卷

李叔之義疏三卷

梁簡文帝講疏三十卷

張機疏二卷

又內音義一卷

外音義一卷

陸德明句義三十八卷

馮廓正義十卷

又句義二十卷

張隱居拍要三十六篇

陳景朝內要一卷

李充論二卷

又餘事一卷

賈參廖統略三卷

又通真論三卷

李頤集解二十卷

邈一卷

王元集解二十卷

賈善翔直音一卷

鬻子一卷

唐鄭縣尉逢行注王觀注三卷

列子

八卷鄭穆公時隱者

本朝加至

晉張湛注八卷

孫鷗注八卷

盧重光注八卷

政和御注八卷

統略一卷

釋文一卷

音義一卷

文子

十二卷老子弟子

李暹訓法十二卷

鶡冠子

三卷楚

莊成子

十二卷

蹇子

一卷

唐子

十卷吳

蘇子

七卷晉北中郎

宣子

二卷晉宜城

陸子

十卷陸

幽求子

二十卷

抱朴子

葛洪撰內篇二十卷外篇三十卷

符子

二十卷東晉

賀子

十卷宋太學博

少子

五卷齊司徒左

無名子

一卷張

元子

五卷

廣成子

十三卷商洛撰張本衡注

亢倉子

三卷老聃之徒庚桑楚

無能子

三卷唐光啓中

同光子

八卷劉

元真子

三卷張

連觀子

一卷

淨注子

二十卷蕭

天隱子

一卷

元中子

三卷杜

元筌子

一卷瑤

素履子

一卷

任子道論

一卷魏河東

赤松子

一卷陳

管子

十八卷齊相夷吳

唐尹知章注舊有三十卷今存十九卷
房元齡注二十一卷

慎子一卷戰國時處士慎到撰舊有十卷漢有四
十二篇隋唐分為十卷今亡九卷三十七篇

韓子二十卷韓非撰唐
有尹知章注今亡
阮子政論五卷魏清涼
太守阮武撰

陳子要言十四卷吳豫章
太守陳融撰
鄧析子一卷戰國
時鄭大夫

尹文子二卷尹文
之處士
公孫龍子一卷戰國時人
舊十四篇今亡

賈大隱注一卷
陳嗣古注一卷

隨巢子一卷墨
翟弟子
胡非子一卷墨
翟弟子

董子一卷戰國時董無
心撰其說本墨氏
鬼谷子三卷皇甫謐注鬼
谷先生楚人也生

於周世隱居鬼谷樂臺注三卷唐
尹知章注三卷梁陶景注三卷

補闕子十卷梁
元帝撰
尸子二十卷秦相衛
鞅上客尸佼撰

淮南子二十一卷漢淮南王劉安撰
許慎注又高諒注二十一卷

金樓子十卷梁
元帝撰
子鈔三十卷梁點令庾仲
容撰云諮議參軍鈔

序
子鈔三十卷
沈約撰

子林三十卷
薛克撰
子書要略一卷盧
藏用撰

子談論三卷
范子計然十五卷

農子一卷
燕丹子一卷王喜太子
青史子一卷

郭子三卷東晉中郎郭
澄之撰賈泉注
宋玉子一卷楚大
夫宋玉撰

炙轂子五卷唐
王叡撰
倚杆子一卷元
結撰

太公六韜五卷
乾闥子一卷溫
庭筠撰

太公金匱二卷

司馬兵法 三卷

孫子 三卷

吳子 一卷

尉繚子 五卷 梁惠王時人

子略卷一

黃帝陰符經

高氏 似孫 續古

觀天之道執天之行盡矣故天有五賊見之者昌五賊在心施行於天宇宙在乎手萬化生乎身天性人也人心機也立天之道以定人也天發殺機日月星辰地發殺機龍蛇起陸人發殺機天地反覆天人合發萬變定基性有巧拙可以伏藏九竅之耶在乎三要可以動靜火生於木禍發必剋姦生於國時動必潰知之修練謂之聖人天地萬物之盜萬物人之

人萬物之盜三盜既宜三才既安故曰食其時百骸
理動其機萬化安人知其神而神不知不神所以神
日月有數大小有定聖功生焉神明出焉其盜機也
天下莫不見莫能知君子得之固窮小人得之輕命
瞽者善聽聾者善視絕利一源用師十倍三反晝夜
用師萬倍心生於物死於物機在目天之無恩而大
恩生迅雷烈風莫不蠢然至樂性餘至靜則廉天之
至私用之至公禽之制在氣生者死之根死者生之
根恩生於害害生於恩愚人以天地文理聖我以時
物文理哲自然之道靜故天地萬物生天地之道浸

故陰陽勝陰陽相推而變化順矣至靜之道律呂所
不能契愛有奇器是生萬象八卦甲子神機鬼藏陰
陽相勝之術昭昭乎進乎象矣

陰符經

陰符經注

太公等注

一卷十家

七家注

一卷

李靖注

一卷李筌

張果注

一卷

袁淑真注

一卷

蕭真宰注

一卷

黃居真注

一卷

沈亞夫注

一卷

任照一注

一卷

蹇昌辰注

杜光庭注一卷

陸佃注一卷

李靖陰符機一卷

陰符太無傳一卷張果傳得於道藏

陰符正義一卷唐韋洪

陰符要義一卷

李筌妙義一卷驢山母傳一卷

陰符辨命論一卷張果

陰符元談一卷元解先

陰符經一卷杜光庭

陰符十德經一卷葛洪

陰符經疏一卷袁淑真

陰符經頌一卷元子

陰符經為一卷無子撰

陰符頌三卷張卿撰

陰符元義一卷唐張魯

陰符丹經一卷防山長

陰符丹經一卷驢山母注

陰符序一卷李筌

陰符經訣一卷

陰符經序一卷

陰符五賊義一卷

陰符小解一卷

陰符天機經一卷

陰符解題一卷

陰符丹經解一卷

陸龜蒙讀陰符經詩

清晨整冠坐即詠三百言備識天地意獻詞犯乾坤
何事不隱德降靈生軒轅口銜造化斧鑿破機關門
五賊忽迸逸萬物爭崩奔虛施神仙要莫救華池源
但學戰勝術相高甲兵屯龍蛇競起陸鬪血浮中原
成湯與周武反覆更為尊下及秦漢得瀆弄兵亦煩
茲強自休據仁弱無枝蹲狂喉咨吞噬逆翼爭飛翻

家家伺天發不肯匡淫昏生民墜塗炭此屋爲冤魂
祇爲謹此書大樸難久存微臣與軒轅亦是萬世孫
未能窮意義豈敢求瑕痕曾亦愛兩句可與賢達論
生者死之根死者生之根方寸了十字萬化皆胚渾
身外更何事眼前徒自喧黃河但東注不見歸崑崙
晝短苦夜永勸若傾一樽

皮日休讀陰符經詩

三百八十言出自伊祁氏上以生神仙次云立仁義
玄機一以發五賊紛然起結爲日月精融作天地髓
不側似陰陽難名若神鬼得之昇高天失之沈厚地

具茨雲木老大塊煙霞委似顓頊以降賊爲聖人軌
堯乃一庶人得之賊帝摯摯見其德尊脫身授其位
舜惟一鰥民冗冗作什器得之賊帝堯曰丁作天子
禹本刑人後以功繼其嗣得之賊帝舜用以平降水
自禹及文武天機惓然施姬公樹其綱賊之爲聖智
聲詩川競大禮樂山爭峙爰從幽厲餘宸極若孩稚
九伯真大彘諸侯實虎兕五星合其耀白日下闕里
由是生聖人於焉當亂紀黃帝之五賊拾之若青紫
高揮春秋筆不可刊一字賊子虐甚斲姦臣痛於壘
至今千餘年蚩蚩受其賜時代更復改刑政崩且墜

余將賊其道所動多訛毀叔孫與臧倉賢聖多如此
如何黃帝機吾得多坎躓

陰符經

似孫曰軒轅氏鑿天之奧洩神之謀著書曰陰符雖
與八卦相表裏而其辭其旨涉乎幾入乎深唯深也
故能通天下之志唯幾也故能通天下之謁唯神也
故不疾而速不行而至軒轅氏皆有得於此者堯舜
禹以徠皆精一危微行所無事之時陰符之學無所
著見豈非行之於心仁於天下者乎湯武有誓輜圖
有兵八陣有圖遂皆用此以神其武而況有風后握

竒一書又爲之經緯乎此黃帝心法而後世以爲兵
法者是以此書見之兵家者流殆未曾讀陰符矣嗚
呼若符之學一乎兵則黃帝之所以神其兵者豈必
皆出於此哉古之聰明叡知神武而不殺故通其變
使民不倦神而化之使民宜之此爲陰符之機矣其
曰天有五賊見之者昌此又出於羲畫之表人固有
五賊特莫之見耳若能見之何止乎昌耶夫子曰老
而不死之謂賊此之謂也皮日休之言竒矣皮日休
和陸龜蒙讀陰符詩有曰三百八十言出自伊耆氏
皮氏所見亦今本耳

風后握奇經

馬隆本作握機叙云風后軒轅臣也握者振也大將所居言其事不可妄示人故云握機又稱諸子總有三本其一本三百六十字一本三百八十字蓋呂尚增字以發明之其一行之簡有公孫弘等語或云武帝令霍光等習之於平樂觀以輔少主備天下之不虞令本行四字

八陣四為正四為奇

舊注奇讀如字後人說天地風雲為四正龍虎鳥蛇為四奇公

孫弘曰世有八卦陣法其既不用奇正似非風后所傳未可參用

餘奇為握奇

舊注

如奇耦之奇解云說奇正者多矣而握奇云者四為正四為奇餘奇為握奇陣數有九中心奇零者大將

握之以應赴

或總稱之先出遊軍定兩端天有衝圓

地有軸前後有衝

一作有風雲

風附於天雲附於地衝有

重列各四隊前後之衝各三隊風居四維故以圓軸
單列各三隊前後之衝各三隊風居四角故以方天
居兩端地居中間總為八陣陣訖遊軍從後躡敵或
驚其左或驚其右驚一作警聽音望麾以出四奇

天地之前衝為虎翼風為蛇蟠圍繞之義也虎居於
中張翼以進蛇居兩端向敵而蟠以應之天地之後
衝為飛龍雲為鳥翔突擊之義也龍居其中張翼以
進鳥掖兩端向敵而翔以應之虛實二壘一作軍皆逐
天文氣候向背山川利害隨時而行以正合以奇勝
天地以下八重以列或曰握機望敵即引其後以接

角前列不動而前列先進以次之

公孫弘曰傳項氏陣法依此今按而

前列等八字舊文在依此注下誤也故遷次以成文

或合而為一因離而為八

各隨師之多少觸類而長

天或圓而不動

一作天或圓而不布

前為左後為右天地四望

之屬是也

一本下有天風象二字

天居兩端其次風其次雲

一作其次

天衝其次地衝其次風衝其次雲衝

左右相向是也地方布風雲各在

後衝之前天居兩端其次地居中間

一作其次地

兩

地為比是也

或公孫弘曰此為地為從天陣變為地陣

為動也一本自公孫弘曰

縱布天一

一作兩字而縱字上

有雲象龍一句

天二次之

作兩天

縱布地四次於天

後一作縱布四地四地縱布四風挾天地之左右無

地字天地前衝居其右後衝居其左地一無二句一無居其右

後衝五字雲居兩端虛實二壘則此是也動一本下有此無

虛實已下公孫弘曰人多傳韓信注釋天或圓布已

下與此微有差異而范蠡樂毅之說相雜今亦錯綜

於其中其部隊或三五或三十或五十變通之理寄

以相傳授予今於難解之處增字發明之耳一本其

部隊下上五十云陣圖如此變通由人以爲經文誤

也按公孫氏稱與其異者天或負布次遊軍定兩端

下以爲正經而以天有衝止繩類而長列于續圖雲

爲翔鳥之下今馬本尚如此

握奇經續圖

角音二

初警衆 末收衆

革音五

一持兵 二結陣 三行

四趨走 五急鬪

今音五

一緩鬪 二止鬪 三退

四背 五急背背一本作趨

麾法五

一玄 二黃 三白

四青一作赤 五赤一作青

旗法八

一天玄 二地黃

三風赤 四雲白

五天前上玄下赤

六天後上玄下白

七地前上玄下青一作赤

八地後上黃下赤一作青

陣勢八

天 地 風

雲 飛龍 翔鳥

虎翼 地蟠

二革二金為天 三革三金為地

二革三金為風 三革二金為雲

四革三金為龍 三革四金為虎

四革五金為鳥 五革四金為蛇舊注此八陣名

用金鼓之制

其金革之間加一角音者在天為兼風在地為兼

雲在龍為兼鳥在虎為兼蛇加二角音者全師進

東加三角音者全師進南一作西加四角音者全師

進西一作南加五角音者全師進北靴音不止者行

伍不整金革既息而角音不止者師並旋

三十二隊天衝

十六隊風

八隊天前衝

十二隊地前衝

十二隊地軸

合作二隊

八隊天後衝

十二軸地後衝

十六隊雲

以天地前衝爲虎翼天地後衝爲飛龍風爲虵蟠

雲爲翔鳥

馬隆總述

治兵以信求勝以奇信不可易戰無常規可握則握
可施則施千變萬化敵莫能知

匹陳讚

動則爲奇靜則爲陳陳者陳列戰則不盡分苦均勞
佚輪轍 有兵前守後隊勿進

天陳讚

天陳十六內方外圓四面風衝其形象天爲陳之主
爲兵之先潜用三軍其形不偏

地陳讚

地陳十二其形正方雲生四角衝軸相當其體莫測
動用無疆獨立不可配之於陽

風陳讚

風無正形附之於天變而為蛇其意漸玄風能鼓動萬物驚焉蛇能圍繞三軍懼焉

雲陳讚

目太公范蠡以來風雲無正形所以附天地

雲附於地則知無形變為翔鳥其狀乃成鳥能突擊雲能晦冥千變萬化金革之聲

飛龍

天地後衝龍變其中有手有足有背有曾潛則不測動則無窮陳形亦然象名其龍

翔鳥

驚鳥擊搏必先翔翔勢凌霄漢飛禽伏藏審而下之

下必有傷一夫突擊三軍莫當

蛇蟠

風為蛇蟠蛇吞天真勢欲圍繞性能屈伸四季之中與虎為隣後變常山首尾相因

虎翼

天地前衝變為虎翼伏虎將搏盛其威力淮陰用之變化無極垓下之會曾公莫測

奇兵讚

古之奇兵兵在陳內今人奇兵兵在陳外兵體無形形露必潰審而為之百戰不昧

合而爲一離而爲八

合而爲一平川如城散而爲八逐地之形混混沌沌如環無窮紛紛紜紜莫知所終合則天居兩端地居其中散則一陰一陽兩兩相衝勿爲事先動而輒從

遊軍

遊軍之形乍動乍靜避實擊虛視羸撓盛結陳趨地斷繞四徑後賢審之勢無常定

金革

金有五革有五退則聽金進則聽鼓鼓以增氣金以抑怒握其機關戰不失度

鞞鼓

紅塵戰深白刃相臨勝負未決人懷懼心乍犇乍背或縱或擒行伍交錯整在鞞音

麾角

麾法有五光目條流角音有五初驚末收麾者指揮角者驚覺臨機變化慎勿交錯光目一作光自

兵體

上兵伐謀其下用師棄本逐末聖人不爲利物禁暴隨時禁衰蓋不得已聖人用之英雄爲將夕惕乾乾舊闕四字其形不偏樂與身後勞與身先小人偏勝君子

兩全爭者逆德不有破軍必有亡國握機爲陳動則爲賊後賢審之勿以爲惑夫樂殺人者不得志於天下聖人之言以戒來者

一作天下


似孫曰風后握奇經三百八十四字其妙本乎奇正相生變化不測蓋潛乎伏羲氏之畫所謂天地風雲龍鳥蛇虎則其爲八卦之象明矣蓋注奇讀如奇耦之奇則尤可與易準諸儒多稱諸葛武侯八陣唐李衛公六花皆出乎此唐裴緒之論又以爲六十四陣之變其出也無窮若此則所謂八陣者特八卦之統爾焦氏易學卦變至乎四十九十有六奇正相錯變

化無窮是可以名數該之乎然觀太公武韜且言牧野之師有天陣有地陣此固出於握奇而又有入陣焉此又出於天地陣之外者非八陣六花所能盡也獨孤及作風后八陣圖記有曰黃帝順煞氣以作兵法文昌以命將風后握機制勝作爲陣圖故八其陣所以定位衡抗於外軸布於內風雲負其四維所次備物也虎張翼以進虵向敵而蟠飛龍翔鳥上下其勢所以致用也至若疑兵以固其餘地遊軍以案其後列門具將發然後合戰弛張則二廣迭舉犄角則四奇皆出圖成罇俎帝用經略此逐獫狁南平蚩尤

遺風冥冥神機未昧項藉得之霸西楚黥布得之奄
九江孝武得之攘匈奴唐天寶中客有得其遺制於
黃帝書之外篇裂素而圖之按魚復之圖全本於握
機蹟其妙窮其神者武侯而已獨孤乃以爲項黥武
帝得之未之思歟

武侯八陣圖

附



似孫曰蜀漢丞相武鄉侯諸葛亮八陣圖其一圖在
沔陽高平故壘酈道元水經以爲傾而難識矣其一
圖有新都八陣鄉峙土爲魁植以江石四門二首六
十四魁八八成行兩陣並峙周凡四百七十二步魁
百有三十其一圖在魚復者隨江布勢填石爲規前
障壁門後倚卻月縱八橫八魁容二丈內面偃月九
六鱗差江自岷來奔怒湍激驚雷迅馬不足以敵其
雄也徒華變滄不足窮其力也磊磊斯石載轟載椿
知幾何年曾不一仄是非天所愛神所做者歟昔者
風后以陣法佐黃帝戮蚩尤若變與神蓋出於握奇

經者也所謂經者本乎先天蹟乎八卦錯以九疇非
武侯窺其幾洩其用四頭八尾脉落聯因隊相容隨
形可首雖曰奇正迭變未有不出於正者故曰黃帝
之師百戰百勝者此其得之桓溫固嘗驚嘆以爲常
山蛇杜甫又切感嗟稱其石不轉武侯之心則二子
所未深知也惟王通氏以爲亮而無死禮樂可興吁
知武侯者通乎昔者先王處民以井寄兵於民熟之
以禮容用之以節制是誠不陣而可以服人兵者使
武侯昌諸用勒諸功甘誓牧誓可也天不壽漢圖石如
泣悲夫武侯又有將苑一卷十六策一卷

鬻子

魏相奏記載霍光曰文王見鬻子年九十餘文王曰噫老矣鬻子曰君若使臣捕武逐麋臣已老矣若使坐束國事臣年尚少文王善之遂以爲帥今觀其書則曰發政施仁謂之道上下相親謂之和不求而得謂之信除天下之害謂之仁其所以啓文王者決矣其與太公之遇文王有相合者太公之言曰君有六守仁義忠信勇謀又曰鷙鳥將擊卑飛翮翼武狼將擊弭耳俯伏聖人將動必有愚色尤決於啓文王者矣非二公之言殊相經緯然其書辭意大略淆雜若

大誥洛誥之所以為書者是亦漢儒之所綴輯者乎
太公又曰天下非一人之天下天下之天下也奇矣
藝文志叙鬻子名熊著書二十二篇今一卷六篇唐
貞元間柳伯存嘗言子書起於鬻熊此語亦佳因錄
之永徽中逢行珪為之序曰漢志所載六篇此本凡
十四篇予家所傳乃篇十有二

太公金匱六韜

詩曰維師尚父時維鷹揚諒彼武王肆伐大商會朝
清明鄭康成稱其天期已至兵甲之疆師率之武故
今伐商合兵以清明也牧誓曰時甲子昧爽武王朝

至于商郊牧野與詩合也武王之問太公曰何以知
人心王時寢疾太公負而起之曰行迫矣勉之武王
乃駕鷺寘之車周且為之御至于孟津大黃參連弩

大才扶胥車

戰具

飛鳧

赤莖白羽以銅為首

電影

青莖赤羽以銅為首副也

晝則為光夜則為星

方頭鐵鎚

重八斤一名鐵鉞

行馬

廣二丈二十具

渡溝飛

橋廣五丈轉關鹿盧

鷹爪方山鐵把

柄長七尺

天陣

日月斗杓杓一左一右一

仰一背此為天陣

地陣

丘陵水泉有左右前後之利

人陣

車馬文武

積楹臨衡

攻具雲梯飛樓

視城中也

武衡大櫓

三軍所須

雲火萬炬

火吹鳴具

孤審此則康成所曰兵甲之疆師率之武為可攷歟
亦詩所謂檀車煌煌駟騶彭彭是也又攻諸武王曰

殷可伐乎太公曰天與不取反爲其咎武王又曰諸侯已至士民何如太公曰大道無親何急於元士武王又曰民吏未安賢者未親何如太公曰無故無新如天如地其言若有合於書者詩之上章曰保右命爾變伐大商上帝臨女無貳爾心此之謂歟

孔叢子

漢藝文志無孔叢子而孔甲盤盂二十六篇出于雜家而又益以連叢其獨治篇稱孔鮒一名甲世因曰孔叢子盤盂者其事雜也漢書注又以孔甲爲黃帝之史或夏帝時人篇第又不同若非今孔叢子也記

問篇載子思與孔子問答如此則孔子時子思其已長矣然孔子家語後叙及孔子世家皆言子思年止六十二孟子以子思在魯穆公時固常師之是爲的然矣按孔子沒於哀公十六年後十六年哀公卒又悼公立三十七年元公立二十一年穆公既立距孔子之沒七十年矣當是時子思猶未生則問答之事安得有之耶此又出於後人綴集之言何其無所據若此好古之癖每有悅乎異帙奇篇及觀其辭攷其事則往往差謬而同異嗚呼夫人設而微言絕異端起而大義乖皆苟簡於一時而增疑於來世一故爲

學者舍六經何師焉

曾子

曾子者曾參與其弟子公明儀樂正子春單居離曾元曾華之徒講論孝行之道天地事物之原凡十篇自修身至于天圓已見於大戴禮篇爲四十九爲五十八它又雜見於小戴禮略無少異是固後人掇拾以爲之者歟劉中壘父子奏漢上略已不能致辨於斯況他人乎然董仲舒對策已引其言有曰尊其所問則高明行其所知則光大則書固在董氏之先乎又其言曰君子愛日及時而成難者不避易者不從

且就業夕自省可謂守業年三十四十無藝則無藝矣五十不以善聞則無聞矣質者吾自三省吾身何其辭費耶予續先太史史記注七十二弟子傳參字子與晉灼讀音如宋昌驂乘之參因併及之

魯仲連子

仲連生戰國間可謂大不幸者矣有其材即無其時有其時無其事業此志士之所共嗟也若其辭氣雋放倜儻磊落琅琅乎誓誥之風遺燕將一書有曰智者不背時而棄利勇士不怯死以滅名忠臣不先身而後君辭旨激亮隱然出乎戰國之表其義高

史

記傳仲連言其莫肯干仕嗚呼當是時士掉三舌得意天下一言捭闔取富貴如拾芥往往挾詐尚謀揉輶於名利之場如恐不及仲連智謀辯勇非儀秦髡衍輩可伍因事抗議切中事機排難解紛迎刃而破心畏爵賞如逝鴻避弋連之意沉寘斯世久矣使連可縻不過相齊耳天下諸侯方以足惴惴將一于秦亦豈一齊所可亡秦者逃歸海上瞭焉著龜茲其所以大過人歟戰國以來一人而已

晏子春秋

孔子刪詩而魯頌居周商之中孔子定書而費誓秦

誓在周書之後下僭上臣逼君禮義銷微制度掃地聖人無所施其正救而猶惓惓於詩書至於世日益亂分日益陵三綱五常斷喪乖紊天地之變有不可勝言者而春秋作矣春秋所書莫大於齊晉之霸齊晉之霸莫雄於管仲之謀周室法度爲之蕩然其爲術至慘也至無道也其遺患天下後世者仲也三歸反玷仲於禮也何有以此謀國國安得正而况背義違禮桓公唯其君臣之際不亦陋乎不特是也自太公疆于齊至于宣公蓋二十三傳矣而弑死十有一嗚呼何其甚亂也獻公殺其兄襄公淫其妹懿公宣

公皆以淫惡而見弑當是時禮亡義墮豈復知有君臣上下之分哉在景公時齊之為齊趨於弱入於危矣公燕群臣請無為禮是何其言之謬法之蕩也晏子蹴然進曰君言過矣群臣固欲君之棄禮也力禮足以勝其長勇多足以殺其君而禮不使也戰國之汚有且如此亦庶幾焉然而田氏之宗世世齊政賣恩歛惠以懷其民民亦忘齊而歸田氏禮之素蕩義之素墮魚爛冰銷有不可禦誦晏子之語究晏子之心豈不哀哉孟子曰一齊人傳之衆楚人咻之子略卷一

子略卷二

老子注

高氏

似孫

續古

河上丈人

戰國時人

河上公

漢文帝時人

母丘望之

漢長陵三老又章句二卷

嚴遵

漢處士又指歸十一卷

王弼

又老子指例略二卷

鍾會

羊祜

又有解釋

蜀才

孫登

晉尚書郎

汪尚

晉江州刺史

劉仲融

袁真

晉中郎將

張馮

曹道冲

盧景裕

陶弘景

陳臯

鍾植

李允愿

陳嗣古

惠琳僧

惠嚴僧

鳩摩羅什

義盈僧

程韶集注

任真子集注

張道相道士集三
十家注

梁曠又道德經
品四卷

偃松子

李納

李榮道士

辟問仁諍

傅奕

楊上善

吳善經又小解
二卷

李若愚

顧歡義疏一卷又
義綱一卷

孟智周義疏
五卷

韋處元義疏
四卷

戴詵義疏
九卷

趙志堅義疏
四卷

王顧義疏
四卷

江徵義疏十
四卷

賈青夷義疏
四卷

梁武帝講疏四卷
又六卷

何晏講疏四卷又
道德問二卷

王肅少言道德
新記二卷

葛洪序訣
二卷

李元英義疏
七卷

韓莊元旨
二卷

劉遺民元譜
一卷

扶少明道士道德
經譜二卷

陸希聲道德經
傳四卷

杜光庭廣聖義
三十卷

賈大隱

老子述義十卷

元景先生

簡要義五卷

陸修靜

道德經新說一卷

陳景先

道士以微二卷

崔少元

老子心鑑一卷

賈善翊

傳三卷

何晏道德二論

晏又有講疏四卷

何平叔

晏注老子始成詣王輔嗣見王注精奇迺神

伏曰若斯人可與論天人之際矣因以所注為道德

二論又晏注老子未畢見弼自說注老子旨何意多

所短不復得作聲但應喏喏遂不復注因作二論文

章叙錄曰自儒者論以老子非聖人絕禮棄學晏說

與聖人同著論行於世魏氏春秋曰弼論道約美不

如晏自然出拔過之又曰晏少有異才善談易老

裴徽論老子

王輔嗣弱冠詣裴徽徽問曰夫無者誠萬物之所資

聖人莫肯致言而老子申之無已何耶弼曰聖人體

無無又不可以訓故言必及有老莊未免於有恒訓

其所不足

永嘉流人名曰徽字文季河東聞喜人太常替少弟也仕至冀州刺史王弼別傳曰

弼父為尚書郎裴徽為吏部郎徽見異之故問

老子

卦始於犧重於文王成於孔子天人之道極矣究人事之始終合天地之運動吉凶悔吝禍福興衰與陰

陽之妙迭爲銷復有無相乘盈虛相盪此天地之用
聖人之功也易有憂患此之云乎書紀事詩攷俗春
秋以明道禮樂以稽政往往因其行事書以記之者
也易之作極聖人之蘊奧而天下無遺思矣老子之
學於道深矣反覆其辭鉤研其旨其造辭立用特欲
出於天地範圍之表而道前古聖人之所未道者然
而不出於有無相乘盈虛相盪之中所謂道者蓋犧
皇之所鑿周孔之所貫言復有所增損哉六經之學
立經垂訓綱紀萬世老氏用心又將有得於六經之
外非不欲返世真淳挈民清淨然善用之者蓋可爲

黃昊爲唐虞其不善用之則兩晉齊梁之弊有不可
勝言者此非言者之過也世之言老氏者往往以爲
其道出於虛無恬漠非道之實而病之其又偏矣太
史公所謂尊孔氏者則黜老子尊老子者則黜孔氏
柳宗元獨曰老子孔子之異流也不得以相抗何斯
言之審且安也楊雄氏太玄則曰孔丁文足者也老
君玄足者也淵乎斯言

莊子注

向秀

二十卷

郭象

十卷

司馬彪

十六卷

李贄

晉三
十卷

崔譔 十卷

盧藏用 十二卷

成元英 道士三十卷又義疏十二卷

李贇 集解三卷

梁簡文帝 講疏三卷

李叔之 義疏三卷宋處士

王穆 義疏十卷

陸德明 文義句二十卷

梁曠 南華論二卷十五卷

張隱居 扣要三十三篇

楊上善 十卷

文如海 道士十卷

張昭 十卷

王元古 集解三卷

張機 講疏二卷

戴詵 義疏八卷

周宏正 講疏八卷

馬廓 古本正義十卷

李充 論二卷

張游朝 南華同象說十卷

賈參寥 通真論三卷唐人

碧虛子 南華摠章二卷又章句七卷

元載 南華通微十卷

向秀莊子解義

初注莊子者數十家莫能究其旨要向秀於舊注外

為解義妙析奇致大暢玄風秀別傳曰秀與嵇康呂

傲世不羈安放逸邁俗而秀雅好讀書二子頗以此嗤之後秀將注莊子先以告康安康安咸曰此書詎復須注徒棄人作樂事耳及成以示二子康曰爾故復勝不安乃驚曰莊周不死矣後注周易大義可觀而與漢世諸儒玄有彼此未若隱莊之絕倫也秀本傳或言秀遊託數賢蕭屑平歲都無注述唯好莊子聊隱崔譔所注以備遺忘云竹林七賢論云秀為此義讀之者無不超然若已出塵埃而窺絕冥始了視聽之表有神德玄哲能遺天下外萬物雖復使唯秋動競之人顧觀所徇皆悵然自有振拔之情矣

水至樂二篇未竟而秀卒秀子幼義遂零落然猶有

別本郭象者為人薄行有雋才文士傳曰象字子玄河南人少有才理慕

道好學託志老莊時人咸以為王弼之亞辟司空掾太傳主簿見秀義不傳於世遂

竊以為已注乃自注秋水至樂二篇又易馬蹄一篇

其餘衆篇或定點文字而已文士傳曰象作莊子注最有清辭適旨後

秀義別本出故今有向郭二莊其義一也

支道林莊子逍遙義

莊子逍遙篇舊是難處諸名賢所可鑽味而不能拔

理於郭向之外支道林在白馬寺中將馮太常共語

馮氏譜曰馮懷字祖思長樂人歷太常護軍將軍因及逍遙支卓然標新理

於二家之表立異義於衆賢之外皆是諸名賢尋味

之所不得後遂用支理向子期郭子玄逍遙義曰夫

枋小大雖差各任其性苟當其分逍遙一也然物之

芸芸同資有待得其待然後逍遙耳唯聖人與物

冥而循大變為能無待而常通豈獨自通而已又從

論曰夫逍遙者明至人之心也莊生建言大道而寄

指鵬鷖以營生之路曠故失適於體外鷖以在近

而笑遠有矜伐於心內至人乘天正而高興遊無窮

於放浪物物而不物於物則逍遙然不我得玄感不為

不疾而速則逍遙然靡不適此所以為逍遙也若夫有

欲當其所足足於所足快然有似天真猶飢者一飽

晉人好言老莊

魏阮籍達莊論曰天道貴順地道貴靜聖人修之以

建其名吉凶有分是非有經務利高勢惡死重生故
天下安而大功成也今莊子周乃齊禍福而一死生
以天地為一物以萬類為一指無乃繳惑以失真而
自以為誠者也

殷仲堪精覈玄論人謂莫不研究殷乃嘆曰使我解

四本談不翅爾

周祇隆安記曰仲堪好學而有理思也

殷仲堪云三日不讀道德經便覺舌本間強

晉安帝紀曰仲

堪有思理能清言

庾子嵩讀莊子開卷一尺許便放去曰了不異人意

晉陽秋曰庾嘗字子嵩潁川人侍中峻第三子恢閎有度量自謂是老莊之徒曰昔未讀此書

嘗謂至理如此今見之正與人意暗同仕至豫州刺史

支道林許謝盛德共集王家

許詢謝安王濛謝顧謂諸人今

日可謂彥會時既不可留此集固亦難常當共

言詠以寫其懷許便問主人有莊子不正得漁

父一篇

莊子曰孔子遊乎緇帷之林休坐乎杏壇之上孔子弦歌鼓琴奏曲未半有漁

者下船而來須眉交白被髮揄袂行原以上距陸而止左手據膝右手持頤以聽曲終而招子貢子路諸曰彼何為者也曰孔氏曰孔子何治子貢曰服忠信行仁義飾禮樂選人倫孔氏之所治也曰有上之君歟曰非也漁人曰仁則仁矣恐不免其身孔子聞而求問之遂言八疵四

病以誠

謝看題便各使四坐通支道林先通作

七百許語叙致精麗才藻奇拔眾咸稱善於是

四坐各言懷異謝問曰卿等盡不皆曰今日之言少不自竭謝後粗難因自叙其意作萬餘語才峯步逸文字志曰安神情秀悟善談玄遠既自難干加意氣擬託蕭然自得四坐莫不厭心支謂謝曰君一往奔詣故復自佳耳

阮宣子有令聞太尉王夷甫見而問曰老莊與聖教

同異對曰將無同太尉善其言辟之為掾世謂

三語掾

名士傳曰阮脩字宣子陳留人好老易能言理

郭子玄有雋才能言老莊庾敳嘗稱之每曰郭子玄

何必減庾子嵩

名士傳曰郭象字子玄自黃門郎為太傅主簿任事用勢傾動

一府散謂象曰卿自是當世大才我疇昔之意都已盡矣其伏理推心皆此類也

莊子

道德三千言辭絜旨謚澹然六經之外其用則易也

莊周則不然浚滌沉潜若老於玄者而泓嶂蕭瑟乃

欲超遙於老氏之表是以其說意空一塵個儻峻拔

無一毫蹈襲沿仍之陋極天之荒窮人之偽放肆迤

演如長江長河衮衮灌注泛濫乎天下又如萬籟怒

號澎湃汹涌聲沉影滅不可控搏率以荒恠詭誕狂

肆虛眇不近人情之說瞽亂而自呼至於法度森嚴

文辭雋健自作瓌新亦一代之奇才乎戰國多奇士

荀卿之學有志斯世者也魯連之辯獨善其身者也
寓言一書非深乎道者未易造此顧獨以滑稽發之
士至於無所用其才而猶區區於矯拂世俗之弊者
不亦怱怱乎方是時天下大壞蕩不可支攘奪爭凌
斬然一律其意思有以激之回之矯之夷之肆意無
忌以放乎辭矯世之私曾不一二而亂天下之過特
不可免於中若其言託孔子以自致其過者二十有
九章又言堯禹文王太公之事皆非詩書所見而竊
快其無稽之論狎聖侮道茲爲亦甚矣學者知之乎

列子

劉向論列子書穆王湯問之事迂誕恢詭非君子之
言又觀穆王與化人游若清都紫微鈞天廣樂帝之
所居夏革所言四海之外天地之表無極無盡傳記
所書固有是事也人見其荒唐幻異固以爲誕然觀
太史公史殊不傳列子如莊周所載許由務光之事
漢去古未遠也許由務光往往可稽遷猶疑之所謂
禦寇之說獨見於寓言耳遷於此詎得不致疑耶周
之末篇叙墨翟禽猾釐慎到田駢關尹之徒以及於
周而禦寇獨不在其列豈禦寇者其亦所謂鴻蒙列
缺者歟然則是書與莊子合者十七章其間尤有淺

近迂僻者特出於後人會粹而成之耳至於西方之人有聖者焉不言而自信不化而自行此固有及於佛而世尤疑之夫天毒之國紀于山海竺乾之師間于柱史此楊文公之文也佛之爲教已見於是何待於此時乎然其可疑可恠者不在此也

文子

柳子厚以文子徐靈府注十二卷李白進訓注十二卷天寶中以文子爲通玄真經子爲老子弟子其辭指皆本之老子其傳曰老子弟子雖其辭指柳子厚以爲時有若可取蓋駁書也凡孟子數家皆入剽竊

文詞义牙相抵而不合人其損益之歟或聚斂以成其書歟乃爲刊去謬亂頗發其意子厚所刊之書世不可見矣今觀其言曰神者智之淵神清則智明智者心之府智公則心平又曰上學以神聽之中學以心聽之下學以耳聽之又曰貴則觀其所舉富則觀其所欲貧則觀其所愛又曰人性欲平嗜欲害之此亦文子之一變也

子略卷二

子略卷三

戰國策

高氏

似孫

續古

班固稱太史公取戰國策楚漢春秋陸賈新語作史記三書者一經太史公采擇後之人遂以爲天下奇書予惑焉每讀此書見其叢脞少倫同異錯出事或著於秦齊又復見於楚趙言辭謀議如出一人之口雖劉向校定卒不可正其淆駁會其統歸故是書之汨有不可而辨者況於楚漢春秋陸賈新語乎二書紀載殊無奇耳然則太史公獨何有取於此夫載戰

國楚漢之事舍三書他無可攷者太史公所以加之
采擇者在此乎柳子厚嘗謂左氏國語其闕深傑異
固世之所耽嗜而不已也而其說多誣淫不槩於聖
余懼世之學者惑其文采而淪於是非作非國語昔
讀是書殊以子厚言之或過矣反覆戰國策而後三
嘆非國語之作其用意切用功深也予遂効此盡取
戰國策與史記同異又與說苑新序雜見者各彙正
之名曰戰國策考

管子

尹知章注三十卷杜佑管氏指略二卷

古者盛衰之變其可畏也先王之制其盛極於周后

稷公劉大王王季文武成康周公之所以制周者非
一人之力一日之勤經營之難積累之素况又有出
於唐虞夏商之舊者及其衰也一夫之謀一時之利
足以銷靡破鑿變徙剝蝕而迄無餘脉吁一何易耶
九合之力一霸之圖於齊何有也使天下一於兵而
忘其為農天下一於利而忘其為義孰非利也而乃
攻之以貪騁之以詐孰非兵也而乃趨之以便行之
以一切先王之所以經制天下者煙散風靡無一可
傳嗚呼仲其不仁也哉而况井田既壞槩量既立而
商鞅之毒益滋矣封建既隳詩書既燎而李斯之禍

益慘矣緊誰之咎耶漢唐之君貪功苟利兵窮而用
之無法民削而誅之無度又有出於管仲鞅斯之所
不爲者豈無一士之智一議之精區區有心於復古
者而卒不復可行蓋三代之法其壞而掃地久矣壞
三代之法其一出於管仲乎劉邵之志人物也曰管
仲曰商鞅皆以隸之法家李德裕以邵之索隱精微
研幾玄妙實天下奇才至以管仲與商鞅俱人物之
品往往不倫德裕顧未嘗熟讀其書耳邵所謂皆出
於法者其至論歟孔子曰齊一變至於魯魯一變至
於道使齊盡變其功利之習僅庶幾於魯耳然則安
得而變哉聖人非有志於變齊也古之不可復也爲
可嘆耳

尹文子

班固藝文志名家者流錄尹文子其書言大道又言
名分又言仁義禮樂又言法術權勢大略則學老氏
而雜申韓也其曰民不畏死由過於刑罰者也刑罰
中則民畏死畏死則知生之可樂知生之可樂故可
以死懼之此有希於老氏者也又有不變之法齊等
之法理衆之法平準之法此有合於申韓然則其學
雜矣其學淆矣非純乎道者也仲長統爲之序以子

學於公孫龍按龍客乎平原君趙惠文王時人也齊宣王死下距趙王之立四十餘矣則子之先於公孫龍爲甚明非學乎此者也晁氏嘗稱其宗六藝數稱仲尼熟攷其書未見所以稱仲尼宗六藝者僅稱誅少正卯一事耳嗚呼士之生於春秋戰國之間其所以熏染習變幻捍闔求騁於一時而圖其所大欲者往往一律而同歸其能屹立中流一掃羣異學子必孔氏言必六經者孟子一人而已

韓非子

士生戰國才不一伸抱智懷謀其求售殊切切亦可

憐也商鞅以法治秦李斯又以法治秦秦之立國一出於刑罰法律而士以求合者非此不可始皇一見韓非之書喟然嘆曰寡人得見斯人與之游死不恨矣始皇所以惓惓於非者必有所契者今讀其書往往尚法以神其用薄仁義厲刑名背詩書課名實心術辭旨皆商鞅李斯治秦之法而非又欲凌跨之此始皇之所投合而李斯之所忌者非迄坐是爲斯所殺而秦即以亡固不待始皇之用其言也說難一篇殊爲切於事情者惟其切之於求售是以先爲之說而後說於人亦庶幾萬一焉耳太史公以其說之難

也固嘗悲之太史公之所以悲之者抑亦有所感慨焉而後發歟嗚呼士生不遇視時以趨使其盡遇固無足道而况說難孤憤之作有如非之不遇者乎楊雄氏曰秦之士賤而拘信哉

墨子

韓非子謂墨子死有相里氏之墨相芬氏之墨鄧陵氏之墨孔墨之後儒分爲八墨離爲三其爲說異矣墨子稱堯曰采椽不斲茅茨不剪稱周曰嚴父配天宗祀文王又引若保赤子發罪惟均出於康誥泰誓篇固若依於經據於禮者孟子方排之不遺一力蓋

聞之夫子曰惡似而非者惡莠恐其亂苗也惡鄭聲恐其亂雅也惡紫恐其亂朱也惡鄉原恐其亂德也墨之爲書一切如莊周如申商如韓非惠施之徒雖不闢可也唯其言近乎譌行近乎誣使天下後世人書信其說其害有不可勝言者是不可不加闢也嗚呼孟子之學一於羽翼群經推尊聖人者歟異時有纏子者修墨子之業唯曰勸善兼愛墨子重之嗚呼學墨子者豈學此乎

鄧析子

劉向曰非子產殺鄧析推春秋驗之按左氏魯定公

八年鄭駟猷嗣子太叔爲政明年殺鄧析而用其竹
刑君子謂猷嗣於是爲不忠攷其行事固莫能詳觀
其立言其曰天於人無厚君於民無厚文曰勢者君
之輿威者君之策其意義蓋有出於申韓之學者矣
班固藝文志乃列之名家列子固嘗言其操兩奇之
說設無窮之辭數難子產之治而子產誅之蓋則與
左氏異矣荀子又言其不法先王不是禮義察而不
惠辯而無用則亦流於申韓矣夫傳者乃曰猷殺鄧
析是爲不忠鄭以衰弱夫鄭之所以爲國者有若禪
謀草創之世叔討論之東里子產潤色之庶幾於古

矣子產之告太叔曰有德者能以寬服人其次莫如
猛子產惠人也固已不純乎德他何足論哉不只竹
刑之施而民懼且駭也嗚呼春秋以來列國綦錯不
以利勝則以威行與其民揉轡於爭抗侵凌之域豈
復知所謂仁漸義摩者其民苦矣固有惠而不知爲
政者豈不賢於以薄爲度以威爲神乎析之見殺雖
猷之過亦鄭之福也

亢桑子

孔子曰上有好者下有甚焉亢桑子之謂歟開元天
寶間天子方鄉道家者流之說尊孝以表莊列皇皇

乎清虛冲澹之風矣又以亢桑子號洞靈真經上既不知其人之仙否又不識其書之可經一旦表而出之固未始有此書也襄陽處士王褒來獻其書書褒所作也按漢略隋志皆無此書褒之作也亦思所以趨世好迎上意耶今讀此編往往采諸列子文子又采諸呂氏春秋新序說苑又時采諸戴氏禮源流不一往往論殊而辭異可謂雜而不純濫而不實者矣太史公作莊周列傳固嘗言其語空而無實而柳宗元又以爲空言之尤皆足知其人決其書然柳氏所見必是王褒所作者

鵠冠子

春秋戰國間人才之偉且多有不可勝者不得其時不得其位不得其志退而藏之山谷林莽之間無所泄其謀慮智勇大抵見之論著然其經營馳騁天下之志未始一日忘而其志亦可窺見其萬一者矣是以功名之念有以怵其心利害之機有以蕩其慮而特立獨行之操不足以盡洗見聞之陋也是其爲書不出於黃老則雜於刑名是蓋非一鵠冠子而已也柳子厚讀賈誼鵬賦嘉其詞而學者以爲盡出鵠冠子得其書讀之殊爲鄙淺唯誼所引用者爲甚美餘

無可言者列仙傳曰鵠冠子楚人隱居衣弊履穿以
鵠爲冠莫測其名著書言道家事則蓋出於黃老矣
其書有曰小人事其君務蔽其明塞其聰棄其威以
灼熱天下天高而難追有福不可請有禍不可違其
言如此是蓋未能忘情於斯世者至曰鳳鳥陽之精
麒麟陰之精萬民者德之精嗚呼亦神矣

孫子

昭文章明貴賤辨等列順少長魯兵也不重傷不禽
二毛不以阻隘明耻教戰宋兵也少長有禮八節和
睦晉兵也制國作政以寄軍令齊兵也僕三千人有

紀有綱秦兵也伐晉之舉喪乃止焉楚兵也周長制
隳法蕩政不克綱強弱潰凌一趨於武侈兵圖霸于
戈相尋甚可畏也其間謀帥行師命意立制猶知篤
禮信尚訓齊庶幾三代仁義之萬一焉耳殊未至於
毒也兵流於毒始於孫武乎武稱雄於言兵往往舍
正而鑿竒背義而依詐凡其言議反覆竒變無常智
術相高氣驅力奮故詩書所述韜匱所傳至此皆索
然無餘澤矣先儒曰無以學術殺天下後世是猶言
學者也吳越交兵勝負未決武居其間豈無所以爲
強吳勝越者二十年間闔廬旣以戰死夫差旋喪其

國方是時武之術不行於他國特見信於吳而武之言兵亦知爲吳計而已成敗興亡易如反掌固毋待於殺天下後世兵其可以智用歟

吳子

自有春秋而天下日窮於兵孫武以言兵進於吳吳起以言兵售於魏各以書名家然讀吳子其說蓋與孫武截然其不相侔也起之書幾乎正武之書一乎竒吳之書尚禮義明教訓或有得於司馬法者武則一切戰國馳騁戰爭奪謀逞詐之術耳武侯浮西河下中流喟然嘆曰美哉山河之固魏之寶也起言之

曰德不在險德之不修舟中之人盡敵國也斯言之善質於經求之古奚慚焉反覆此編則所教在禮所貴在禮天以湯武仁義律之起誠有間求之於齊魯晉衛秦楚之論兵者起庶幾乎武侯賢矣聽起者篤矣君臣之遇不爲不厚矣讒間一生棄如敝屣勲名志業迄不一就士之思古安得不嘆息於斯若其當新難之國輔未壯之君馭不附之大臣臨未信之百姓而乃明法審令廢踈遠之公族捐不急之庶官持意太過操制太嚴是所以速禍耳起乃踈於此耶

范子

范子之事不亦奇乎蠡相越王勾踐深謀隱策者一十二年迄亡吳大雪越耻勾踐霸拜蠡上將軍蠡上即日書勾踐扁舟五湖聞無聲又浮海入齊變姓名鷁夷子皮父子治貲數十萬齊聞之延為相有頃上相印書散其所有獨懷重寶行次乎陶天下稱陶朱公嗚呼智哉唐王績詩范蠡何智哉單舟戒輕裝與吾言合節蠡方居齊以書做大夫種曰鷁鳥盡良弓藏狡兔死走狗烹王長頸可共患難不可共樂合亟圖之嗚呼此非蠡之言計然之言也初有計然者遨遊海澤自稱漁父蠡有請曰先生有陰德願令越社

稷長保血食計然曰越王鳥喙不可以同利蠡之智其有決於此乎此編卷十有二往往極陰陽之變窮曆數之微其言之妙者有曰聖人之變如水隨形蠡之所以俟時而功以見幾而作者其亦有得乎此計然濮上人姓章名文子其先晉國公子也

鬼谷子

隋志有樂注一卷又有鬼谷先生占氣一卷


戰國之事危矣士有挾雋異豪偉之氣求騁乎用其應對酬酢變詐激昂以自放於文章見於頓挾險恠離合揣摩者其辭又極矣鬼谷子書其智謀其數術其變譎其辭談蓋出於戰國諸人之表夫一闢一闔

易之神也一翕一張老氏之幾也鬼谷之術往往有
得於闔闢翕張之外神而明之益至於自放潰裂而
不可禦予嘗觀諸陰符矣窮天之用賊人之私而陰
謀詭秘有金匱韜略之所不可該者而鬼無盡得而
泄之其亦一代之雄乎按劉向班固錄書無鬼谷子
隋志始有之列於縱橫家唐志以爲蘇秦之書然蘇
秦所記以爲周時有豪士隱者居鬼谷自號鬼谷先
生無鄉里族姓名字今攷其言有曰世無常責事無
常師又曰人動我靜人言我聽知性則寡累知命則
不憂凡此之類其爲辭亦卓然矣至若盛神養志諸

篇所謂中稽道德之祖散入神明之蹟者不亦幾乎
郭璞登樓賦有曰揖首陽之二老招鬼谷之隱士又
遊仙詩曰青溪千餘仞中有一道士借問此何誰云
是鬼谷子可謂慨想其人矣徐廣曰潁川陽城有鬼
谷注其書者樂臺皇甫謐陶弘景尹知章

知章
唐人

子略卷三



文化甲子

第四卷缺

